

ATET PA'YESA JESÚS PUEYCHRESHA' LOS HECHOS

Atet otnerranet Jesús huapanetcha' Parets Puecamquëñ

¹ Te'pa' masheñe Teófilo, nequellcoṭpa' o'ch neserrpare'taterrperr po'pocheño. Ahuaña ñeñt nequellconañ all neñotataṭ ora allpon atet pe't Jesús allempo añe patsro'tsenmeñ. Ñaña ora allpon yeḥate't Jesús, ñeñtpa'cho' o' notuaṭ nequellcoṭ.

² Tarraña allempoteñ a'terr pue'ntañopa' palltena o'ch notaṭ ñaña. Te' añ nequellcoṭpa' o'ch notaṭ. Tarraña ama't allempo ama a'terra' Jesús pa' añña ñeñt pueyochresha'pa' o' otuanet atet'cha' pet. E'ñe Parets Puecamquëñoṭpa' o' llesensa'huanerran pueyochresha' ñeñt acra' ña.

³ Ama't pomueroḥchteñoṭ o' rromua ahuaña, allempoñapa' o' orrterrana pueyochresha' e'ñe beṭnaṭoṭ. Ñeñto'marña ñetpa' eñochet e'ñe po'ñoḥ añpa' ñeñtara Jesús ñeñt rromats ahuaña. Tarro'mar pa'tatsoch ḥarramatnerr atto orrtame'tnerranet mamesha'tets. Ñaña ḥocma eñchete't allame'tets. Allempoña ñapa' a'poṭanet atet penaña Parets po'cohuenña atto ayochreshattena ña.

⁴ Allempo allo'tsenet e'ñe parro epuet pueyochresha'pa' atet otanet:

—Amach erra setatsto arroŧ, allasach arrma Jerusaléño. O'ch secueñ esempoch çhaponasa ñeñŧ Parets Puecamquëñ. Tarro'mar Paretspa' o' otuas o'ch mueñonas Puecamquëñ. Ñeñto'mar napa' o' na'poŧuonas Parets po'ñoñ ahuaña.

⁵ Allempopa' añña ñeñŧ notuas: Juanañpa' añoñña apateŧ oño, țarraña na tsapaŧonetpa' añcha'ña nechorratasa Parets Puecamquëñ. Añpa' allohua atet ot Jesús.

⁶ Po'pocheño all apçhenet aspenŧo pa'so'cheñ Olivopen. Pueyochresha'ñapa' atet a'pŧo'chet Jesús:

—Te'pa' Partseshacha' ñato' pocte' penteñ o'ch p̧apaterrey ñeñŧey israelneshay yepatseñ. Allochñapa' amach esesha' poñeña yeyore'tame'tenaye.

⁷ Jesúsñapa' atet otanet:

—Ñeñŧ socoppa' ama pocteyaye o'ch señoçh. Añña Yompor po'partsoteñoŧ e'ñe eñoŧueñ. Ñapa' o' ne' allempoch etsotuerra ora allohuen añeçhno.

⁸ Jesúsapa' alla oterraneterr:

—Añña pocte' o'ch señoçh, ñerra'm esempoch huaponasa Parets Puecamquëñ sesho, ñach ahua-mencat sepose'. Allempopa' sa'poŧoncha' neñoñ erraparen—Jerusaléño, ñaña ora Judeo, ñaña Samario, ñaña ora allohuanen pats.

Arrpa' atet perra Jesús allempo a'terr pue'ntaño

⁹ Ñeñña otuanenanetpa' allempoñapa' a'tenochayo' enoneŧ. Añña pueyochresha' pocuanrrorteñoŧetpa' o' ma'natena oso. O'huañ orrta, ama't mamesha.

10 Ama't allempo o'huañ orrta Jesús, ñetpa' allo' cohuanrrortenet enonet allenet o' chenca'huanena Jesús. Allempoñapa' cohuerretset patsonetpa' alla entet epsheña yacma o' tomcha'toset e'ñe parro. Pa'shtamuetpa' nanaco' huallama'tareret.

11 Ñetñapa' atet otosanet:

—Esuañaca' galileo'marneshacha' secuanrrortenña enonet. Añ Jesús ñeñt' o' a'terr entopa' huerrerrcha' po'pocheño atet senteñ o' ahuerrento.

12 Allempoña o' a'ten Jesúsapa' añña pueyo-chresha'pa' o' ahuanerret alla Jerusaléño. O' onaçherret Olivopnoť allot a'terr Jesús. Tarro'mar ñeñt' aspenet Olivopenpa' allame'tso'tsena Jerusaléñoť, Olivopnoťpa' ñato' allo'tsente' paterr kilómetro attoch yeçhap Jerusaléño.

13 O'ña çhaçherret anetso Jerusaléño all pocollo allecma a'puenetpa' o' be'toscha'tuerret, a'tapuet eno all tama a'yohuen bať. Allñapa' apçhet allohuenet. Ñeñt' apçhatsa ñeñt'pa' añeçhno: Pedro, ñaña Jacobo*, ñaña Juan, ñaña Andrés, ñaña Felipe, ñaña Tomás, ñaña Bartolomé, ñaña Mateo, ñaña Jacobo ñeñt' Alfeo puechemer, ñaña Simón ñeñt' cananistanesha' ñeñt' atarr torratse't pa'netsrecop, ñaña allo'tsen Judas ñeñt' Jacobo pa'mo'nasheñ.

14 Allña apçhenetpa' e'ñe ñeñta nete't pueyoçhro cohuen ñoñets. Allotpa' e'ñe poma'yoçhreñoťet cohuenpa' çhocma ma'yoçhete't. Allo'tsen ñaña

* **1:13** Jacobopa' ñeñfara ñeñt' sochenet Santiago.

coyaneshachno, ama't Jesús pachor María, ñaña pa'mo'nasheñnesha' allo'tsenet ñamet.

Atet ña Jesús puellsensarnesha' allempo net Matías ñeñtcha' epuet a'potoñet Yompor po'ñoñ

¹⁵ Parrochña Pedropa' o' tomos o'ch serrpare'tatanet. Allempopa' ñato' allo'tsente' ciento veinte acheñenesha'. Allempoñapa' otanet:

¹⁶ —O'ch masheñneshacha' notas: Po'ñoch o' etsotua Yompor po'ñoñ ñeñt anaret ahuatoteñ. Tarro'mar Parets Puecamquëñoñ eñose't David. Ama't ahuatpa' ote't David atetcha' ña Judasoñ ñeñt anmue' ñeñt rromue' Jesús. Ñehua, pocte'ñacho' o'ch etsota Yompor po'ñoñ.

¹⁷ Judasoñpa' ahuaña allempo allo'tseney e'ñe parro ñapa'cho'ña acreñña Jesús o'ch pueyochresha' pe'.

¹⁸⁻¹⁹ Ñehua, Judasoñpa' tsa'chet allpon quelle atto poman Jesús. Tarraña ñeñt quellepa' allo rañtet pats. Tarraña allempo shora'nom Judasoñ chap patsopa' potsa'nmos pa't, o' yo'pahua ora. Allempoña e'mare'ch allohuen jerusaléño'marnesha' atto Judasoñpa' o' rroma. Añña pats ñeñt rañtet Judasoñ po'çllayorotpa' o' sochet Acéldama. Aññoñets ñeñt otenet Acéldama ya yeñoño yoteñ Er-rasatsotnanen.

²⁰ Añña ñeñt quellquë't ahuat David ñeñt pa' anuare'tta añ libro Salmos. Añña ñeñt atet oteney:

All yeçhena, puenasepa'ch amarat, all amach eseshaye' yeçhatstatso. Ñeñt po'taruas ña' attoch sherbanean Yomporpa' tarraña ñeñt pa' apanepa'ch po'psheñeñ. Atet oten añ libro Salmos.

21-22 Alla oterraneterr Pedro:

—Ñeñto'mar te'pa' añ poctetsa o'ch ye'ñ po'psheñeñ ñeñtcha' parro ya'po'a atto Jesús'pa' o' tanterra. O'ch ye'ner puesheñarr ñeñt' chocma parro yechopeñe'che't ahuaña allempo arro'tsenmeñ Yepartseshar Jesús. O'ch ye'ner puesheñarr ñeñt' chocma yoctaye't ama't allempoteñ Juanañpa' apatapan Jesús tarremphua allempo a'terr Jesús.

²³ Allempoñapa' o' neñet epsheña, puesheñarr añ pa'so'cheñ José Justo, ñeñtara José oteñet ñaña Barsabás. Po'psheñeñpa' añ pa'so'cheñ Matías.

²⁴ Allempoñapa' o' ma'yochet. Puema'yocheño'tetpa' atet otet:

—Yompore, ñeñte'p entene' allohueney yeyo'cher. Te'pa' o'ch peñotatay erra'tsente' pemnen pa' ñeñtcha' ello alla sherberrets p'ocop atet ñerra'm pellsensar.

²⁵ Judasoñpa' o' sa'nmuey o' ahuo' all ñeñt' o'patatarettena ña e'ñe ña po'chñaroñ.

²⁶ Allempoñapa' yellsheñe'chet e'ñe ñet po'suertot attoch eñochet erra'tsente' muenenña Yompor ñeñtcha' alla sherberrayerr. Allempoña yellsheñe'chenet aña orrtatsa Matías ñeñtepa't muenenña Yompor. Allempoteñ Matías'pa' ahuo' aguëñ po'poñe'chno ñeñt' çharrasheña puechetsa paterr ñeñt' puellsensar Jesús.

2

Allempo çhapanet Parets Puecamquëñ

¹ Allempoñapa' o' meterrerr allponmat amnaroch çharramat, o' çhap allempo coshena

judionesha' ñeñt otenet Pentecostepo. Allempoña ñetpa' alla apcherretterr e'ñe parro ñeñtet ame'ñetset.

² Allempoñapa' machayoťa e'mapuet atet ñerra'm huomenquëshä' ma'more'tos entoť. Allohuenet ñeñt allo'tsa'yen pocollo e'ñe e'mhuet.

³ Añña ñeñtet apchetsetpa' o' huapanet atet ñerra'm tso'. Huapapa' čha chapa'rrtosa po'huorter ñesheto. Chapyesanet e'ñe puesheña'ttsocmuet atet ñerra'm huorte'. Añña huorte'pa' alla a'prra'ta ñesheto.

⁴ Añña ñeñt čhapyesahuet e'ñe puesheña'ttsocmuetpa' añepa't Parets Puecamquëñ ñeñtcha' chorrahuet. Allempoñapa' allorocma eñosyeset po'poñ ñoñtso ñeñt ama eñosete'te ahuaña. Añña Parets Puecamquëñpa' ahuo' eñoratyesanet po'poñe'ttsocma attoch serrpare'tachet pa'namen acheñ e'ñe ñet po'ñoñeto.

⁵ Allempo Jerusaléñopa' allo'tsa'yen shonte' judionesha' ñeñt huächetsa pa'namen anetsot. Ñetpa' cohuen coťape'chete't Partsocop.

⁶ Allempoña e'marettet čha ano'tenetpa' o' matrra'tosa shonte' pa'namen acheñenesha' o'ch enteñeta' ñeñt ano'tatsets. Chapuet all ano'tatsenetpa' o' entoset ñeñt ame'ñetsapa' año eñosyenet e'ñe ñet po'ñoñeto. Allempoñapa' atťa cohuanrrortoset.

⁷ Puemoññe'teñoťetpa' atet otyeset:

—Ta', errotenote'ca' e'myennayetña yeñoñ. Yapa' yeñotenanet ñetpa' galileo'marnesheta.

⁸ Ama't po'poñ ñeñt yenyo'mar ñoñetspa'

e'mueñet. Allohueneypa' o' e'ñe ye'myes atet eñosyenet e'ñe cohuen yeñoño.

⁹ Allempopa' alla otanna'tyerreterr:

—Yapa' yeñen po'poñe'ttsocma ñoñets tarro'mar yapa' pa'namen anetsot yehuena. Allot anetsrot yehuapyena ñeñtpa' pa'namen pa'so'chñechno— ama't Partiot ñaña Mediot ñaña Elamot ñaña Mesopotamiot, Judeot, Capadociot, Pontot, Asiot,

¹⁰ Frigiot, Panfiliot, Egiptot ñaña Africo'marot, alla allame'tets Cireneo. Ñaña ñeñt huetsa Romot ñeñt chocma a'puetsa arr.

¹¹ Ama't ñaña judionesha' shonte', ñaña ama't ñeñt ame'ñaten judionesha'. Ñaña ñeñt huetsa Cretot ñaña Arabiot. Ya te'pa' o' e'ñe ye'myes e'ñe yocma yeñoño atet aye'chochtateññañet Parets po'cohuenña e'ñe yeñoño.

¹² Otanna'tyerreterr alla:

—Ta'm, ñetpa' errotenette'ca'yete'. Yapa' ama't ahua'tapa' ama yentareña galileo'marnesha'pa' o'ch eñosyesña e'ñe cohuen yeñoño. Ta', esocopte'.

¹³ Añña po'potantañ acheñenesha'pa' o' achmāre'tanet atet otarettet:

—Tarro'mar ottenetña' choca'ye posa'tyenet.

Atto Pedropa' serrpare'tatan acheñenesha'

¹⁴ Añña Pedropa' tanta o' tom e'ñe alla epuet po'poñechno yochreshats. Eñora huomenc, otanet:

—Masheñe judioneshacha' ñaña allohuenes ñeñtes arro'tsenes Jerusaléño, te' o'ch notas: Se'mñoten o'ch neñotatas attot atet yepena ya.

¹⁵ Yapa' ama yeposaño'teye' o' yo'notapsa'mueno atet soteney sa, tarro'mar ama choye' o' yarepeno orrats.

16 Añña ñeñt̃ sentyen te' ñeñt̃pa' añ o' etsota ñeñt̃ atet̃ ote't̃ Joel ñeñt̃ a'mtaye't̃ Yompor po'ñoñ ahuat̃. Añña ñeñt̃ quellquë't̃ ahuat̃ Joel:

17 Añ atet̃ oteney Yompor: Allempoch mellapoterrmocha, atet̃cha' perra, o'ch nenanet Necamquëñ pueyoçhreto, allohuen arromñañenesha' o'ch nechorratanet Necamquëñ. Añña penñreneñpa' ñet̃cha' a'poterret neñoñ ñeñt̃cha' neñotatuanet, ama't̃ ñaña coyaneshaçhno a'poterrnancha' neñoñ. Añña ñeñt̃ huepueshare' çhocmach es norrtatyesanet ñeñt̃cha' entyesonet neshot̃. Añña ñeñt̃ po'nmeneshare'pa' es norrtatyesanet̃cha' pueçhopoñeto.

18 Ama't̃ allohuen ñeñt̃ nesherbene', ñaña ama't̃ coyaneshaçhno nenuanet̃cha' Necamquëñ pueyoçhreto attoch a'po-tonet neñoñ.

19 Allempoña enopa' o'ch nentatyesanet ñeñt̃ ama't̃ ahuat̃apa' ama puentareto. Pat-sopa'çho'ña o'ch norrtatyesanet ñeñt̃cha' eñotaterrahuet. Quellareñtsoñpa' norrtat̃cha' errasats. Puetomam̃psanna'teño-fet pa'netserpa' orrterrach tso' erracmañen, chepoterrcha' amos ñaña errañaren.

20 Ama't̃ ñeñt̃ yeçhoyo'tam̃pene' te' allempopa' puenaserrach checmete'. Arrorppa'çho'ña allempopa' tsama't̃terrach atet̃ ñerra'mrrate' errasats. Atet̃cha' yoroçhterra allempoch huerrmocha Yompor.

21 Allempopa' ama't̃ erra'tsena çhore'te' Yompor pueyoçhrocmañen attoch a'queshpachpa',

Yomporñapa' a'queshḡatanetcha'. Arrpa' allohua atet quellquë't ahuat Joel.

²² Añpa' ñeñfara alla oterraneterr Pedro:

—O'ch masheñe judioneshacha' noterrerr: Sapa' señoñeñ ahuañapa' orrte't Jesús ñeññ nazareto'marnesha'. Ñapa' ḡocma orrtatonase't po'partsoñeña, ñaña ḡocma orrtatyesonase't ñeññ ama sentare ñeññcha' señoñate' ñapa'ḡo'ña nanac Parets. Pompom apuene'ña po'partsoña attoch señoñeñ Puechemer ña nanac Parets.

²³ Añña ñeññfara Jesús sañapa' o' sepomhuer attoch corso'tamḡset. Sañapa' o' saḡ po'poñ acheñenesha' ñeññ atpare'tene' Yompor attoch ñetpa' o'ch muetset. Atet o' seḡohua, Yomporpa' ahuatoteñ eñotuase't atetcha' seḡa, tarro'mar atet muene't ña.

²⁴ Tarraña ama't rromuapa' Pompompa' o' alla tantater. Tarro'mar ama'te' erro'teno te'pa' alla a'po rromue'.

²⁵ Ama't atet ote't David ahuat, atet ñerra'm Jesús eñoratse't. Atet ote't:

Napa' neñoñeñ Nompom ḡocma allo'tsenen parro epan. Ñach nanac ahuamencat nepe' attoch amach nemñcha'to.

²⁶ Ñeñño'marña nanac nocshena neyoḡhro, nocsheñeshocma neñen. Ama't nerromapa' neñoñeñ amach alla na'po rromue'.

²⁷ Napa' neñoñeñ amach a'ypo'ñono necamquëñ alla o'pono. Nompompa' amach mueno o'ch puetsohua alla nechets tarro'mar ñapa' entenen e'ñe cohuenare' es nepen ñocop.

²⁸ Añcha'ña o'ch entaterren attoch yocrrerra e'ñe cohuen. Poparrocmateñoñ epan ñapa' ñach

nocshaterre' nanac. Allohua atet ote't
David ahuat atet ñerra'm Jesús eñostse't.

29 Allempopa' alla oterraneterr Pedro:

—O'ch masheñneshacha' noterrser, añ poctetsa e'ñe eñotochen o'ch notas: Yatañ David ahuatpa' rroma. Rromapa' pampuet. All pampuetpa' yenteñ ama't teme'ttsen. Ñeñto'mar yeñoteñ ahuat allempo ote't añ ñoñetspa' ama añecpaye' serrpare'te'te e'ñe ñocop, añecopña serrpare'te't Jesúsocop.

30-31 Tarro'mar David ñapa' ña a'ñtaye't ahuat Yompor po'ñoñ. Ñapa' e'ñe eñotue't atetcha' pa ñeñtcha' Cristotats allempoch chap añe patsro. Ñeñto'mar ama't ahuatoteña' eñose't atetcha' tanterra ñeñtcha' Cristotats. Pomporpa' amach a'ypo'ñano Puechemer o'pono. Amach muenatoñe o'ch puetsohua po'chets. Yomporpa' ama't ahuatpa' atet otan David o'ch noñ puesheñarr po'mrenñoñ ñeñtcha' añcha'tarettatsa esempo. Davidpa' eñotane't Yompor ñapa' ama pueno po'ñoñ.

32 Te'ña yapa' o' yeñch Yomporpa' o' tantaterran Puechemer Jesús.

33 Te'ña ñapa' e'ñe allo'tsen epuet Pompor Parets all partsoten ento. Pomporpa' o' e'ñe aphue Puecamquëñ. Te'ñapa' añ ñeñtara Puecamquëñ o' chorratya yaña atet otnerrey ahuaña. Ñeñto'marña o' orrtonaya atet sentyes ñorra', ñaña atet se'myes cohuen ñoñets e'ñe sa señoño.

34 Ñeñto'marña yeñoteñ ama añecpaye' serrpare'te'te David e'ñe ñocop, tarro'mar ñapa'

rromapa' ama tanterro allotpa' ama a'terro ento atet ñerra'm Jesús. Ñaña po'pocheño ahuatpa' eñose't David, atto' ote't:

Yompor Paretspa' atet otennan ñeñt e'ñe Nepartseshar nepen na (ñeñtara ñeñtcha' Cristoterrets): "Te'pa' o'ch ñanorruerr arr necohuenro't allcha' pecohuentapreterrna.

³⁵ Attochña ama't ñeñt pe'moñe'tene' napa' o'ch e'ñe name'ñatuerranet allochñapa' o'ch atet perret ñeñt pemnen ña." Añpa' allohua atet ote't David ahuat.

³⁶ Allempoñapa' alla oterraneterr Pedro:

—Sapa' israelena'tares. Ñeñto'marña señoche'pa'ch e'ñe eñotochen atto Yompor Parets o'nan Puechemer Jesús. Ñapa' ña Partseshatets, ñeñtara Cristotats. Añ ñeñt Jesús sañapa' o' secorso'tamñpsach. Añpa' ñeñta allohua serrpare'tatanet Pedro.

³⁷ Allempoñapa' ñeñt matrra'tatsa allpa' o' çhapanet pueyoçhro añ ñoñets. Nanac llecarrortet. Ate't ochet Pedro ñaña po'potantañeçhno Jesús puellsensar. E'ñe puellquëño'tet atet otet:

—Masheñneshacha', errotenuachca'ye yeperraña te'.

³⁸ Pedroñapa' atet otanet:

—Te'pa' aña poctetsa ñeñtcha' seperra allohuenes. Te' sellquëño't o'ch soctape'cherr ello cohuen Yomporecop. Allochñapa' Yomporpa' peretna'huerrnascha' so'chñar. E'ñe same'ñeño't Jesucristo añ pocte' te' o'ch sapataretterra

Partsocop. Allochñapa' Paretspa' chorraterrsach Puecamquëñ.

39 Ñeñtpa' pocte' atetcha' sepa, tarro'mar atet otnerrey Jesús o'ch chorratuerrya e'ñe puesheña'ttsoy Puecamquëñ, allohueney ñeñfey o' hua'ñerrey Yeyomporer Parets o'ch yame'ñera. Ñaña o'ch chorratuonasa ama't sa sechemerasha' Puecamquëñ, ñaña allohuen ama't ñeñt ellaparo'tsa'yenet.

40 Allempoñapa' o' alla serrpare'taterraneterr attoch otanet pa'namen ñoñets. Attoch cotape'chatanetpa' atet otanet:

—Amach soctape'chatsto atet cotape'chen po'poñ acheñenesha' ñeñt ama ame'ñetso. Attocha' sequeshperrach.

41 Allempoña allohuen ñeñt ame'ñaya Pedro atet otanetpa' o' apatarettet. Allempopa' ñato' allpon ame'ñatsa ma'pa mil acheñenesha'. Cha shontena ñeñt ame'ñatsa.

42 Allempoteñ ñeñt ame'ñatsapa' e'ñe ma'yoçhrenet atet yeçhatanete't Jesús puellsensar. Nanac cohuen entanna'tete't allecma apçhete't parro. Pueyerpueño'tet Jesús o' toma'ntatet pan atet ñerra'm Jesús po'chets. Nanac ma'yoçhete't e'ñe parro.

Atet corre't ahuat ñeñt ame'ñatse't

43 Ñeñt Jesús puellsensarpa' orrtatanete't shonte' pa'namen ñeñt ama puentareto, orrtatanete't partsoteñets attoch eñoçhet añmapa' Partsepa't. Ñeñto'marña allohuen acheñenesha'pa' nanac mecha'na'tete't.

44 Ñeñĩ ame'ñatsapa' čhocma apčhete't parro, pocsheñoť apanna'tyesete't ñeñĩ es palltatse't.

45 O'ch venda'yese'te't ñeñĩ echyenet ñaña allpon ñeñĩ o'patyese'te't ñeñĩpa'čo'ña venda'yese'te't. Allpon gana'yese'te'tpa' o'ch apanna'tyesete't ñerra'm esesha' es palltatse't.

46 Pate'tets yetpa' o'ch ahuanenet e'ñe parro Parets pa'paclo. Errotenopa' pueyerpueñoťet Jesús o'ch toma'ntachete't pan atet ñerra'm Jesús po'chets. Ñaña čhocmach rrallme'chapretanna'tete't pa'pacleto. E'ñe pocsheñeshet pueyočhretopa' čhocmach rrallme'chete't. Allempopa' nanac amuerañterret.

47 Ñaña čhocmach aye'chočhtatoñete't Yompor. Allohuen acheñenesha'pa' e'ñe cohuen entapretanete't ñeñĩ atet pete't. Pate'tets yet Yomporoťpa' čhocmach ame'ñachete't po'poñečhno acheñenesha'. Atteñapa' o' čha shonta ñeñĩcha' a'qeshpatarettatsa.

3

Atto Pedropa' a'crraterran ñeñĩ echarrtetsa

1 Pamťarrpa' čhap allempocma ma'yochenet Parets pa'paclo, atet ñerra'm allempopa' ñato' o' ellerrenmoch. Pedroñapa' ahuo' Parets pa'paclo epuet Juan, o'ch ma'yochoset all.

2 O'ña čhapuet allpa' a'tapocet Parets pa'paclo. Allempoña a'tapmochet allpa', allempocma huapachet ñaña puesheñarr ñeñĩ echarrtetsa pa'tcoť, ama eshcaye' chope'cheno. Allempoteñ eñalleta ama chope'cheno. Chocmach pamo'tsesha'pa' o'ch aneñet allecma be'tenet Parets pa'paclo. O'ch

na'nmet allotecma be'tosete't ñeñt otete't Ama Macohueno. Allñapa' allcha' enamare'tyen an quelle ñeñt be'tostse't Parets pa'paclo.

³ Ñeñña echarrtetsapa' entapan Pedro epuet Juan. Ñetpa'cho'ña be'tosmochet Parets pa'paclo. Ñañapa' enamapanet quelle.

⁴ Pedroñapa' alla o'chet cohue' epuet Juan. Allempoña Pedropa' atet otan ñeñt ama chope'chetso:

—Ñehua, pecua'y alla.

⁵ Ñeñña echarrtetsapa' alla e'ñe cohuanet, ñapa' otapañte' o'ch apet quelle.

⁶ Tarraña Pedroñapa' atet och:

—Napa' ama necheno quelle, tarraña ñeñt nechenpa' ñeñtcha'ña napañ. O'ch notañ, e'ñe po'partsoteño't Jesucristo ñeñt nazareto'marnesha' o'ch notañ, pechope'cherrepa'.

⁷ Pedroñapa' chete' potot po'cohuenrotpa' o' echañch. Allempocma corra'huenta pa'tco't, ama't all meya'nen yetacpa' o' corra'huenta poctacma.

⁸ Corra'huetsa pa'tco'tpa' pocsheño'tpa' omacha enonet, o' ten e'ñe cohuen. Allempoñapa' chope'ñe'chen. Ama't all chope'ñe'chen omachme'tetsa all aye'chochtatenan Yompor. Atteñapa' be'tos Parets pa'paclo epuet Pedro ñaña Juan.

⁹ Allohuen acheñenesha' ñeñt allo'tsa'yen, ñetpa'cho' enteñet atto pa'ye'chochtateñesha' Yompor all chope'ñe'chen.

¹⁰ Ñetpa' cheme'teñet añmapa' ñeñtara ñeñt anortse't allotecma be'tosete't Parets pa'paclo, ñeñt

otenet Ama Macohueno, allecma enamare'te't
 quelle. Ñetñapa' at'a cohuanrrorteñet.

*Atto Pedropa' serrpare'tatan acheñenesha'
 Parets pa'paclo*

¹¹ Añña ñeññ correrrtsapa' ama a'rroyen enter-
 rano Pedro ñaña Juan. Allempoña all tomchenet
 all oteñet Salomón Popellrraro. Acheñenesha'
 po'yorñotetpa' matrra'tet allo'tsen Pedro ñaña
 Juan ñaña ñeññ a'crraterr Pedro.

¹² Allempoña čhača'tet all tomchenetpa', añña
 Pedropa' otapanet, atet ot:

O'ch masheñe israelneshacha' notas, eso'marte'
 secuanrrorteneý. Čate' sotenapañ e'ñe'te'
 ya yehuamenco't yechope'čater, amapa'
 čate' sotenapañ e'ñe'te' ya, ya'cohuentateñot'
 yechope'čater. Añmapa' ama atteyaye.

¹³ Añña'ña o'ch notas: Añmapa' Yompor
 orrtatene' ñeññ o' sentua. Añña Yomporpa'
 ñeññara Po'yomporer pe't ama't Abraham ñaña
 Isaac ñaña Jacob, ñaña allohuen yatañneshañ.
 Yomporpa' e'ñe pocte' eñch o'ch cohuentatan
 Puechemer Jesús. Ñeñto'marña o' orrtatonas
 ñeññ o' sentua. Tarraña sa ñeññara Jesús pa'
 o' sepomhue. Ama't allempo Pilatopa' pocte'
 enteñeñ o'ch a'rroyereñ, tarraña sañapa' ča
 sa'nasotañpesya allohuenes.

¹⁴ Ama't ñeññ nanac Parets, ñaña ama't ñeññ
 e'ñe pocte' es pets, sañapa' ča sa'nasotañpesya.
 Allempo Pilatopa' ama't mueneñ o'ch a'rroyer,
 sañapa' aña sanañ ñeññ amtsañ ñeññča'
 a'rroyonaset.

15 Ñaña'pa' čhaña semtsach ñeñť alloch e'ñe yocrra. Tarraña ama't muetsetañpa' añña Pomporpa' o' alla tantater. Tarro'mar yapa' yeñoteñ yapa' yenter ama't allempo tantuerra.

16 Ya yeyemteñoť e'ñe Jesús o' correrra ñeñť ama chope'chetso ñorra'. Ama't sapa' señoteñ atto ahuañapa' ama chope'che'te. Tarraña te'pa' o' sender o' chopeñe'cherr. Yapa' o' yame'ñera Jesús ñeñť o' a'crrataterran ñeñť echarrtatse't ahuaña. Te'ña ama't sapa' o' sentuer allohuenes.

17 'Te'ña masheñneshacha' napa' neñotenes ahuaña sapa' ama es sečhapoyo seyočhro allempo semtsach Jesús. Ama't ñeñť sa'mčha'tareťernesha' ama es čapahueto pueyočhreto ñamet.

18 Tarraña ñeñť atet seřohua te'pa' o' etsoterra Yompor po'ñoñ. Tarro'mar allohuen ñeñť a'mtaye't Yompor po'ñoñpa' attecma otete't, ñeñťcha' Cristotats Partsocoppa' mueročhtachetcha' esempo. Ñeñťo'marña te'pa' o' etsota Yompor po'ñoñ ñeñť aquellcareť.

19 Ñeñťo'marña te'pa' añ poctetsa e'ñe sa sellquėñoťpa' o'ch soctape'cherr ello cohuen Yomporcop. O'ch sesuanom ñeñť ahuatoteñ soctapña. Attotcha' Yomporpa' e'shohuerrnascha' so'chñar.

20 Attochña separrocmateñoť epas Yomporpa' socsherrach seyočhro. Ñaña Yomporpa' o'ch alla mueñerrnaserr Cristo Jesús ñeñť anareťtatsa ñaña socop.

21 Tarraña te'pa' e'ñe pocte' allach pue'ntaño tarremphua esempohuañencha' a'poctatareťetua ora allohuen ñeñť atet eñose't Yompor ahuat.

Ama't ahuat Yomporpa' eñorana'tane't acheñ ñeñt e'ñe pocte' ente't Parets ñeñtcha' a'mte' po'ñoñ, ñeñtcha' etsoterrtsa esempohuañen.

²² Añmapa' ñeñt atet ote't ahuat Moisés: “Yompor Paretspa' orrtatonascha' ñeñtcha' a'pote' po'ñoñ, ñeñtara sa samo'tsna'tarotpa' orrtatonascha', atet ñerra'm na, Yomporpa' o' orrtaterren na namo'tsna'tarneshacop. Tarraña socoppa' añ poctetsa chocmach se'mñoter errotencha' oterres.

²³ Tarraña ñerra'm esesha' amach e'mñoterraye ñeñtcha' orrterrtsa, ñeñtña acheñerpa' ahuo'ch a'chencataretterrach. Pamo'tsesha'ña israelnesha'pa' amach allo'na entneñeto.” Añpa' allohua atet ote't Moisés ahuat.

²⁴ Alla oterrerr Pedro:

—Ama't allohuen ñeñt a'mtaye't Yompor po'ñoñ ahuatpa', eñosete't ñeñt o' etsotuerria te'. Ama't Samuel ñeñt a'mtaye't Yompor po'ñoñ ahuat, ñaña allohuen ñeñt allempoteñ a'mtaye't Yompor po'ñoñ, añña eñosete't ñeñt o' etsotuerria te'.

²⁵ Añña ñeñt a'mtaye't Yompor po'ñoñ ahuatpa' ñeñtara samo'tsna'tar sepe't ama't sa. Atet Yompor a'poctatan ñoñets ahuat satañneshacoppa' añ ñeñtara ñoñets attecma a'poctataretta ñaña socop. Atet ñerra'm ahuat atet otan Yompor sato' Abraham: “Ñeñt puesheñarrot pemrenño'tpa' norrtatanetcha' ñeñtcha' ama't allohuen pa'namen acheñenesha'pa' coshaprechetcha'.”

²⁶ Yomporpa' o' orrtatonay Puechemer o' mueñonay ñeñtfe'y judioneshay yanom. Allochñapa' ña o'ch coshaterrey nanac atet ñerra'm allempo o' cotape'chaterrey e'ñe cohuen,

ñaña allempoteñ o' yequeçhpa'huerr ñeñt ama pocteyaye Yomporecop.

4

Allempo anmet Pedro ñaña Juan allo'tsa'yen a'micha'taretnesha'

¹ Allempoña serrpare'tatenanet Pedro epuet Juanpa' machayoťa huacha'toña a'micha'taretnesha'. O' huapa cornanesha', huapa ñaña guardia pa'micha'tareter ñeñt cohuanpene' Parets pa'paquell. O' huapoña ñaña saduceonesha' ñeñt otets e'ñe ñet poctaṗñoṭpa' amach errotenoṭ yetanterro.

² O' huacha'tetpa' čha e'moñe'toset, tarro'mar Pedro ñaña Juanpa' añ serrpare'tatenan acheñenesha' atto ñerra'm e'ñe yame'ñera Cristo ama't yerroma, yame'ñeñoṭpa' yetanerrach.

³ Pa'tsrre'mueñoṭetpa' o' arrmarettet epsheño'maret, abe'tarettet cárcelo. Allempopa' o' ellerren ñeñto'marña tsapačach a'ṗto'tyesarettet errotenoṭte' serrpare'tenet atet.

⁴ Tarraña ama't atet aṗarettetpa' añña ñeñt e'mue' atet serrpare'tatanetpa' shonte' ame'ñyet. Allempoña ñeñt ame'ñetsa ahuaño huenpa' o' čhap allempo amnaroch mil ñeñt ame'ñatsa.

⁵ Tsapaṭñaapa' o' aṗča añcha'taretnesha' ama't ñaña ñeñt pompornesha' penet ama't ñaña ñeñt etsotene' ñoñets ñeñt atet anareṭ. Ñeñtpa' arr aṗchet e'ñe alla Jerusaléño.

⁶ Allempopa' allo'tsen ñaña cornesha' ñeñt nanac añcha'tareṭ ñeñt pa'so'cheñ Anás. Allo'tsen ñaña Caifás, ñaña Juan, ñaña Alejandro

ñaña po'poñechno añcha'taretnesha' ñeññ e'ñe pamo'tsna'tarecma cornesha' ñeññ nanac añcha'tareť.

⁷ Allempoña e'ñe apcha'huetpa' huapachet Pedro ñaña Juan e'ñe all apchena añcha'taretnesha'. Allempoñapa' a'p̄to'tarettet epsheño'maret. Ateť otanet añcha'tareť:

—Sapa' ¿esesho'tña po'huamencot o' sa'crraterña achenñ? ¿Eseshatña sapuene'ña llesens attot atet sepena?

⁸ Allempoña Pedro e'ñe ahuamencat puepeñoť Parets Puecamquẽña' atet otanet:

—Añcha'taretneshacha' ñaña ñeññes pompornesha' penet, te'pa' o'ch notas:

⁹ Sapa' atto sa'p̄to'teney erroteneťe' o' yeġa ya cohuen añecop ñeññ mueročhtetsa, ñaña atto sa'p̄to'teney errotenoťte' o' ya'crrater,

¹⁰ ñehua, te'pa' o'ch se'mñnoten attoch neñotatas sa ama't ñaña allohuen israelnesha'. E'ñe añ Jesucristo ñeññ nazareto'marnesha', ñeññña ña po'huamencot te'pa' arr ten e'ñe huomech, ñeññ ahuaña čha echarrtena. Añ ñeññtara Jesús sañapa' čhaña secorso'tam̄pes attoch rroma. Tarraña Pomporpa' o' tantater ama't rroma.

¹¹ Sapa' čha sottena atet ñerra'm achenñ ñeññ tomatene' pocoll. Ñeññña achenñ ñeññ tomatene' pocollpa' čha huapore'tan mapue' ñeññ nanac sherbets, țarro'mar ama es čhapahueto pueyočhro. Tarraña Jesúsapa' ama't atteñ ñerra'm mapue' ñeññ ahupore'tareť ñeññtara Jesús ñeññña nanac sherbets atet ñerra'm mapue' alloch orratet pocoll nanac echarr.

12 Po'psheñeñpa' ama eñalle alloch yequeshperra, tarro'mar ama eñalle po'psheñeñ ñeñt anaret ñeñtcha' yeçhore't attoch o'ch a'queshpatey. Ama't ora erracmañen aña patsro ama eñalle attoch yequeshperra, ñapñaña Jesús. Ñeñtpa' allohua atet otanet Pedro.

13 Añña Pedro ñaña Juanpa' ama pueñcha'nañofeye' eñoseto. Ama't mame-shapa' ama mecha'teneto. Allempoña amcha'tareteçhnopa' o' eñoçhet ama pueñcha'nañofeye' eñenetopa' ñetpa' atet otet:

—Errotenoçuaca'ye eñenetña atet. Yapa' yeñotenanet ñetpa' ama ayçhataretto attoch eñotet quelled huomenc. Ñetpa' atteta ñerra'm po'potantañ acheñenesha' ñeñt ama tama es eñotetso. Errotenoçuanaça'ye eñenetña atet ñerra'm ayçhataretet.

Allempoñapa' o' çhapanet pueyoçhro atto Pedro ñaña Juanpa' ahuaña çhocma chopeñe'che't epuet Jesús.

14 Añña ñeñt corrrertsapa' ñapa'çho' e'ñe alla ten allame'tets. Ñeñto'marña amcha'taretnesha'pa' ama errotenoç che'ptare'taneto.

15 Allempoñapa' mueñerranet a'yeneç. Allempoña amcha'taretnesha'pa' serrpare'tatanna'tet e'ñe ñañeñeta.

16 Atet otanna'tyeset:

—Errotenuachñaça' yeçpanetña te'te'. Ama't arr ora Jerusaléñopa' o' e'ñe eñotuareçtet atto ñetpa' ortatet ñeñt ama't yapa' ama yentare. Ñeñto'marña te' yapa' amach erroteno ya'nasochoña', e'ñe po'ñoçh atet.

17 Tarraña ama'tcha' ama erroť yeřanetopa' te'pa' añ poctetsa o'ch yeche'ptare'tyesanet o'ch yot Janet amach allo'na serrpare'tnenetoña ñeñť atet pena Jesús. Tarro'mar yapa' ama yemno allohuen acheñenesha' o'ch e'mare'tareťetuet ñeñť atet penet te' ñet arr. O'ch yot Janet ama't puesheñarra acheñ amach serrpare'tatatscheto.

18 Allempoñapa' alla agotareťterret. Atet otarettapuerret e'ñe eche'čharro, atet otet:

—Te'pa' amach seserrpare'tatatsto ñeñť atet pena Jesús, ama't e'ñe mamesha. Ñaña amach seyčhatatsto ama't mamesha atet yečhateť Jesús ahuaña.

19 Allempoña Pedro ñaña Juanpa' atet ot Janet:

—Ñehua, te'pa' o'ch soctape'ch sa, allotpa' o'ch sotey, erra'tsente' pocte' enten Yompor, ñato' o'ch yame'ñasa sa amapa' o'ch yame'ñya Yompor.

20 Yapa' amach erroťenot yemmo. Añña pocte' čhocmach ya'poťa ñeñť o' yentua ñaña ñeñť o' ye'mua.

21 Allempoñapa' atťa che'ptare'tuapuen Janet po'pocheño, allotñapa' a'rroyareťtenet. Ančha'tareťnesha'pa' ama't mueneñetañ o'ch castiganetañpa' tarraña ama erroťeno, tarro'mar allohuen acheñenesha'pa' e'ñe pocte' enteñet. Acheñenesha'pa' nanac aye'chočhtatoñet Yompor añecop ñeñť o' entuet atťo Yompor orrtat Janet po'partsoña.

22 Tarro'mar añ yacma ñeñť o' correrrapa' ñapa' o' pa'tatsoch čharra' po'charña.

Ñeñť ame'ñetsapa' atet pet allempo enamet Yompor po'huamenc

23 Allempoña a'rroyeret Pedro ñaña Juanpa' ahuanmuet allo'tsen ñeñt' parro ame'ñenet. Allempoña chapuet allpa' serrpare'tatosanet atet otanet ñeñt' pa'mcha'tareternesha' pen allohuen judionesha' po'cornaneshar ñaña ñeñt' pompornesha' penet.

24 Allempoña serrpare'tatuosetpa' ñetña allohuenet parropa' o' ma'yocheret Yompor. Puema'yochetpa' atet otet:

—Yompore, ñeñt' nanac Partsoḡ, ḡa ñeñt' yeḡcatue' enet ñaña ama't añ pats, ñaña ora erracmañen sa'p ḡa yeḡcatue', ñaña ama't ora esocmañen ñeñt' yentyen e'ñe alla e'ñe ḡocma peyeḡcatuar.

25 Ahuat yatañ Davidpa' nanac sherḡape't. E'ñe Pecamquēñot pe'ñorache't, ñeñt' mar atet ote't ña ahuat:

Errotenote' atsrre'muenaña po'poñ acheñenesha' ñeñt' ama ame'ñetso. Errotenote' o'pateñetña ama't Parets, ñeñt'pa' e'ñe orrena atet penet.

26 Ñeñt' amcha'tarettetsa arr patsro ñetpa' apchet attoch o'pachet Yompor, o'pachet ñaña ñeñt' llesensa' ñeñt'ara Cristo. Añpa' allohua atet ote't David ahuat.

27-28 Alla ma'yochereterr Yompor, atet oterreterr:

—Ñeñt' marña te'pa' po'ñoḡh o' etsota atto arr Jerusalēño o' apchet attoch o'patonapet Pechemer Jesús ama't ñeñt' e'ñe cohuen Parets penten ḡa, ñeñt'ña Jesús ñeñt' e'ñe cohuen pesherḡaye't ñeñt' e'ñe ḡo pellsensar. Atet ahuatoteñ e'ñe peñotuanete't ñetpa' o'ch etsotaterrnapet peñoñ

ateŧ ñerra'm Herodes, ñaña Poncio Pilato, ñaña po'poñechno acheñ ñeñŧ ama ame'ñetso, ama't ñaña israelnesha'. Tarraña ñeñŧ ateŧ o'pachetpa' te'pa' o' etsotuerra peñoñ.

²⁹ Ama't te'pa' Yompore peñoteney ñetpa' nanac mueneñet o'ch yore'tame'tyet yaña. Te'pa' o'ch yenamap̄ ahuamencat̄ pepa'yepa'ch ñeñŧey ŧorretsa p̄ocop attoch amach yemcha'tatsto. E'ñepa'ch huomencocma yeserrpare'tonaḡ peñoñ.

³⁰ Porrtatonayepa'ch pehuamenc attoch corra'huerra ñeñŧ atсна'tyets. E'ñe yečhore'teñoŧ Jesús porrtatonayepa'ch peparsoña, ñaña ñeñŧ ama yentare p̄orrtatanetcha' attoch eñochet p̄apa' ñeñŧep̄ nanac Partsoḡ—e'ñe yečhore'teñoŧ Pechemer Jesús, ñeñŧ e'ñe cohuen Parets penten pa, ñeñŧ e'ñe cohuen pesherbene'. Añpa' allohua ateŧ ma'yochet.

³¹ Allempoña ma'yochuetpa' allña apčhenetpa' o' pella ora all anorrčhenet. Allempocma allohuenetpa' o' chorraret Parets Puecamquëñ, attoch e'ñe huomencocma o'ch serrpare'toñet Yompore po'ñoñ.

Atto es apanna'tyesete't pame'ñeñoŧet Yompore

³² Allempoteñña ñet ñeñŧet ame'ñatsete'tpa' o' parrocmatuet e'ñe cohuen. E'ñe parra coḡap̄ñats anmuete't pueyočhreto ñeñŧ amuerañtetsa. Ama eseshaye' otatse'te ñeñŧpa' ñap̄ŧetach es o'patet, añña čhocma apanna'tyesete't ñerra'm esesha' es palltatse't.

³³ Jesús puellsensarnesha'pa' e'ñe po'huamencocmañen a'potoñete't atto tanterra

Yepartseshar Jesús. Yomporpa' nanac mueranete't, ñaña nanac ahuaencat' panete't.

³⁴ E'ñe ñeshetopa' ama esesha' es palltate'te. Añña ñeñt' allpon echyesete't po'patseñ, amapa' pa'paquëllpa' o'ch venda'yesete't. Ñeñña allpon gana'yesete'tpa' o'ch huapachet

³⁵ allo'tsen allsensaret'. Alloñña'pa' o'ch aposet ñeñt' allsensaret'. Allsensaret'ñapa' o'ch apa'yesan ñeñt' es palltate't.

³⁶ Añpa' ñeñt' atet' pe't puesheñarr añ pa'so'cheñ José, ñeñt' chipro'marnesha' ñaña ñeñtara levitana'tar. Añña ñeñt' allsensaret'nesha'pa' o' socheret José Bernabé. Añña so'chñets Bernabépa' ñeñt' otets yeñoño amuerañana'tar.

³⁷ Ñaña'pa' echane't allpon pats. Allempoñapa' venda'huepa' o' huapatan allpon quelle ñeñt' ganapa' o' aposan ñeñt' allsensaret'nesha'.

5

Atet' pa' Ananías epuet puetapor Safira

¹ Tarraña eñall po'psheñeñ ñeñt' atet' patse't po'poñ, ñeñt'pa' añ pa'so'cheñ Ananías epuet puetapor ñeñt' pa'so'cheñ Safira. Añña Ananíaspa' o' vendan allpon po'patseñpa'

² o' huapatan quelle, aposan ñeñt' allsensaret'. Tarraña ama oraye' huapatuano quelle çhach she-quënet. Tarro'mar ñet epuet puetaporpa' atet' a'pochtachet o'ch yoret allpon quelle e'ñe ñocpuet.

³ Allempoña aposan allsensaret' ñeñt' o' allponaña quellepa', Pedroñapa' atet' och:

—Eso'mare't pemnateñ oneñe't o'ch cotape'chatap' po'poñ peyoçhro. Papa' pemneñeñ

o'ch peshquëñ ama't Parets Puecamquëñ atto
 p̄apa' ahuo't peyorañ allpon quelle.

4 Ñeñt̄ pepatseñpa' e'ñe po'ñoçh ñeñt̄pa'
 p̄o. Tarraña ñerra'm ama p̄a muenatsñe o'ch
 pevendeñpa' ñeñt̄pa' e'ñe pocten. Ñaña ama'tcha'
 pevendeñpa' ñerra'm ama p̄a muenatsñe o'ch
 p̄apyeñ ora allpon quelle ñeñt̄ p̄agappa', ñeñt̄
 e'ñe pocten ñaña. ¿Errotenote'ña p̄octape'chña
 atet̄ peyoçhro? Ama yapteye' pemneñe o'ch
 peshca'yeñ, Yompore'naña pemneñeñ o'ch
 peshquëñ ñaña.

5 Allempoña Ananíaspa' ñeñta e'muapa'
 a'ataco'roche' e'ñe allpa' o' rroma. Añña
 po'potantañ acheñenesha' allempo e'mare'chetpa'
 nanac yorenet huomenc.

6 Añña yacmanesha' ñeñt̄ po'nare'pa' o' hua-
 puetpa' ñetñapa' e'patse'chet ñeñt̄ rromats o'
 anmet a'yo all pampueñeta'.

7 Tematenpa' o' huapa ñaña puetapor ñeñt̄ rro-
 mats. Ñapa' ama eñoteñe o'te' rroma puerrollar.

8 Allempo huapa Pedroñapa' o' a'p̄to'ta'p̄:

—Ñehua, p̄oten, ¿po'ñoçhte' allpona quelle sagap
 allempo sevenda'hua sepatsen'?

Puetaporñapa' atet̄ och:

—Allponaca'ye quelle ñeñt̄ yagap.

9 Pedroñapa' atet̄ otererr:

—Tarraña sapa' ahuo't sa'p̄octach epa'p̄ perrol-
 lareñ atet̄cha' se'pa. Cha't sotapañ ñato' o'ch se-
 shquëñ ñaña ama't Parets Puecamquëñ. Pecue'
 o' be'toscha'tuerrmoch ñeñt̄ o' pampa'huenna'pa'
 errte' perrollareñ. Papa'cho' attecmapa' an-
 mapetcha' a'yo.

10 E'ñe allempocma puetaporpa'cho'ña o'taco'ra ñaña e'ñe alla Pedresho, o' rroma ñaña. Allempo be'toscha'tuerr ñeñt anmue' puerrollareñ, allñapa' entuerrñañet puetaporpa'cho'ña o' rroma. Ñapa'cho'ña anmetpa' o' pampueñeta' a'yo epuet puerrollareñ.

11 Atarr mecha'na'tet allohuenet ñeñt pame'ñeñot apchetsa, ama't allohuen ñeñt e'mare'te'pa' cha yorenet nanac. Añpa' ñeñta allohua atet pa Ananíasoñ.

Atto Jesús puellsensarnesha'pa' orrtatete't Yompor po'partsoña

12 Añña ñeñt Jesús puellsensarpa' nanac orrtatete't Yompor po'partsoña, ama't ñeñt acheñenesha'pa' ama puentare attoch eñochet añmapa' Partsepa't. Añña ñeñt parro ame'ñenetpa' arr apchenet all ochete't Salomón Popellrraro.

13 Po'potantañ acheñenesha' ama't e'ñe pocte' eñchete't ñeñt ame'ñetsapa', allempoña ñet pueñchañotetpa' ama apcherreto parro.

14 Allempoñapa' allo'na atonetnena po'poñechno acheñenesha' ñeñt o' ame'ña. Shonte' o' ame'ñana Yompor, ama't coyaneshačno ñaña yacmaneshačno.

15 Añña ñeñt atsna'tyetspa' o' anmet a'yenet allecma chopeñe'chenet. Allñapa' o' panrra'tyesoset topantso, ñaña puesheña'tetspa' ñato' ora po'maye'na. Tarro'mar anmaretyeset allecma chopeñe'chenet allochñapa' ñerra'm mache' huena Pedropa' esheccha' ama't pa'choyeshe'ma po'poma'mteñapa' chapcha' ñesheto, ñato' attotpa' o'ch correrret.

16 Ñaña ama't allampañoñ Jerusaléñoñpa' huapatoñ acheñenesha' atsnañeñechno ñaña ama't ñeññ chorrena oneñet. Allochñapa' allohuenetpa' o'ch corra'huerret.

Allempo Pedro ñaña Juanpa' abe'tarettet cárcelo

17 Allempoñapa' ñeññ cornesha' ñeññ nanac amcha'taretpa' e'moñe'tan allohuen ñeññ ame'ñetsa. Ñaña allohuen ñeññ parro e'ñe attecmet cotape'chenet ñeññ otenet saduceonesha'pa' o' e'moñe'chet ñeññ ame'ñetsa. Tarro'mar sope'chapretenetña', acheñenesha'pa' e'ñe cohuen enteñet ñeññ ame'ñetsa.

18 Allempoña allsensareñnesha'pa' rromueñetpa' o' abe'tarettet cárcelo e'ñe allecma abe'teñet acheñenesha'.

19 Tarraña ama't abe'tarettetpa' tsapoñapa' o' huapanet Yompor po'millañoñeñer ñeññ huetsa pue'ntañoñ o' torañperranet, o' chapaterranet a'yenetpa' atet otanet:

20 —Añ poctetsa o'ch ahues Parets pa'paclopa' o'ch sa'tomos all o'ch seserrpare'tach allohuen acheñenesha' ora atet yocrrena etserra cohuen Partsocop.

21 Allempoña ñeñña e'mhuetpa' e'ñe ahua'tecma ahua'muenet Parets pa'paclo, o' be'toscha'toset, allña ye'chata'muenet.

Añña ñeññ cornesha' ñeññ nanac amcha'taretpa' o' chapa'muen ñaña ellonet allotcha' agotatan amcha'tareñnesha'. O'ch chapa'muen ñaña allohuen ñeññ cotene'. Allotcha' agotatan allohuen amcha'tareñnesha' ñeññ chocma a'poctatyene' ñoñets ñeññ pompornesha' penet

israelena'tarnesha'. O'ña čhačha'tuetpa' o' serrpare'tatanna'tet attoch a'pochtachet atetča' pet. Allempoñapa' o' agotachet ñeññ abe'tatenet cárcelo.

22 Tarraña allempoña čhap cárcelo ñeññ mueñenetpa' ama es entosetoña cárcelo. O' puerrreretpa' atet otueret añcha'taretnesha':

23 —Yapa' allempo yečhap cárcelopa' o' yentos cárcel e'ñe pochtacma echarr ayottam̄psaret, ñaña ñeññ cohuan̄pene'pa' alla tomčhenet allot be'tenet. Tarraña allempoña toretpa', o'ponoñapa' ama esesha' eñalle ama't puesheñarra.

24 Allempoña ñeñña e'mua añcha'taretnesha' ñeññ po'cap'táner penet ñeññ cohuan̄pene' Parets pa'paquell ñaña ñeññ pa'm̄cha'tareternesha' pen allohuen judionesha' po'cornanesharpa' ñetñapa' atet otet:

—Esocopte'ca'ye o' čha'nmačhenette'. Te'pa' errotuanencha' pette' tsapatonet.

25 Allempoñapa' huapa puesheñarr atet otosanet:

—Añña ñeññ sabe'tat ellerro cárcelopa' te'ñapa' alla tomčhenet Parets pa'pacillo yečhatetset all.

26 Allempoña añña capitán ñaña ñeññča' yempue'pa' o' ahuanmuet allo'tsen allsensaretnesha'. O'ña čhapuetpa' o' ahuananeta' e'ñe cohuenacma. Tarraña ama erroť paneto tarro'mar capitánpa' čha mecha'tenan acheñenesha'. Ñato' čho'te'rrolle'chet.

27 O'ña čapaterranetpa' nosanet e'ñe allo'tsa'yen ñeññ čhocma a'pochtatyene' ñoñets. Añña cornesha' ñeññ nanac añcha'taretpa' atet otanet:

28 —Ahuañapa' ama't e'ñe eche'charro yotuas amach seserrpare'tatsterrerro ñeñt poctaṗña Jesús. Tarraña sapa' ahuo't alla seserrpare'tatuerrerr ñeñt so soctaṗña. Ama't allohuen ñeñt yeçhetsa arr Jerusaléño o' alla seserrpare'tatuererr. Te'ñapa' allo' seyohuerryerr ahuo' yemtsach añ Jesús.

29 Allempoñapa' otanet Pedro ñaña ñeñt epuet, ñetñapa' atet ochet:

—Añña e'ñe pocte' amach acheña yame'ño, añña Yomporcha'ña yame'ña.

30 Sapa' o' sepata'pes Jesús tsacho attoña o' semt-satach. Tarraña Pomporpa' ña tantaterre'. Añpa' ñeñtara Yompor ñeñt Po'yomporer pete't ñaña ahuaṗ yatañneshañ.

31 Te'ña Pomporpa' o' nanac ahuañencaṗ pe', e'ñe po'cohuenroṗpa' all partsoten. Allochñapa' attoch coṗape'chaterran israelena'tarnesha' ñaña attoch coṗape'cherret cohuen e'ñe etserra attoch peretnerranet po'chñar. Ñeñto'marña Yomporpa' nan Jesús ñeñtcha' Ya'queshpatañer yepen.

32 Ñeñto'marña te'ña yapa' ya'poteññañ atet pena Yompor. Yompor Puecamquëñpa'cho'ña ñeñt eñotatets. Ñeñtara Puecamquëñ ñeñt nennay yeyoçhro, allohueney ñeñtey ame'ñenaya ña. Añpa' allohua atet otanet Pedro.

33 Allempoña ñeñta e'mhuet ñeñt atet ot Pedropa' añña añcha'tareñnesha' nanac atsrre'matanet, atarr mueneñetañ ahuo'ch muetsuet ñeñt allsensareñnesha'.

34 Allempoñapa' añña puesheñarr fariseo ñeñt e'ñe parro a'poctatyene' ñoñetspa' o' tomos

attoch eños. Ñeñt̃ tomosetspa' añ pa'so'cheñ Gamaliel, ñapa' ña ñeñt̃ yechatets ñoñets ñeñt̃ atet anaret, tarro'mar ñeñt̃ po'taruas pen. Ña allohuen acheñenesha'pa' e'ñe cohuen enteñet. Gamalielñapa' o' mueñatuerran allsensareñnesha' mame' a'yenet.

³⁵ Ñeñt̃ epuet cotape'chatannenetpa' atet otanet:

—Masheñe israelneshacha' o'ch notas: E'ñech cohuenacma ya'pochtach ñeñt̃ atetcha' yepanet.

³⁶ Sapa' ama't seyerpueñoña atto ahuaña o' orrta puesheñarr ñeñt̃ pa'so'cheñ Teudas. Ñapa' atarr muene't o'ch ayochreshatta. Shonto' acheñenesha' ñato' allo'tseno'te' cuatrocientos ñeñt̃ ame'ñata. Allempoñapa' allponmaterrerrpa' o' muetset. Ñeñt̃ña pueyochresha'pa' o' ahuanomyerret ñopa'ttsocmuet. Allempoñapa' o'huañ es cotape'chet.

³⁷ Allempoña allponmaterrerrpa' orrta ñaña po'psheñeñ ñeñt̃ pa'so'cheñ Judas ñeñt̃ galileo'marnesha'. Ñapa' tarrempo orrta allempo quellcatyenet pa'so'chñechno amcha'taretsho. Ñapa'cho'ña tama yochresha'tana allpon acheñenesha'. Allponmaterrerrpa' ñapa'cho'ña o' chenca. Aña ñeñt̃ pueyochresha'pa' o' parratse'tuerret.

³⁸ Ñeñto'marña te'pa' o'ch notas, o'ch sa'rroyer ñeñt̃ serrpare'tene' ñeñt̃ atet pena Jesús. Amach erro't sepatstaneto, tarro'mar ñerra'm e'ñe ñoñoteta pocta'pño't atet penetpa' ñeñt̃pa' mameshapa' o'ch huañerr.

³⁹ Tarraña ñerra'm pocta'pñetpa' Yomporesho't

huenapa' amach errotenoŧ sehuapore'tache. Ñato' sapa' čha se'moñe'teññañ ama't Yompor poctaŧña. Añpa' ñeññ atet otan Gamaliel añcha'tareŧnesha'.

40 Ateŧ coŧape'chatanet Gamalielpa' e'ñe pocte' eñchet. Allempoñapa' alla agotaterran allsensareŧnesha'. Allempoña huacherreŧpa' o' nalle'tatanet añcha'tareŧnesha'. O' nalle'tatuanet añcha'tareŧnesha'pa' allotñapa' otareŧtet ñaña e'ñe eche'čharro:

—Te'pa' amach seserrpare'tatsterrorro ñeññ atet pena Jesús. Allempoñapa' a'rroyareŧtenet.

41 Allempoñapa' o' ahuanenet, o' sa'neñet ñeññ čhocma a'poctatyene' ñoñets. E'ñe pocsheñeshocmañen ahuanenet ŧarro'mar Yompor e'ñe pocte' entanet ñeñño'mar muenatanet o'ch mueročhtet ñocop.

42 Allempoteñ pate'tets yetpa' čhocmach yečhatete'ŧ Parets pa'paclo ama't ñaña e'ñe alla pa'paclette. Nanac serrpare'tete'ŧ atto Jesúspa' ña Cristotats.

6

Arrpa' allempo net cančherrsheña ñeññcha' epatyesahuet rreñets

1 Allempoteñña' allo'na sen atonetnomtsa ñeññ ame'ñetsa. Tarraña e'ñe allempopa' o' sope'channa'tet. Ñehua, ŧarro'mar allempopa' atet pete'ŧ. Pate'tets yet Jesús pueyochresha'pa' o'ch apa'yesan allohuen rretorrnanesha' rreñets ñeññ pallta'yesatse'ŧ rreñets. Ñeññ e'muene' griegačhpa' ñetpa' atet otyeset:

—Ñeñt̃ yamo'ts rre'torrnanasha'pa' ñetpa' ama allponeshacmaye' rreñets agapueto allpon agapyes ñeñt̃ e'muene' hebryach. Yamo'ts rre'torrnanasha'pa' coñe'ta agapyeset. Ñeñt̃ña rre'torrnanasha' ñeñt̃ e'muene' hebryachpa' shonte' rreñets agapyeset. Attoñña sope'channa'tet.

² Allempoñapa' ñeñt̃ çharrasheña puechena epa ñeñt̃ara Jesús puellsensarpa' ñetñapa' agotatuet allohuen ñeñt̃ ame'ñetsa. O'ña apçha'huetpa' atet otarettapuet:

—Yapa' ama tama pocteye' yenteñe ama't mameshapa' o'ch ya'rroya serrpare'te' Yompor po'ñoñ. Shonte' yet ya'pertaten attoch yapa'y es allohuen rre'torrnanasha' rreñets.

³ Añña pocte' masheñeshacha', o'ch se'ñ cançherrsheña ñeñt̃ara ñeñt̃ey ame'ñetsa arr parro—erra'tsente' cohuen acheñ senten ñaña ñeñt̃ chorrena Parets Puecamquẽñ ñaña ñeñt̃ atarr eñotene' ñeñt̃ cohuentetsa Yomporecop. Añ ñeñt̃ara cançherrsheña ñeñt̃cha' po'taruas pet attoch epatyese't ñeñt̃ pallta'yetsa rreñets.

⁴ Allochñapa' yapa' añach yema'yoçhra ma'yochatsa ñaña o'ch ya'potoñ Yompor po'ñoñ. Ñeñt̃ach paterr yetorrena. Ate't otanet Jesús pueyochresha'.

⁵ Allempoña acheñenesha'pa' e'ñe pocte' eñchet allohuenet. Allempoñapa' o' neñet Esteban ñeñt̃ nanac ame'ñetsa ñeñt̃ e'ñe chorrena Parets Puecamquẽñ. Allotpa' neñet ñaña Felipe, ñaña Prócoro ñaña Nicanor ñaña Timón ñaña Parmenas ñaña Nicolás ñeñt̃ antioquio'marnesha' ñeñt̃ ahuatoteñ ame'ñate't judionesha'.

⁶ Añña ñeññ cancherrsheña acheñpa' o' ahuapatarettet allo'tsen Jesús puellsensarnesha'. Añña allsensareñnesha'pa' allenta ma'yocham pesyet, o' net pot ñesheto, atet otarettet ñeññcha' po'taruas pet.

⁷ Allempoñapa' o' e'ñe epa'hua Yompor po'ñoñ ora. Allempoñapa' allo'na sen shonta'nmatsa ñeññ ame'ñetsa all Jerusaléño. Allempopa' shonte' judionesha' po'cornaneshar ame'ñatsa.

Allempo rromuet Esteban

⁸ Añña Estebanpa' Yompor pomuereñoñpa' nanac amueraña. E'ñe Parets po'huamencoñpa' orrtatanet ñeññ ama puentareto atto eñochet añmapa' po'ñoñ Parets po'huamencoñ orrtena.

⁹ Allempoñapa' puesheña'tets judionesha' o' achmeñet Esteban po'ñoñ. Añña judionesha' ñeññtara oteñet libertinanesha'. Ñetñapa' alla apchenet po'prahuo. Ñaña po'potantañ judionesha' ñeññ huetsa Cireneoñ ñaña Alejandríoñ ñaña Cilicioñ ñaña Asioñpa' —ora allohuenetpa' e'ñe parrocmá achmñare'toñet Esteban po'ñoñ.

¹⁰ Tarraña Estebanpa' nanac es eñot atto serrpare'ten. Ñetpa' ama erroñenoñ anapeto. Estebanpa' añ chorraye't Parets Puecamquëñ, ñeññto'marña ama erroñenoñ anapete'te.

¹¹ Allempoñapa' tsa'chet po'potantañ acheñ añecop attoch toma'tatoñet Esteban po'ñoñ. Ñeññ atsa'tareñpa' atet otet:

—Yapa' o' ye'mñ Esteban añ achmñare'ten Moisés po'ñoñ ama't ñaña Yomporpa' achmeñ. Atet toma'tatoñet Esteban po'ñoñ.

¹² Allempoña acheñenesha' atet e'muetpa' o' e'moñe'chet Esteban. O' huapa ñeñt pompor-nesha' pen judionesha', huapa ñaña ñeñt et-sotene' Moisés po'ñoñ. Huapapa' o' rromueñeta' Esteban o' anmet añcha'tareñeshesho allecma a'pocatenet ñoñets.

¹³ Chapuet allpa' alla toma'tatuerrñañeterr Esteban po'ñoñ, atet otoset:

—Añ Estebanpa' chocma achmāre'tenan Parets pa'paquëll ñaña chocma achmāre'tenan Moisés po'ñoñ.

¹⁴ Alla oterreterr ñeñt atsa'taret:

—Yapa' o' ye'm Esteban atet oten añ Jesús ñeñt nazareto'marnesha'pa' o'ch a'matam̄psey Parets pa'paquëllpa' o'ch huapore'tatonay atet yechatye't Moisés.

¹⁵ Allempoñapa' allohuenet ñeñt allo'tsa'yen o' cohuanrrorchet Esteban. Tarraña o' eñchet e'ñe cohuen orrtena pa'clloyot atet orrtena ñerra'mrrate' Yompor po'millañoñeñer ñeñt huetsa entot.

7

Atto Estebanpa' serrpare'tatan añcha'tareñesha'

¹ Allempoñapa' añña cornesha' ñeñt nanac añcha'taretpa' a'p̄to'tan Esteban, atet och:

—¿Po'ñocha't atet?

² Estebanña'pa' atet och:

—Ñehua, masheñeshacha' allohuenes nompor-neshacha' o'ch se'mñoten, o'ch notas ñeñt atet pa'yese't ahuat yatañneshañ. Ahuatpa' Yompor ñeñt nanac Paretspa' orrtane't yatañ Abraham

all anetso Mesopotamia. Allempopa' ama čhena' Haráno allcha' yečherra.

³ Allempo orrtana Abrahampa' atet och ñeñtcha' atet pa: "Te'pa' o'ch ahuep arrot o'ch pesa'nom añ peney, o'ch pesa'neñ ñaña pamo'tsesha', o'ch ahuep allcha' notap." Atet och Yompor, atetcho' pa yatañ Abraham.

⁴ Allempoñapa' a'ypo'ña'nman all yeche't all yečhanate't ñaña caldeo'marnesha' atto chap allo'tsen anets Harán all yečherra. Allempo o' rroma pomporeña' Yomporpa' o' alla anererr arrma Canaáno all yeyčhena ya te'.

⁵ Tarraña allempo chap arr ahuatpa' Yomporpa' ama apueña' añ pats, ama't coñe'ta. Tarraña Yomporpa' ahuo't och esempohuañen o'ch ap añ pats, e'ñe ñocop, ama't puechemerecop, ñaña po'mñrenecop. Tarraña allempopa' yatañ Abrahampa' ama chemere'tena'.

⁶ Allempocma Yomporpa' o' eñotatan Abraham attoch esempo po'mñreneña' ahuanmuetcha' arrot, chapuetcha' po'poñ anetso Egipto all ama pa'nyempañooyaye, allcha' yeča'huerret, allña'pa' mueročhtatapanetcha' allo'marnesha' acheñ. Ñaña añ eñotatan Abraham attoch ataruasatare'tach e'ñe atta po'mñreneñ, e'ñe cuatrocientos char amueročhtatare'tet.

⁷ Tarraña Yomporpa' o' eñotatan Abraham ñaña po'poñ. Ahuo't och Yompor: "Tarraña napa' netsa'taterach ñeñtcha' mueročhtate' pemñreneñ. Allempoñapa' huačherretcha' alla arr Canaáno allcha' ma'yocherrnet."

⁸ Ñaña allempo Yomporpa' ahuo't otan Abraham po'poñ ñeñtcha' atet yeča' judionesha'

allempoteñ errponohuañen, attoch eñochet Yomporpa' ama pueno po'ñoñ. Añmapa' ñeñt atet otan Abraham: "Añ pocte' o'ch setsorre allohuen asheñorroñtollesha'." Ñeñto'mar allempo chemere't Abrahampa' puechemeretoll ñeñt soch Isaacpa' ahuo't tsorreñ. Po'psocmatñopa' o' tsorre. Isaacña' allempo o' po'npa' o' chemere'tana Jacob. Jacobña' chemere'tana çharrasheña puechena epa ñeñtara yatañneshañ yepen ya ñeñtey israelena'tarey.

9 'Tarraña allempopa' añña ñeñt yatañneshañ yepenpa' o' sope'cheñet pa'mo'nasheñ José. Ñeñto'marña o' pomet pa'mo'nasheñ. Ñeñtña agapue'pa' o' aneñ ðachayo all anets Egipto.

10 Tarraña Yompor ña a'nataya. Yomporpa' o' a'pocatuoñ ora allohuen atto mueroçhtachete't. Añña ñeñt añcha'tarettatset Egiptopa' e'ñe cohuen entane't José. Añ ñeñt añcha'tarettatset Egipto ñeñtpa' oteñet Faraón. Faraónpa' eñotan José ñapa' nanac es eñoten. Ñeñto'mar añcha'tare't Faraónpa' o' nan José ñeñtcha' añcha'tarettapretaya all Egipto. Ñaña ora allpon ñeñt taruaset Faraón pa'paclo'marpa' o' nan José ñeñtcha' yechenahuet.

11 'Allempoñapa' orrta muecheñets. Ora allohuen egipto'marnesha' nanac cheporrare'tet. Ñaña ora allohuen canaáno'marnesha'pa'çho'ña nanac cheporrare'tet. Pa'chporrño'fetpa' nanac mueroçhtete't. Yatañneshañpa' ama echete'te pocrramet ama't coñe'ta.

12 Allempoñapa' yatañ Jacobpa' o' e'mare'tan

orameñ rreñets Egipto. Ñeñto'marña mueñan puechemerasha' ñeñtara yatañneshañ yepen ya. Ñetpa' o' ahuanmuet Egipto o'ch rañteneta' rreñets.

¹³ Rañta'hueneta' rreñetspa' o' puerraçherret. Atomatpa' o' huañaperret pocrañpa' o' alla ahuanerretter Egipto. Allempoña çhaçherretter Egipto pa'mo'nasheñet Josépa' atet otanet ñapa' ñaña pa'mo'nasheñ penet. Allempoñapa' o' cheme'chet pa'mo'nasheñ José. Pa'mo'nasheñña' o' anmanet añcha'taretesho attoch cheme'tatanet.

¹⁴ Cheme'tatuanetpa' allempoña Josépa' o' mueñerranet pa'nyeto añecop attoch ereta' pompor Jacob ñaña allohuen pamo'tsesha', atet ot José: "Onetepa' allohuenet Egipto." Ñeñto'marña allohuen cançhrroch çcharra' puechena amnarsheña pamo'tsesha' ñetña'pa' ahuanmuet Egipto allo'tsen José.

¹⁵ Allempoñapa' çhaçha'tet Egipto. O' met allpon charpa' o' rroma yatañ Jacoboñ all Egipto. Metererr allpon charpa' o' colla'hua ñaña puechemerashañ ñeñtara yatañneshañ yepen. Colla'huetpa' alla apamparettet all Egipto.

¹⁶ Ñehua, meterrerr allpon charpa' o' ahuanmaretterret puenpa'ts anetso Sicño allcha' apamparetterret ello puenpa'ts. All apamparetterretpa' ñeñtpa' ñeñtara pats ñeñt' o' rañta'hua Abrahamañ ahuañ. Añña patspa' ñeñto' vendoñ Hamor puechemerashañ ahuañ all Sicño.

¹⁷ Alla oterraneterr Esteban, atet ot:

—Allponerrerr charpa' çchapmoch allempo o'ch etsota atet Yomporpa' otaneñ ahuañ Abraham

allempto huomenc nane't po'ñoñ. Ñetpa' allempto nanac merete't all Egipto.

18 Atteñapa' o' met shonte' charpa' o' orrta po'poñ añcha'tare't Egipto ñeñt ama puentarano José, tarro'mar Josépa' ahuatoteñ o' rroma.

19 Añña añcha'tare'tpa' nanac mue-rochtatyesonay yatañneshañ. O' nanet ñoñets attoch pamo'mtayetpa' o'ch a'ypo'ñet puechemeretoll a'yo. Añnepo'ch atet peñet attoch muetsatachet puechemeretoll. Allochñapa' amach nanac mereto.

20 E'ñe allemppopa' o' eñalleta Moisés tarraña Yomporpa' e'ñe cohuen entane't Moisés. Pamo'mte'pa' e'ñe a'nahua cohue' ma'pña arrorr all pa'paclo.

21 Allempoñapa' o' chap allempto amach er-roteno cohueñeto pa'paclo a'nahua. Allemppopa' a'ypo'ñet a'yene't. Añña añcha'tare't Faraón po'señpa' ahuo' huapa all neñet ahuo' entos, nanac amuerochen eñch, allenta aner attoch ñañrecha. Atteñapa' o' atarrtach pa'paclo atet ñerra'm puechoyor e'ñe ño.

22 Ñeñto'marña Moiséspa' ay'chataretta ora allpon ñeñt atet eñotyese't egipto'marnesha'. Nanac eñotañte't ñerra'm allempto eñose't, nanac eñotañte't ñerra'm allempto es pa'yese't.

23 'Allempto chap pa'tatsoch charra' po'charña Moiséspa' nanac yerpane't pamo'tsesha' ñeñtara israelena'tarnesha'. Atarr seche't o'ch abchenaneta'. Allempoña parrochpa' o' ahuo' allo'tsa'yen pamo'tsesha'.

24 O'ña chap allpa' all entosan puesheñarr egipto'marnesha' nanac coñchatenan puesheñarr

israelena'tar. Ñaña'pa' o' moñsosana pamo'ts. O' chote huomencpa' cha rroma. Atfo chemnatanaña pamo'ts.

²⁵ Añña Moisés'pa' otapañ pamo'tsesha'pa' e'ñech cohuen entapet. Otapañ o'te' eñochet Yompor mueñe' atfoch a'queshpatan pamo'tsesha'. Tarraña ñetpa' ama eseshaye' pocte' entaye.

²⁶ Tarro'mar tsapañña'pa' alla ahuenerr, allempopa' o' entuenanerr epsheña pamo'tsesha' cho' orrotenet e'ñe ñañeñeta. Ñaña'pa' mueneñ o'ch amo'tstaterranet, atet otanet: “Esuañaca' masheñeshacha' sottenña arr. Añña pocte' e'ñech semo'nasheñ sepannena.”

²⁷ Ñeñt chetene' pamo'tspa' o' a'mchech Moisés'pa' ñaña'pa' atet ot: “Esesha'huañaca' peneneña pa' añcha'tareñ arr yocop. Esesha'huañaca' potene' o'ch pa'tsrre'moçhta arr.

²⁸ Nato' añte' pemnen o'ch pemtsan naña atet pepe' muetse' egipto'marnesha' ellerro.”

²⁹ Allempoña o' e'man añ ñoñets Moisés'ña'pa' o' yeta puenchañoñ. O' ahuo' a'yo allo'tsen pats pa'so'cheñ Madián. O' yeçha'huerra allapar. Allña'pa' all sena'tapa' o' chemere't epsheña.

³⁰ O' alla oterraneterr Esteban, atet ot:

—Allempoña'pa' o' meterrerr pa'tatsoch çharra' char. Parrochpa' amaraño'tsen Moisés allame'tets aspeno Sinaipno. Allña'pa' entosan tsachmatoll all ñoña huorten. E'ñe huortot tso'pa' allot orrtoña Parets po'mllañoteñer.

³¹ Ñeñt entos Moisés'pa' atet ot: “¿Ešte' huortetsña tarro?” E'ñe çhapatsa allame'tets o'ch enteña'pa' o' e'man ñoñets. Partsepa't eñets, atet och:

32 “Napa’ ñeñten Po’yomporer pen ama’t patañneshañ ñeñtara Abraham ñaña Isaac ñaña Jacob.” Moiséspa’ čha yoren. Puenčhañoťpa’ ama cohmano huorte’.

33 Yomporñapa’ atet otererr: “Penčha’na’teñōťpa’ perrote’t pesapat țarro’mar all patenpa’ ñeñťpa’cho’ nanac Parets țarro’mar allo’tsenen na.”

34 O’ alla otererr Yompor: “Napa’ nenteñ atto mueročtatennanet ñeñť nechemeresha’ nepen ñeñtara israelena’tar. Napa’ ne’muenanet atet yahuanrrortenet. Ñeñto’marña te’pa’ o’ nohuapa o’ch na’qeshp̄atanet. Te’ñapa’ o’ch nemñaṣ p̄a Egipto.” Añpa’ ñeñta atet otan Yompor Moisés.

35 ‘Añña Yompor po’millañoťeñer ñeñť orrtetsa all huorten tsachmopa’ ñeñťña eñotate’ Moisés atet muenen Yompor. Ñeñto’mar yeñoteñ Yomporpa’ ahuo’t llesensan Moisés o’ alla mueñer pamo’tseshesho ñeñťcha’ añcha’tarettatsa ñocpuet ñaña ñeñťcha’ a’qeshp̄atahuet alloť amueročtataretete’ť. Añ ñeñtara Moisés ñeñť ama pocteye’ ento ahuaña pamo’ts ñeñť otet ahuaña: “Esesha’huañaca’ penene’ p̄a añcha’tareť arr yocop. Esesha’huañaca’ p̄otene’ o’ch p̄a’tsrre’močhta arr.”

36 Añ ñeñtara Moisés ñeñť anerrahuet Egiptoť. Ñeñtara Moiséspa’ orrtatanet ñeñť ama puentareto all Egipto. Ñaña sa’poť ñeñť Tsasasen all orrtatanet ñeñť ama puentareto, atto eñotatanet añmapa’ ñeñť atet pena Parets. Ñaña all chopeñe’chen amarato’mar pa’tatsoch čharra’ char Moiséspa’ all orrtatyesanet ñeñť ama

puentareto. Añpa' ñeñt' eñotatanet atet penaña Parets.

³⁷ Añ ñeñtara Moisés ahuatpa' o' otan israelnesha' atet: "Yomporpa' orrtaterrnascha' puesheñarr ñeñtcha' a'mterre' Parets po'ñoñ, ñeñtara ñeñt' e'ñe samo'ts sepen e'ñech attecma orrtaterr e'ñe atet orrtatenen nama. Ñeñtcha'ña chocma se'mñoterrña sa."

³⁸ Ama't allempo yatañneshañ chopeñe'chete't amaratareropa' añña Moisés allo'tseneta parro ama't allpa' chocmach apchete't Yomporecop. Ñapa' allo'tsena aspeno Sinaíño allempo orrtoña Yompor po'mllañoñeñer ñeñt' eñorana'taya ñaña o' yeçhach ñoñets alloch e'ñe yocrra Part-socop. Ñeñtña ñoñets allempo puerrerra Moisés aspenotpa' o' yeçhatuerran ñaña pamo'tsesha'.

³⁹ 'Tarraña ama't atet pe't Moiséspa' yatañneshañpa' ama muenete'te o'ch ame'ñyet Moisés. Ama eseshaye' pocteye' entaye'te. E'ñe pueyoçhretopa' atarro' muenete't o'ch alla puerreret Egipto.

⁴⁰ Ama't allempo aspeno'tsen Moiséspa' yatañneshañpa' atet otoñet pa'mo'nasheñ Aarón: "Te'pa' o'ch peyeçhcatonay ñeñtcha' yeyoser yeperr ñeñtcha' yanerre' alla Egipto. Añ Moisés ñeñt' yanmue' Egiptotpa' yapa' ama yeñoteñe, ta', ¿errate' o' ahuo'?"

⁴¹ Allempoñapa' o' yeçhcatanet ñeñt' atet ñerra'mrrate' añ ayeçhcataret oro. O' muetset carrnero o' neññañeta' e'ñe ñesho. Nanac cohuen entet ñeñt' yeçhcatet e'ñe potot.

⁴² Allempoña Yomporpa' o' a'ypo'ña'nmanet, o' muenatanet attoch muechatse'tet ñeñt'

yeçhoyo'tam̄pene' ama't arrorr ñaña ranto. O' pet atet quellquë't ñeñt a'mtaye't Yompor po'ñoñ ahuat. Añmapa' ñeñt quellquë't ahuat, atet ñerra'm Yompor otets:

Napa' o'ch notas israelena'tarneshacha', ama't o' semtsa carrnero, amapa' huaquësh, tarraña ama nocpaye' semtso, ñeñtpa' ama neshoye' sehuapache. Ama't ora añ pa'tatsoch çharra' char all sechopeñe'chen amaratarero atet es sepa'yen.

43 Añ seyomporer sepen po'poñ, ñeñt ayeçhcataret ñeñt soten allo' yeçhena seyoser ñeñt sesochen Moloc. Amapa' atet ñerra'm ayeçhcataret rantoma't ñeñt soten añmapa' seyosro' ñeñt sesochen ñaña Refán. Shonte' ayeçhcatareteçhno ñeñt seconcorpana'tena. Ñeñto'marña te'pa' o'ch nemñas nanac allapar, all Babilonio. Añpa' allohua ñeñt atet quellquë't ahuat ñeñt a'mtaye't Yompor po'ñoñ.

44 O' alla oterraneterr Esteban, atet ot:

—Ahuat yatañneshañpa' allempo chopeñe'chete't amaratareropa' anmuete't pocoll shetamtsopo' allecma apçhete't Yomporecop. O'ponopa' all nete't mapuettall allo' aquellcare't ñoñets ñeñt poctetsa Yomporecop. Añ pocoll shetamtsopo' Moiséspa' ña yeçhcataye't e'ñe atet oche't Yompor po'mllañoñeñer e'ñe atet gache't Yompor.

45 Allempo rromanom Moisés puechope'chpayopa' o' na'nmet Josué ñeñtcha' anmue' yatañneshañ. Apa'nmet ñaña shetamtsopo' ñeñtña' çhapachet allo'tseno'

pats ñeñt otanete't Yompor ahuatoteñ o'ch apanet. Po'poñ acheñenesha' ñeñt yeçheta allpa' Yomporpa' o' muevo'tuerranet attoch yatañneshañpa' o'ch yeçha'huerret all. Allempopa' o' çapatet all shetamtsopo' allecma apçhenet Yomporecop. Shetamtsopahuopa' allecma apçhete't tarremphua allempo orrta David.

⁴⁶ Allempo orrta Davidpa' ñapa' e'ñe cohuen enteñ Yompor. Ñaña'pa' o' enaman Yompor pocte'te' enteñ o'ch yeçcatoñ pa'paquëll ñeñt e'ñe cohuen echarr. Mueneñ o'ch yeçcatan Yompor pa'paquëll, ñeñtara Po'yomporer pe't ñaña pa'tañ Jacoboñ.

⁴⁷ Tarraña ama't mueneñeñ ñapa' Yomporpa' ama mueno. Aña muenatoñ puechemer Salomón, ñach tomate' pa'paquëll.

⁴⁸ Tarraña Ñeñt nanac Paretspa' ama yeçheno pocollo ñeñt yeyeçcaten ya, arromña'tey. Ama't atet ote't ñeñt a'ñtaye't Yompor po'ñoñ, atet ñerra'm Yompor eñets, atet oten:

⁴⁹ Napa' nanac Partson. Napa' nenten enet atet ñerra'm neconañ, patsña'pa' nenteñ atet ñerra'm allcha' nenen netac. Errotenohuachña' seyeçcatonña pocoll allcha' neyçha. Ama nepallteno allcha' neyçha, atet oten Yompor.

⁵⁰ Napa' nehuamenco't neyeçcatua ora allohuen ñeñt sentyen. Aña'pa' allohua atet ot Yompor.

⁵¹ Alla oterraneterr Esteban:

—Sapa' nanac se'charrtena, seyoçhropa' ama soçtape'cheno atet ñerra'm Yomporena'tares. Ama semno o'ch se'mñoñoñ Yompor po'ñoñ.

Chocma satpare'teññañ Parets Puecamquëñ. Atet pe't satañneshañ ahuat te'pa' atet'cho' sepena saña.

⁵² Ama't allohuen ñeñt a'mtaye't Yompor po'ñoñ ahuat satañneshañña'pa' cha muerochtatyesanete't. Ama't ahuat allempo ama orrtena' Jesús'pa' ñeñt a'potaye't atto esempohuañen o'ch huapa Cristo ñeñt e'ñe pocte' es pets, ñeñtpa'cho'ña satañneshañpa' cha muetse. Te'pa'cho'ña añ Cristo ñeñt e'ñe pocte' es petspa' ahua' seponi saña attoch semtsach.

⁵³ Alla oterraneterr Esteban:

—Ama't Parets po'mllaño'teñer ñeñt seño'tate' ñeñt poctetsa Yomporecop sañapa' satpare'toñ Yompor po'ñoñ. Añmapa' allohua ñeñt atet serpare'tatanet Esteban.

Allempo muetset Esteban

⁵⁴ Allempoña ñeñta e'mhuet atet ot Estebanpa' nanac atsrre'matanet. Pa'tsrre'mueño'tetpa' cha rraso'tyeset pa's.

⁵⁵ Allempo Estebanpa' e'ñe chorreña Parets Puecamquëñ. Ñaña'pa' o' cohua' enonet, allña'pa' all entan Yompor po'cohuenña. Entan Jesús e'ñe po'partsoteño'f all ten Pompor po'cohuenrot.

⁵⁶ Allempoñapa' oterrr Esteban:

—Napa' o' nent enet atoraret. O' nent ñaña allo'tsen Ñeñt Acheñetosets, po'partsoteño'tpa' all ten Parets po'cohuenrot.

⁵⁷ Acheñenesha'ña pa'tsrre'mueño'tetpa' rranare'tet. Puerranare'teño'tetpa' mopaqueta'tyeset, o' matrra'tet ñesho attoch o'ch rromuet.

58 O' rromuetpa' o' anmet a'yenet all ama eñalle pocoll allcha' rrolle'chet. Ñeñtcha' rrolle'te'pa' o' rrorrra'tyeset pa'shtam, o' na'yaset e'ñe allo'tsen puesheñarr yacma ñeñt huepueshameñ ñeñt pa'so'cheñ Saulo.

59 Allempoñapa' rrolle'chet. Rrolle'chetpa' Estebanñapa' o' ma'yochapa', atet ot:

—Nepartseshare Jesús, ñagaponcha' necamquẽ.

60 Allempoñapa' concorpa. Concorpapa' eñora huomenc, atet ot:

—Amach Nepartseshare petsa'tatatstaneto.

Allempoñapa' ñeñta otuapa' o' muechecha, o' rroma.

8

Allempo Saulopa' nanac mueneñ ahuo'ch a'cclatuan ñeñt ame'ñetsa

1-2 Allempopa' añña Saulopa'* e'ñe pocte' eñch muetsetepa' Esteban.

Añña puesheña'tets ñeñt nanac ame'ñenaya Yomporpa' puellquẽñeshetpa' o' huapuet, o'ch eñeta' arromñañ attoch pampueñeta'. Nanac ya'na'teñet Estebanañ. Allempoteñ nanac muerochtachete't ñeñt pame'ñeño'tet Cristopa' apçhete't Jerusaléño. Ñeñto'marña shonte' acheñenesha' ñeñt yetrra'tatsa po'poñ añetso'mar. O' parratse'tuet allemeña—Judeo'mar ñaña Samario'mar. Tarraña añña Jesús puellsensarnesha'pa' ama esesha' yetatso ama't puesheñarra.

* 8:1-2 Saulopa' ñeñtara Pablo.

³ Sauloñapa' nanac mueneñ o'ch a'cllatuan allohuen ñeñt ameñetsa. O'ch be'tosam̄psanet pa'pacletopa' o'ch rromanet, o'chcho' chetare'tnerranet. O'chcho' be'tosuerrerr ñaña po'ppauñopa' o'chcho' rroma'huerraneterr; o'chcho' chetare'tnerraneterr, o'ch anmanet cárcelo allcha' abe'tatuanet. Ama't coyane-shachno e'ñe abe'tatuanete't cárcelo.

Atto Felipepa' serrpare'tatanete't Samario

⁴ Añña ñeñt yetrra'tatsa Jerusaléño'tpa' all chapyeset, erra ta'yenetpa' allcha' serrpare'teññañet Yompor po'ñoñ.

⁵ Ate't ñerra'm Felipe. Ñapa' o' ahuo', o' chap anetso ñeñt pa'so'cheñ Samaria. Allñapa' all serrpare'tatosanet añepa't Cristotats ñeñtara Jesús.

⁶ Felipepa' orrtatanet ñeñt ama puentareto. Ate't eñchetpa' o' eñochet añpa' po'ñoñch Parets po'huamenc orrtaten. Ñeñto'marña allohuen acheñenesha'pa' e'mñoteñet e'ñe cohuen atet otanet.

⁷ Shonte' acheñ ñeñt chorra'yese't oneñe't allempopa' e'ñe quechpatyesueretña oneñe't atto chorrenana acheñ. Allempo quechpatyesueret oneñe'tñapa' o'ch rranare'tnoma. Ñaña shonte' acheñ ñeñt echarreyestse'tpa' o' corra'huerret. Ama't ñeñt checare'payestse'tpa' o' a'crratyesuaherranet Felipe.

⁸ Ñeñto'marña nanac coshyete't Samario.

⁹ Allempopa' allo'tsen puesheñarr ñeñt achyo'tañ ahuaña ñeñt'pa' añ pa'so'cheñ Simón. Allohuenet samario'marnesha' ama't ahua'toteñpa' cohuanrrortoñete't atet orrtate't

ñeññ ama puentareto. Ñapa' o'ch shequënanet. Ñetñapa' cha otenapuetañ ñapa' nanacte' po'ñoçh ahuamencat, atet oten ña.

10 Allohuen acheñpa' e'mñoçhete't atet ote't ahuaña—ama't ñeññ am'cha'tarettetsa ñaña ñeññ ama esoshe'mayaye acheñ. Ochete't:

—Po'ñoçh añ acheñpa' ñeññ Partsocoptartetsa.

11 Ñeñto'marña acheñenesha'pa' nanac ame'nyete't. Ama't ahua'toteñ cohuanrrortoñete't atet orrtate't ñeññ ama puentareto.

12 Tarraña allempo serrpare'tatanet Felipe cohuen ñoñets o' ame'ñatanet allohuen—yacmaneshachno ñaña allohuenet coyanesohuen. Serrpare'tatanet atet penaña Yompor po'cohuenña ñeññ atto atarr ayochreshattena ña, ñaña atet pena Jesús ñeññ Cristotats. O' ame'ñatuanet allempoñapa' apatare'ttet Yomporecop.

13 Ama't achyo'tañ ñeññ soçheta Simónpa' o' ame'ñerra ñaña. Ñapa'cho'ña apatare'tta Yomporecop. Apatare'tetuapa' allempoteñña' yemterrana Felipe errohuanen çhopeñe'chen. All orrtatanet Felipe ñeññ ama puentareto attoch eñoçhet añmapa' ñeññ po'ñoçh huetsa Partseshot. Simónña'pa' o'ch entan atetpa' atet'cha' ot:

—Errotenotuañaca' atet penate'.

14 Allempoña Jesús puellsensarne-sha'pa' e'mare'chet Jerusaléno't shonte' samario'marnesha' ame'ñeññañet Yompor po'ñoñpa' o' mueñet Pedro ñaña Juan all Samario.

15 Allempo çhap Pedro ñaña Juan Samariopa' ma'yocham'psosyet samario'marnesha' ñeññ

ameñetsa. Enamet Yompor chorratanetepa' Parets Puecamquëñ.

¹⁶ Tarro'mar allempopa' ama chorrenaneta' Parets Puecamquëñ. Oña apataretetuet pameñeñoțet Yepartseshar Jesús.

¹⁷ Allempoña Pedro ñaña Juanpa' o' net pot ñesheto ñeñț ameñetsa. Nohuet pot ñeshetopa' Yomporña Puecamquëñpa' ahuepa't chorranet.

¹⁸⁻¹⁹ Añña Simón ñeñț achyo'tañtetsa ahuaña o' çhapaña pueyoçhropa' atet ot:

—Añecpuepa't nenet pot attoch chorranet Parets Puecamquëñ.

Allempoñapa' atet otanet Simón:

—Llesenscha' nomporneshacha' o'ch nenanet naña not attoch chorranet Parets Puecamquëñ. O'ch napas quelle attoch sapuen llesens.

²⁰ Pedroñapa' atet och:

—Peçllayorpa' chenquëpa' alla, alloțpa' pechenquëpa' ãaña tarro'mar ãapa' ãotenapañ o'ch perañoña Parets Puecamquëñ. Ñeñțpa' amach errotenoț petsa'cho. Añña Yomporpa' o'ch apuey e'ñe atta.

²¹ Ama pocteyaye o'ch ãagap ãa llesens tarro'mar Yomporpa' ama pocteye' entennape peyoçher.

²² Te'pa' aña poctetsa o'ch ãoçtape'cherr ello cohuen, o'ch pequeçhpuerr añ sosya'tsañ o'ch penamuer Yompor peretneñets. Ñato' Yomporpa' o'ch peretnerrnañ atto ãoçtape'chen sosya'tsañ.

²³ Pedropa' alla otererr:

—Napa' neñoteneþ nanac sosey þoctape'chen peyoçhro, çha þottena atet ñerra'm þo'chñarpa' huanquëneþ.

²⁴ Simónñapa' alla otererr:

—O'ch sanamon Yompor nocop attoch amach es netantoyo atet sotenen. Añpa' allohua atet pena Simón.

²⁵ Pedro ñaña Juanpa' nanac a'potoñet Yompor po'ñoñ all Samario. Serrpare'tueneta'pa' alla ahuanerret Jerusaléño. All oñenet samario'marpa' ñeñt yeçhetsa toño'marpa' e'ñe acopoteñ serrpare'tatyesianeret.

Allempo Felipepa' ame'ñatana etiopo'marnesha'

²⁶ Allempoña añ Felipepa' orrtoña Yompor po'mllañoñeñer atet otos:

—O'ch çhapmoch poctopa' o'ch ahueþ a'yo, o'ch peçhap amarato allo'tsen toñ ñeñt sets Jerusaléñoþ attoch yeçhap anetso añ pa'so'cheñ Gaza.

²⁷ Ñañaapa' atet och Yompor po'mllañoñeñerpa' atetçho' pa. Allempoñapa' o' ahuo'. O' çhap all toño ñeñt sets Gazopa' o' entosan puesheñarr etiopo'marnesha'. Añ etiopo'marnesha' ñeñtpa' ñeñt añcha'taret añna po'taruas pen o'ch cohuanþenan ora allpon quelle ñeñt gobiernocop alla pa'nyo. Pa'neypa' añ pa'so'cheñ Etiopía. Ñeñt nanac añcha'tarettetsa all pa'nyopa' añ pa'so'cheñ Candace ñeñtpa' coyanesha'. Añ yacma ñeñt entos Felipepa' ñeñtpa' acaparet acheñ. Añña etiopo'marnesha'pa' errte' asuena' Jerusaléño allempo entos Felipe. Tarro'mar ta all o'ch ma'yochenana' Yompor.

28 Allempoña o' alla puerrerra pa'nyo. Ñapa' alla anen po'carro. Ñeñña carropa' cahualla matatene'. All anenpa' all lleyen an Yompor po'ñoñ ñeñtara ñoñets lleyen ñeñt quellquë't ahuat Isaías ñeñt a'mtaye't Yompor po'ñoñ.

29 Añña Parets Puecamquëñpa' eñotatan Felipe, ñeñña ote':

—O'ch penteña' ñeñt anets tarro e'ñe all carro.

30 Felipeña' o' mata. Matapa' chap allame'tetspa' o' e'mosan cho' lleyen an añ Yompor po'ñoñ ñeñtara ñoñets ñeñt quellquë't Isaías ñeñt a'mtaye't Yompor po'ñoñ ahuat. E'mos Felipepa' atet otos:

—¿Eñotoçhena't penteñ ñeñt atet oten ñeñt pelleyen?

31 Ñaña' atet och:

—Errotenohuate'ca'ye neñochña' amaca'ye eñalle ñeñtcha' neñotate'. Nato' o'ch pa'tap pa' o'ch yanorr parro.

32 O' a'tap Felipepa' o' cohuos all lleyen. Añ lleyen Yompor po'ñoño ñeñtpa' añ ñoñets ñeñt quellquë't Isaías:

Atetcha' pa' ña atet ñerra'm carrnero. Ñehua, carrneropa' o'ch yanemñ allcha' yemtsepa' amach ama'toçhto. Amapa' ñerra'm yetsorroñ pue'chpa' amach ama'toçhto. Atetcha' pa' ña, amach es oto.

33 Nanac mueroçhtachet, ama pocteye' ñeñt atet poñet. Ama erroteno o'ch yotua ora allohuen ñeñt atet sosey pa'yes pamo'tsna'tarnesha'. O' muetsetpa', o'huañ

corra aña patsro. Añpa' allohua atet
quellquë't Isaiás.

34 Allempoña ñeñt etiopo'marnesha'pa' o'
a'p̄to'ch Felipe:

—Ñehua, p̄oten, ¿eseshocpa'tña eñen arr Isaiás,
ñato' ñocpaté' amapa' po'psheññecopte'?

35 Allempoña Felipepa' o' serrpare'tach cohuen
ñoñets atet pena Jesús. Eñotach añ ñeñtara Isaiás
po'ñoñpa' eñen Jesúsocop. Allempoñapa' o' eñotach
ñaña po'poñ Yompor po'ñoñ ñeñtara ñeñt atet
pena Jesús.

36 Allña allenet matam̄penetpa' o' entoset oñ,
atet ot etiopo'marnesha':

—Ta'm, ¿pocte'te' te' o'ch napatare'tta Partsocop?

37 Felipeñapa' atet och:

—Ñehua, ñerra'm po'ñoch p̄ame'ñena
peyoçhrocmañenpa' e'ñe pocte' o'ch p̄apatare'tta
Partsocop.

Etiopo'marnesha'ñapa' atet ot:

—Napa' po'ñoch name'ñena. Te'pa' neñoteñ Jesu-
cristo ñeñtapa' ñeñt Yompor Puechemer.

38 Allempoñapa' o' tomatoset po'carro
sohua'rrtosetpa' o' ahuanmuet oño. Allña apatos
Felipe.

39 O' çha'nerret oño'tpa' Yompor
Puecamquëññapa' o' anman Felipe a'yo.
Allñapa' machayota ma'nata alla. Ñeñt
etiopo'marnesha'pa' ama enterrano Felipe.
Allempopa' o' ahuerri etiopo'marnesha' e'ñe
pocsheñesha'. Añpa' allohua ñeñt atet p̄a
etiopo'marnesha'.

40 All anetso Azotopa' all orrterraña Felipe. Allñapa' serrpare'tatosanet cohuen ñoñets alloch yequeshpa. Allempoñapa' o' ahuo' ñaña anetso Cesareo, nanac serrpare'tyesnom ora anetso'mar all oñomyes.

9

Allempo Saulopa' cotape'cherr ello cohuen Yomporecop

(Hch. 22.6-16; 26.12-18)

1 Allempoña Saulopa' nanac e'moñe'tenan ñeñt ame'ñenaya Yepartseshar Jesús. Pa'tsrre'mueñoŕpa' atet ot:

—Napa' o'ch na'cclatueña' ñeñt ame'ñenaya Jesús.

Ñeñto'marña o' ahuo' allo'tsen ñeñt nanac anicha'taret cornesha' e'ñe all Jerusaléno.

2 Chap allo'tsenpa' o' enamos orden attoch a'cclatuan ñeñt ame'ñetsa. O' enam orden ñeñtcha' anom a'yo anetso Damasco allecma apchenet judionesha' po'prahuo. O'ch chap allpa' o'ch aposan ñeñt anicha'tarettetsa puerahuo. Attoch apet all llesens attoch rromanatan acheñ ñeñt cotene' Jesús poctaŕña. Ama't coyaneshačno ñaña yacmaneshačno o'ch rromanatanet o'ch huancatanet o'ch anmaretterret Jerusaléno. Atet cotape'chña Saulo.

3 Allempoña agapuan orden allempoñapa' o' ahuo'. O' chap allame'tets Damascopa' machayoŕa ñeñt nanac poptetsa entoŕpa' o' choyo'tamŕpes e'ñe ñesho.

4 O' choyo'tamŕpespa' ñañaapa' alla rromopra patso. Chap patsopa' e'man ñoñets ñeñt atet oten:

—Esome're't Saule pemuerochtatennanña ñeñt name'ñenaya.

⁵ Sauloñapa' atet ot:

—¿Eshape't Ayochreshate eñets?

Ñeñt eñetspa' alla otererr:

—Napa' ñeñten Jesúsén, ñeñtara ñeñten pemuerochtaten. Añpa' pñeña muerochtatetsa. Tarro'mar cha pottena ñerra'mrrate' ashen ñeñt e'ñe pa'tpare'teño' ñañeñachña atserrpatetsa.

⁶ Sauloñapa' po'yorño'tpa' cha pa'shmuena allempoñapa' atet ot:

—Parteshacha' te'pa' ¿erro'tena't penmen ñeñtcha' atet nepena?

Partesha'ña Jesúsapa' atet otererr:

—Te'ñapa' o'ch petanta, ahuep̄ Damasco. Allcha'ña otapet ñeñtcha' atet pepa.

⁷ Ñeñt parro epuet sen Saulo ñetñapa' atta co-huanrrortenet. Pocuanrrorteño'tepa' ama er-ro't oteto. Ñetpa'cho'ña e'muet ñeñt e'morrtatsa tarraña ama es enteto.

⁸ Allempoña Saulopa' o' tanta. Tantapa' o'ch co-hua'yepa' ama ento. Ñeñto'marña atta echa'nmet pototpa' o' anmet Damasco.

⁹ O' chap Damascopa' ma'pamuet Sauloñapa' ama enteno, ñaña ama es rreno, ñaña ama es orreno, ama't coñe'ta.

¹⁰ Damascoñapa' allo'tsen puesheñarr ñeñt nanac ame'ñenaya Yepartseshar Jesús. Ñaña' añ pa'so'cheñ Ananías. Añña Ananíaspa' Yepartseshar Jesús orro'tña atet ñerra'm puechopoño't o' chore'chpa' atet och:

—¡Ananías!

Ananíasña anaþpa', atet ot:

—Napa' Nepartseshare añen.

¹¹ Yepartsesharñapa' alla otererr:

—O'ch notaþ atetcha' peþa. O'ch ahueþ allo'tsen toñ ñeñt nanac paçharr allcha' pentos Judas pa'paquëll. Peçhap all pa'paclopa' o'ch þa'þto'tos erro'tsente'ña ñeñt Saulo ñeñt tarso'marnesha'.

Alla otererr Yepartseshar:

—O'ch notaþ ñaña, añ ñeñtara Saulo e'ñe te'pa' allo'tsen ma'yochetsa.

¹² Napa' o' norrtatuon ñeñt o' entua neshot. O' entuan atet ñerra'mrrate' acheñ añ pa'so'cheñ Ananías huapatsa. O' huapa ñeshopa' o' nosan pot ñesho o'ch alla cohuerr.

¹³ Ananíasñapa' alla anapuererr:

—Partseshacha' napa' o' ne'mare'ch atet o' þa añ ñeñtara Saulo. Shonte' acheñ o' e'mare'tatnet atto ñapa' nanac mueroçhtatenan ñeñt þame'ñenaya Jerusaléño.

¹⁴ Te'pa' ñapa' echenan orden o'ch huancatyey allohueney ñeñtey þame'ñenaya, o'ch anmatey cárcelo. Ñeñt pa'mcha'tareternesha' pen allohuen judionesha' po'cornanesharpa' o' apet Saulo añ orden.

¹⁵ Yepartsesharñapa' alla otererr:

—Tarraña ama't atet te'pa' o'ch ahueþ all, ñeñt atet o' notuaþ. Te'pa' o' nene' Saulo ñeñtcha' na'potene' neñoñ añcha'tareñeshesho. Ama't po'poñeçhno acheñeshopa' ñapa' a'potoncha' neñoñ. Ñaña ama't israelena'tarneshopa' o'ch a'poton neñoñ.

¹⁶ Ñaña o'ch neñotach Saulo ñapa' o'ch mueroçhta nanac nocop, tarro'mar te'pa' o'ch

ame'ña'na na. Añpa' allohua ñeñt atet serrpare't Yepartseshar epuet Ananías.

¹⁷ Allempoñapa' o' ahuo' Ananías o'ch entenana' Saulo. Chap allpa' o' be'tosos pocollo allo'tsen Saulo. O' ponmosyapa' o' nosan pot e'ñe ñesho. Nohuan pot e'ñe ñeshopa' otosan Saulo, atet och:

—Masheñe Saule, Yepartseshar Jesús ñeñtca'ye pörtoya allempo poñen toño. Te'pa' añ ñeñtara Yepartseshar Jesús o' mueñan na o'ch non attoch alla pecuerr; ñaña attoch chorraña Parets Puecamquẽ.

¹⁸ Ñeñta otuapa' allorocma rrata'nom pa'clloyot ñeñt atet ñerra'mrrate' es pa'tall, o' alla cohuerr e'ñe cohuen. Alla cohuerr e'ñe cohuenpa' allempoñapa' apataretta Yomporecop.

¹⁹ O' apataretetuapa' o' rrallme'cherr. O' alla cherr po'huamenc. Allempoñapa' allponmater-rerr alla Damascopa' o' serrpare't epuet ñeñt ame'ñetsa.

Allempo Saulopa' e'ñe ñenmã serrpare'terr all Damasco

²⁰ Ñaña Saulopa' chocma sen judionesha' po'prahuo allcha' serrpare'tatenanet atet pena Jesús. Otanet añ Jesús pa' po'ñoçh ñeñtpa' ñeñtña Parets Puechemer.

²¹ Allohuenet ñeñt e' muene'pa' otyeset:

—Ta', errotenuañaca'yeña te' ñeñt yacmar. Añmapa' ñeñtca'ye mueroçhtataye't ahuaña ñeñt ame'ñenaya Jesús all Jerusaléño. Ñeñto'marña te'pa' huena arr, mueneñ o'ch rromanatenana' ñeñt ame'ñetsa o'ch anmarettet cornaneshesho

ñeññ pa'mcha'tareternesha' pen allohuen judionesha' po'cornaneshar.

²² Saulopa' allo'na sen huomenc pa'nmue' pueyo'cher attoch serrpare'tan Yompor po'ñoñ. Nanac serrpare'tatanet atto po'ño'ch Jesús'pa' ñeññara Cristotats. Ama't judionesha' ñeññ ye'chetsa Damascopa' ama erroteno anapeto.

Allempo Saulopa' a'yetater judionesha'

²³ Atteña o' allponmatpa' añña judionesha'pa' o'pachet o'ch muetset.

²⁴ Saulopa' e'mare'ch o' o'pachet, o'ch cohuet attoch o'ch muetset. Arr cohuet allo'tecma be'tenet all acon'cha'tam'psaret ora anets. Ellapenete't cohuame'tet ñaña arepenete't.

²⁵ Tarraña ñeññ pueyochresha' Saulopa' o' anmet tsapo allo'tsen pocoll e'ñe all acon'cha'tam'psaret anets, allña'pa' eñall ventana allo't a'suata'mperet atarret cañ'rot.

Allempo Saulopa' puerrerra alla Jerusaléño

²⁶ Allempoñapa' ahuerr Jerusaléño. Cherr Jerusaléño'pa' atarr mueneñ o'ch entenana' ñeññ ame'ñetsa. Ñeññña ame'ñetsapa' ama mueneto o'ch entenaneta' tarro'mar nanac mecha'teñet, otenapuetañ atto'te' shequénanet o' ame'ña.

²⁷ Añña puesheñarr ñeññ pa'so'cheñ Bernabé'pa' ñaña'pa' o' aneñ allo'tsen Jesús puellsensarnesha', o' otosanet:

—Añ Saulopa' o' entan Yepartseshar Jesús allempo sen Damasconet. Yepartsesharepa't epuet serrpare't. Ñaña'pa' ama mecha'to ñeñño'mar atarr serrpare't Damasco atet pena Jesús.

28 Allempoteñña' e'ñe pocte' eñchet, allempoñapa' o' e'ñe parrocmatuet. Ñapa' ama mecha'teno ama't mamesha. Atarr nanac serrpare'tan Jesús po'ñoñ.

29 Chocmach serrpare'ten epuet judionesha' ñeñ e'muene' griegačhp'a' tarraña amach pocteye' enteñeto. Allempoñapa' o'pachet ñaña all o'ch muetset.

30 Allempoña ñeñ parro ame'ñenetpa' anmet Saulo po'poñ anetso Cesareo. Allotpa' o' mueñet ñaña anetso Tarso.

Atto Pedropa' orrtatan Yompor po'partsoña all oteñet Lido

31 Atteñapa' o' muetsoñeñtuerra ñeñ amueročhtatañ. All Judeo ñaña Galileo ñaña Samariopa' o'huañ amueročhtatare'ttet atet pete't ahuaña. Allohuen ñeñ ame'ñetsa allo'na senet huomenc pa'nmuet pueyočhret. Atteñapa' o' shonta'nma ñeñ ame'ñetsa. Pame'ñeñotetpa' allo'na senet mecha'na'tnomuet Yompor. Ñaña allo'na Parets Puecamquēñpa' nanac coshatenanet.

32 Atteña Pedropa' čhocmach ta'yena emo'tyese' ñeñ ame'ñetsa. Parrochpa' o' čhap allo'tsen ñeñ ame'ñetsa all anetso pa'so'cheñ Lida.

33 Allñapa' entosan puesheñarr yacma añ pa'so'cheñ Eneas. Ñapa' ahuatoteñ echarrtena alla pa'nena o' posoc char.

34 O' entos Pedropa' atet otos:

—O'ch Eneasota, Jesucristopa' o'ch a'crraterre. Te'ñapa' o'ch petanta o'ch pa'ño'ten pemue'.

Allorocma correna, o' tantena.

35 Allohuen ñeñt̃ yeçhetsa Lido ñaña Sarónopa' allempoña eñchetpa' çha puesuerret ñeñt̃ ahuat̃ poçtaññet o' ame'ñerrñañet Yompor po'ñoñ.

Allempo Pedropa' tantaterran Tabita allempro roma

36 Eñall puesheñarr coyanesha' ñeñt̃ ame'ñetsa añ pa'so'cheñ Tabita, añ ñeñtara so'chñets Tabita ñeñt̃ otenet griegaçho Dorcas. Ñapa' arr yeçhena anetso ñeñt̃ pa'so'cheñ Jope e'ñe alla allame'tets Lido. Ñañaapa' nanac amueraña, çhocmach yenpuenan ñeñt̃ huocchañetyets.

37 Allempopa' o' atsna't. Atsna'tpa' atteñapa' o' rroma. Rromapa' pamo'tsesha'ñapa' o' apach atet̃ yeçhenet ñet. Apatuetpa' o' ñanet enone't all tama a'yohuen ba't.

38 Allempoña ñeñt̃ ame'ñetsa allpa' o' e'mare'chet Pedro allame'ttso'tsena all anets Lido. O' e'mare'chetpa' o' mueñet epsheña yacma attoch oteñeta' onepa' all allorocma.

Allempoña çhapuet Pedreshopa'

39 Pedroñapa' o' co'terranet. Chap allpa' o' anmet all cuarto eno allo'tsen arromña't̃. All tomçhen shonte' rretorrnanesha' ñeñt̃ llecanrrortetsa. Allñaapa' all gatanna'tyenet ñeñt̃ chorra'yenet ñeñt̃ sepeçhyesamet ahuaña Tabitañ.

40 Pedroñapa' mueñuanet allohuenet a'yenet̃. O' mueñuanet a'yenet̃pa' o' concorposa, o' ma'yocha. Ma'yochuapa' o' puetallsa arromña'teshonet̃pa' atet̃ och:

—O'ch Tabita notañ, petanterra.

Allempoñapa' acuerroche'. O' enterran Pedropa' çha anerrets.

⁴¹ Pedroñapa' cheter pototpa' echanter attoch terr. Allempoñapa' o' chore'terran ñeñt ame'ñetsa ñaña rretorrnaneshachno. O' be'toscha'terretpa' o' gaterranet o' tanterra ñeñt rromats.

⁴² Allohuenet ñeñt yeçhetsa all Jopopa' o' e'mare'chet atet pena Pedro. Ñeñto'marña shonte' acheñ o' ame'ñeret Yepartseshar Jesús.

⁴³ Pedroñapa' alla a'pa atomat alla Jopo. O' a'pa all Simón pa'paclo. Ñeñt Simónpa' añ po'taruas pen o'ch a'cohuenetyesan pa'rrom.

10

Atet pa capitán Cornelio epuet Pedro

¹ Eñall puesheñarr capitán, añ soche't Cornelio. Ñañaapa' allo'tsen anetso añ pa'so'cheñ Cesarea. Allñaapa' ña mueñanatene' çharroch çharra' guardianesha' ñeñt oteñet Guardia Italiana.

² Añña Cornelioñapa' nanac cohuen cotape'che't Partsocop, ñaña nanac mecha'na'teñ. Ama't ñeñt yeçhetsa e'ñe parro ñetpa'cho'ña cotape'chete't cohuen Partsocop. Ñapa' nanac amueraña, shonte' es apa'yesane't ñeñt es palltatse't. Ñaña çhocmach ma'yochenana Parets.

³ Atta yeçhena ama't ahuatoteñ. Parrochpa' o' coya'nen atsne'pa' orrtoña ñeñt Yompor po'mllañoñer. Orrtoña atet ñerra'm pueçhopoñoñ, tarraña ama çhoye' çhopo'teñe. Tarraña o' orrtoñapa' e'ñe cohuen eñch. O' huapapa' atet otos:

—¡Cornelio!

4 Ñañaapa' puencha'nañoŧpa' atŧa cohue', al-
loñapa' atet otaŧ:

—¿Eso'tña Partseshacha' pemnen?

Mellañoŧeñña' alla otererr:

—Pema'yocheñoŧ te'pa' o' yerpaŧa Yompor. E'ñe
pocte' entennaŧ atto es pa'pa'yeñ ñeñ es palltetsa.

5 Te'ñapa' añ pocte' o'ch pemne acheñ Jopo
o'ch paŧotach puesheñarr añ pa'so'cheñ Simón,
ñeñŧara oteñet Pedro.

6 Ñapa' all a'puena po'psheñeñ Simón pa'paclo.
Te'pa' ñachña pŧotterre' ñeñŧha' atet peperra.
Ñehua, ñeñŧ Simón all a'puena Pedro ñeñŧca'ye
a'cohuenetyene'ña pa'rrom. Pa'paquellpa'
ontapo'tsen. Añpa' allohua atet ot Yompor
po'mllañoŧeñer.

7 Ñeñŧa otuapa' o' ahuer. Ahuerrpa' Corne-
lioñapa' chore'tan epsheña ñeñŧ taruaset e'ñe alla
pocollo, chore'tan ñaña puesheñarr po'solltarer
ñeñŧpa' aña po'taruas penet attoch cohuañpeñet
po'caŧtánret. Añpa' ñeñŧ cohuen cotape'chets Part-
socop ñaña.

8 Alloŧpa' o' serrpare'tatanet ora atto
orrtoña Yompor po'mllañoŧeñer. Ñeñŧa
serrpare'tatuañetpa' o' mueñanet Jopo.
Allempoñapa' ahuanmuet.

9 Tsapañapa' o' chapmochet Jopo. O'
chapmochetpa' Pedroña e'ñe alla pocollopa'
o' a'tap eno allcha' ma'yochosa. Allempopa'
chapmoch pocto.

10 O' chapmoch poctopa' cheporra Pedro.
Atarro' mueneñeñ o'ch rra'pa' tarraña ama

potena'ña rreñets. Alla cohuenpa' o' huapoña ñeñ' atet ñerra'm cho'es chopo'ten.

¹¹ Entoñapa' o' entan ñeñ' atet ñerra'm atarr shetamuets. Eno'pa' cha sohuam'pesnena, ačharam'psare't pa'tats po'top'ñe'marot. Añña ñeñ' ačharam'psare'tpa' sohua'netsa patsonet e'ñe ñeshonet.

¹² Allña shetamtso e'ñe o'ponopa' allo'tsa'yen shonte' pa'namen berročhno, ama't po'poñ berročhno ñeñ' ama arrapoye' eñche'te judionesha'. Ñaña allo'tsa'yen pa'namen shechpečno ñaña pa'namen o'tečno.

¹³ O' chap allame'tets ñesho, Pedroñapa' e'man ñoñets, atet oten:

—Pedro o'ch pemtsa añ berr o'ch perre'.

¹⁴ Pedroñapa' atet ot:

—Ama Nomporkha', nerreñe. Napa' ama't ahua'tapa' ama nerrare ñeñ' ama arrapahuoyaye atet yeyčhena ya ñeñ'ey judioneshay.

¹⁵ Allempoñapa' o' alla oterrerr ñeñ' eñets, atet ot:

—Ñeñ' o' a'cohuentatua Yomporpa' p'apa' amach p'otatsto añmapa' ama cohuenayaye.

¹⁶ Añpa' e'ñe ma'pocha e'm'pa' allempoñapa' o' alla a'terr enonet, o' alla chenquerra.

¹⁷ Allempoñapa' Pedropa' nanac moññe'tacha, o' cotape'chpa' atet ot:

—Esuañaca' otenenña ñeñ' o' nentua.

Ñeñ' nanac moññe'tenapa' allempocma chap ñaña ñeñ' mueñen Cornelio. Ñetpa' o' a'p'to'tnomuet errate' yečhenaña Simón. Allempoña entoñet Simón pa'paquëllpa', o' chapuet allo't be'tenetpa'

18 o' ċhore'toset atet otoset:

—¿Arre't a'puenaña ñeñt sochetsa Simón ñeñtara ñeñt otenet Pedro?

19 Pedroñapa' e'ñe alla enopa' ama't orameñ moñne'tenana ñeñt o' entuapa' añña Parets Puecamquëña' atet och:

—O' ċhap ma'psheña acheñ ñeñt pe'nene'.

20 Te'pa' o'ch pesuerra fayecma o'ch pōcterranet. Amach peñcha'tatsto. Napa' na mueñenahuet atto huapuet arr. Añpa' atet ot Parets Puecamquëñ.

21 Ñeñta otuepa' Pedroñapa' asuerroche' patso. O' ċhap allo'tsen añ ma'psheña atet otapanet:

—Napa' naña ñeñten se'nen. ¿Esocpa'tña se-huena?

22 Ñetñapa' atet ochet:

—Yapa' añ yemñene' capitán Cornelio. Capitánpa' oten pōnepa'to'. Ñapa' orrtoña Parets po'mllañoñeñer atet och: "Pagotach Pedro onepa'. Ñaña pocte' o'ch pe'mñoch ñeñtcha' atet otaḷ." Atet och Parets po'mllañoñeñer. Ñeñto'marña yapa' o' yehuapa. Tarro'mar capitán Corneliopa' ñapa' e'ñe cohuen coṭape'chen Partsocop ñaña nanac mecha'na'teñ. E'ñe cohuen enteñ allohuen judionesha'.

23 Allempoña Pedropa' atet otapanet:

—Ñehua, sebe'tos allach sa'pa, tsapaṭachña ahuey parro.

Allñapa' alla moset, tsapañña' ahuanenet. Po'potantaña'cho'ña ñeñt ame'ñetsa e'ñe alla Jopopa' o' coṭa'huanmuet ñamet.

24 Tsapatñaapa' o' çhapuet Cesareo. Cornelioñaapa' alla cohuenan Pedro o'ch huapa. Ñapa' o' hua'ña'huan pamo'tsesha' ñaña po'potantañ ñeñt epuet yemtena. Ñetñaapa' all cohueñet e'ñe parro.

25 O' huapa Pedro. O' huapapa' Cornelioñaapa' o' tantnoma attoch o'ch poctaḗ. O' concorposñaña o'ch ma'yochaḗya.

26 Tarraña Pedroñaapa' o' cheterpa' atet och:

—Petanterra, amach pema'yochatsetno. Napa'çho'ña arromñaena.

27 O' tanterrapa' serrpare'tatanna'tet mame'pa' allotñaapa' o' be'toscha'tet pocollo. Allñaapa' o' entosan shonte' acheñ ñeñt o' chaçha't.

28 Allempoñaapa' otanet Pedro:

—Sapa' señoñeñ ya judioneshaypa' ama pocteye' yenteñe o'ch yeyemcha po'poñ acheñ ñeñt ama judioneshayaye. Tarro'mar yapa' atet yeyçhena amach yeya'rrotatsche acheñ ñeñt ama judioneshayaye. Tarraña te' Yomporpa' o' yeçhatuan amach yentatsche po'psheñeñ atet ñerra'mrrate' ñeñt ama cohuenayaye.

29 Ñeñto'marña te'pa' o' nohuapa arr tayecma allempo agotatenet. Te'ñaapa' o'ch na'ḗto'taḗ ¿esocopte' ḗgotatenen?

30 Allempoñaapa' Cornelioñaapa' atet ot:

—Ahuaña o' taya pa'tatsmat met, napa' alla nema'yochena, ñaña nema'yocheñoñ o' nequeçhpa' nerrar mame'. Ñeñt attecma nepena allempocma nema'yochena nepacillo atet ñerra'm te' coya'nen atsne'. Allempopa' machayoḗa orrtona puesheñarr yacma e'ñe allame'tets.

Pa'shtampa' añ chorrena ñeñt nanac cohuen poptetsa.

³¹ Ñaña'pa' otosen: “Cornelio, pema'yocheñoñ te'pa' e'mueneṣ Yompor. E'ñe pocte' entennaṣ atto es ṣapa'yeyñ ñeñt es palltetsa. Ñeñto'marña te'pa' o'yerpaṣa.

³² Te'ña'pa' o'ch pemñe acheñ Jopo o'ch ṣagotach puesheñarr ñeñt pa'so'cheñ Simón ñeñtara ñeñt otenet Pedro. Ñapa' alla a'puena po'psheñeñ Simón pa'paclo. Ñach huapatsapa' ñapa' serrpare'tatoseṣcha'. Ñehua, ñeñt Simón all a'puena Pedro ñeñtca'ye a'cohuenetyene'ña pa'rrom. Pa'paquëllpa' ontapo'tsen.” Añpa' allohua atet oten ñeñt norrtoya.

³³ Ñeñto'marña nagotateneṣ. Te'pa' e'ñe pocte' o' pehuapa. Te'pa' Yompor eñoteny ñeñtey arro'tsa'yeney yemneñ o'ch ye'mñotaṣ o'ch peserrpare'tatey errponte' Yompor yeçhateneṣ.

Allempo Pedropa' serrpare'tatosanet Cornelio pa'paclo

³⁴ Pedroña'pa' alla oterrerr:

—Po'ñoçh te'pa' o' neñoçh tarro'mar o' çhapona neyoçhro, ama ñapṣa judionesha' morrentenoña Yompor.

³⁵ Añña ama't erra'tsen pa'namen acheñ, eñallcha'ña puesheña'tets ñeñtcha' mecha'na'tene' Yompor ñaña ñeñtcha' e'ñe cohuen es pets Yomporecop. Ñeñtṣpa' e'ñeçh pocte' enteñ Yompor, ama't erra'tsena acheñer.

³⁶⁻³⁷ Alla oterrerr Pedro:

—Sapa' señoṣteñe'tña Yomporpa' o' mueñoṣnay Puechemer Jesucristo, ñeñtey judioneshaçpay.

Añ ñeñtara Jesús pa' o' a'pochtatuonay e'ñe cohuen Partsocop attoch cosheñtso'tseneycha'. Te'ñapa' ñach Yepartseshar yeperr allohueney. Añ cohuen ñoñetspa' o' serrpare'tuet erracmañen Judeo'mar. Ñanompa' serrpare'chete't Galileo allempo apate't Juanañ.

³⁸ Alla oterraneterr Pedro:

—Señoteñte' Yomporpa' o' nan Puechemer Jesús ñeñt nazareto'marnesha'. O' chorracha Parets Puecamquëñ ñaña nanac ahuamenca't pe'. Al-lo'tpa' all chopeñe'chyese'tpa' nanac amuerañte't. A'crratyesane't allohuen ñeñt muerochtatyese't oneñe't, tarro'mar Pomporpa' nanac yenpue't.

³⁹ Alla oterraneterr Pedro:

—Yapa' o' yentuon ora allpon atet pa'yese't all yeçhena judionesha' ñaña all Jerusaléno. Yapa' o' yentue ñeñto'marña te'pa' o' ya'potoñ ñeñt atet pa'yese't. Alloñapa' o' corso'tamñset tsacho, atto muetset.

⁴⁰ Tarraña poma'pamtañopa' tantater Pompor. Allempoña Pomporpa' orrtaterrnay e'ñe ya yocop.

⁴¹ Tarraña ama allohuenacpaye' orrterro, e'ñe yañeñacpa ñeñtey na' Yompor o'ch ya'potoñ ñeñt atet pe't Jesús. Allempoña tanterrapa' yapa' yerrallme'chapretuer ñaña yorruerr coñe'ta'tets parro.

⁴² Alla oterrerr Pedro:

—Ñapa' o' otey o'ch yeserrpare'tach acheñenesha', o'ch ya'potoñ atto yeño'ch Yomporpa' o' nan Puechemer Jesús ñach acre' allohuen acheñenesha'—errot'encha' corret puesheña'ttset. Acrancha' allohuen acheñenesha' ama't ñeñt corretsa ñaña ama't ñeñt o' colla'huen.

⁴³ Alla oterrerr Pedro:

—Ñeñt̃ ama't ahuat̃ ñeñt̃ a'mtaye't Yompor po'ñoñpa' ñeñtara Jesús a'potete't. Ama't ahuat̃ ñetpa' otete't ñerra'm yame'ñera ña Pomporpa' e'ñech peretna'huerrnay yo'chñar.

Allempo ñanom chorranet Parets Puecamquẽñ ñeñt̃ ama judioneshayaye

⁴⁴ Ama't allempo serrpare'ten Pedropa' añña Parets Puecamquẽñpa' ahuepa't chorranet allohuenet ñeñtet e'mñote'.

⁴⁵ Añña judionesha' ñeñt̃ ame'ñetsa ñeñt̃ parro huapa Pedro, ñetñapa' at̃ta cohuanrrortenet, o' otet:

—Errotenotuate'ca'ye chorranet ñamet Parets Puecamquẽñ e'ñe at̃tõta, ñetpa' amaca'ye judioneshayayeto. At̃et otet ñet.

⁴⁶ Tarraña po'ñoçhpa' ahuepa't chorranet ñamet Parets Puecamquẽñ tarro'mar ñetpa'cho'ña ahuepa't eñosyeset po'poñ ñoñtso. E'ñe po'poñ ñoñtso aye'choçhtachet Yompor. At̃to e'manet judionesha'. Allempoñapa' at̃et ot Pedro:

⁴⁷ —Ama't pocte' senteñe o'ch apataret̃et Partso-cop. Tarro'mar o' chorranet Parets Puecamquẽñ e'ñe at̃et ñerra'm ya.

⁴⁸ Allempoñapa' otanet Pedro:

—Te'pa' e'ñe pocte' same'ñeñoť Jesucristo o'ch sapataret̃ta.

Allempoña apataret̃etuetpa' at̃et ochet Pedro a'puepa'to' alla allponmat.

11

*Allempo Pedropa' serrpare'tatuerranet
Jerusaléño*

1 O' allponmat Jesúsña puellsensarnesha' o' e'mare'chet atto po'poñ acheñ ñeñt̃ ama judioneshayaye o' ame'ñerrñañet ñamet Yompor po'ñoñ. Atto e'mare'ch Jesús puellsensarnesha' ñaña po'poñečno acheñ ñeñt̃ ame'ñetsa all Judeo.

2 Allempoña ahuerr Pedro. Allempo çherr Jerusaléñopa' judionesha' ñeñt̃ ame'ñetsa allpa' o' che'ptare'tapueret Pedro.

3 O' che'ptare'chet Pedro, atet ochet:

—Eso'mare'tña petaña allo'tsen ñeñt̃ ama judioneshayaye, ama't allpa' o'te' cha perrallme'chapretos—anet.

4 Allempoña Pedropa' o' serrpare'tatuerranet ñeñt̃ e'ñe atet pa;

5 atet otanet:

—Napa' allo'tsenen Jopo. Allempo nema'yochena huapona ñeñt̃ atet ñerra'm cho' es yeçhopo'ten. Entoñapa' o' nent ñeñt̃ atet ñerra'mrrate' shetamuets. Eno'tpa' cha sohua'nena açharampsaret e'ñe pa'tats po'to'pñe'maro't. Añña ñeñt̃ açharampsaretpa' sohua'netsa patsonet e'ñe neshonet.

6 Napa' o' necue'pa' allña o'ponopa' nent pa'namen berroçhno ñaña ñeñt̃ puetsato'mar, ama't po'poñ berroçhno ñeñt̃ ama arrapahuoye'yenteno ya ñeñtey judioneshay. Nent ñaña pa'namen shechpeçhno, ama't ñaña pa'namen oteçhno.

7 Allempoñapa' ne'm ñoñets, atet oten: “Pedro o'ch pemtsa añ berr o'ch perre’.”

8 Tarraña napa' not: “Ama Nomporcha' nerreñe.

Napa' ama't ahuatapa' ama nerrare ñeñt̃ ama arapahuoyaye atet yeychena ya judioneshay."

⁹ Allempoñapa' alla oterrerr ñeñt̃ eñets entot, atet ot: "Ñeñt̃ o' a'cohuentatua Yomporpa' p̃apa' amach p̃otatsto añmapa' ama cohuenayaye."

¹⁰ Añpa' e'ñe ma'pocha ne'm̃pa' allempoñapa' o' alla a'terr enonet o' alla chenquerra—ora.

¹¹ Allempocma o' chap ñaña ma'psheña acheñ. Chapuet all pocollo all nommuena. Añ ma'psheña acheñpa' arroť mueñonet Cesareot.

¹² Añña Yompor Puecamquëñña' oten o'ch nocterranet. Oten amach nemcha'tatsto. Añ pechapsheña ñeñt̃ arro'tsen te' o' yahuanma parro. Allempoñapa' yechap pa'paclo ñeñt̃ nagotatene'.

¹³ Allempoña o' yechap pa'paclopa' ñaña'pa' o' serrpare'tatapuey atto' orrtoña Yompor po'mllañoñeñer. Orrtoña'pa' atet otos: "Añ pocte' o'ch pemñe acheñ Jopo o'ch p̃agotach puesheñarr añ pa'so'cheñ Simón ñeñt̃ara ñeñt̃ otenet Pedro.

¹⁴ Añña Pedropa' ñeñt̃cha' peñotate' attoch pequeshperra ñaña allohuen p̃amo'tsesha'." Atet oten Yompor po'mllañoñeñer.

¹⁵ Nañapa' o' neserrpare'tosñañ Yompor po'ñoñ. Allempo neserrpare'tenpa' añña Parets Puecamquëñpa' ahuepa't chorr Janet. O' chorr Janet ñet e'ñe attecma chorra'ya ahuaña yama.

¹⁶ Allempoñapa' o' neyerepya atet otey ahuaña Yepartseshar Jesús: "Juanañpa' e'ñe oñochaya apate't tarraña na añcha'ña nechorratasa Parets Puecamquëñ."

¹⁷ Ñehua, Yomporpa' e'ñe pocte' enteñ o'ch

chorr Janet eñe attecma atet chorra'ya ya allempo yame'ña Yepartseshar Jesucristo. Ñehua, ñerra'm eñe pocte' enteñ Yomporpa' nañapa' er-rotenotuaf'e'ca'ye neche'ptare'chña Yompor.

18 Ñeñfa otuapa' allempoñapa' alla moma'huet allohuenet. Allempoñapa' o' aye'chochtatoñet Yompor, atet otet:

—Ama't po'poñ achein ñeñt ama judioneshayaye Yomporpa' mueneñ o'ch cotape'cherret ello cohuen alloch ñetpa'cho'ña corretsetach pocsheñeshocmañen eñe tayoteñ errponañohuen. Allohua ñeñt atet pa Pedro ñaña Cornelio.

Atto epa'hua Yompor po'ñoñ errañaren

19 Allempo muetset Estebanpa' allem-poteña orrta muerochteñets. Nanac muerochtachete't ñeñt ame'ñetsa. Ñeño'marña yetrra'tyeset allemeña, parratse'tyeset po'poñ anetso'mar. Puesheña'tetspa' ahuanmuet Fenicio'mar, po'potantañña' ahuanmuet Chipro, po'potantaña' ahuanomyeset Antioquío. All chopeñe'chyesnomuetpa' all serrpare'tyesnomuet Yompor po'ñoñ, tarraña aña serrpare'tatnomuet ñapueñ judionesha'.

20 Tarraña puesheña'tets chipro'marnesha' ñaña cireneo'marnesha' ñeñt ame'ñetsapa' o' chapuet Antioquío. Allña' aña serrpare'tatoset ñeñt griegonesha'. Añ serrpare'tet ñeñt atet pena Yepartseshar Jesús.

21 Yomporpa' nanac ahuamencat panet. Ñeño'marña shonte' achein ame'ñachet Yepartseshar Jesús, o' a'ypo'ña'huerret ñeñt ahua't pocta'pñet.

22 Añña ñeññ ame'ñetsa Jerusaléñopa' o' e'mare'chet atto shonte' ame'ñetsa Antioquíó. Ñeñño'marña mueñet Bernabé Antioquíó, o'ch yenpuenaneta'.

23 Allempo chap Bernabé allpa' entosan po'ñoñh o' orrta Yompor puemuereña all. Ñeñño'marña nanac coshosa. O' coñape'chatosanet, atet otanet:

—Amach sequechpatstere Yompor po'ñoñ. Huomenccha' sepa' seyoñher.

24 Añña Bernabépa' ñapa' nanac amueraña, nanac chorreña Parets Puecamquëñ. Atarr ame'ñena. Ñeñño'marña shonte' ame'ñatana acheñenesha' attoch coteret Yepartseshar.

25 Allempoña ahua' Bernabé. O' chap Tarso allcha' e'nerrana' Saulo. Allña entospa' a'secher o'ch aner Antioquíó.

26 Epsheño'maret alla a'puet paterr char Antioquíó. Allñapa' nanac yeñhachete't ñeññ a'pchatset't all pame'ñeñotet Yompor. Shonte' acheñ ame'ñatsa all. All Antioquíopa' añ asocharettet ñeññ ame'ñetsa “Cristona'tarnesha'.” Ñanom arr Antioquíó asocharettet atet.

27 Allempoña Jerusaléñopa' allo'tsen puesheña'tets ñeññ a'ñtene' Yompor po'ñoñ. Parrochpa' onaña'tet. Chapuet Antioquíopa'

28 añña ñeññ pa'so'cheñ Agabopa' o' tomospa' serrpare'tatosanet, atet otanet:

—Orrtach muecheñets esempo erraparen patso. Añpa' allohua ñeññ atet ot Agabo.

Añ eñotate' Yompor Puecamquëñ, ama't allempopa' ama orrtena' muecheñets. Allempo

am̄cha'tareṭta Claudiopa' allempo'ña orrta muecheñets.

²⁹ Ñeñto'marña allohuen ñeññ ame'ñetsa Antioquíopa' o' a'pochtachet o'ch mueñet ñeññcha' yempue' pa'mo'nasheñnesha' ñeññ yeçhetsa Judeo.

³⁰ Allpon echyenetpa' allpon apa'yeset. Atet a'pochtachetpa' atetcho' pet. O' apueñet Bernabé ñaña Saulo, ñetñapa' anmet Jerusaléño, allñapa' aposet ñeññ pompornesha' pen ñeññ ame'ñetsa Jerusaléño.

12

Allempo am̄cha'tareṭ Herodes muetsaterran Jacobo, yottam̄psatan ñaña Pedro

¹ Allempopa' añña am̄cha'tareṭ Herodespa' rromatan puesheña'tets ñeññ ame'ñetsa attoch mueroçhtachet.

² Rromuet Jacobo o' muetset. Añ Jacoboñpa' ñeññara ñeññ Juan pa'mo'nasheñ. Atto muetsetpa' cho pechoñet poñ.

³ Ñeññña muetse'pa' nanac coshatan judionesha' ñeññ ama ame'ñetso. Allempoña am̄cha'tareṭpa' nanac mueneñ o'ch alla coshaterranerr judionesha'. Ñeñto'marña pascuapopa' allempoch rrerretterr pan ñeññ ama a'chareṭeyayepa' o' alla rromaterranerr ñaña Pedro.

⁴ Rromuet Pedropa' o' abe'tet cárcelo. Net çharra' puechena pechap solltarnesha' ñeññcha' cohuan̄pse'. Ñanompa' o'ch neñet pa'tatssheña solltarnesha' ñeññcha' cohuan̄pene'. Allotpa' o'chña muenme'cheñetpa' o'ch huena po'potantañ

pa'tatssheña ñeñtcha' cohuanpene' ñaña. Ñeñtña çharra' puechena pechap solltarpa' attach penet, çhach camyannenet. Añ coçape'chña Herodes o'ch metua pascuapopa' o'ch orrtatan Pedro allo'tsa'yen acheñenesha'.

⁵ Atteñapa' nanac huomenc cohueñet Pedro cárcelo. Tarraña ñeñt ame'ñetsapa' atarr ma'yochampeñet Pedro.

Atto Yompor po'mllañoñeñerpa' çha'nmaterran Pedro cárcelot

⁶ Atteñapa' allponmat o' çhap allempoch tsapatcha' Herodespa' o'ch orrtata'muenan Pedro allo'tsa'yen acheñenesha'. Tsapoña Pedropa' all muenpa' all rroçhtampeñ epsheña guardia all rromampeñet allo ehuancařet cadeno epo'mar pueçot. Ñaña a'yotpa' all cohuanpeñ po'potantañ solltar e'ñe allot be'tenet.

⁷ Atteñapa' machayota puetaresua e'ñe alla o'pono. Orrtoña Yompor po'mllañoñeñer. Añña mellañoñeñpa' o' a'płlan Pedro puepotoçpa' o' opuepa' atet och:

—Petanta tecma.

Añña cadena allo' huanquēñetpa' çha pueya'nets e'ñe ñoña.

⁸ Añña mellañoñeñpa' atet och:

—Pechana'pena peshtam, o'ch penen ñaña pesapat.

Atet och mellañoñeñpa' atto'çho' pa. Allempoñapa' alla otererr:

—Te'pa' pechorrena ñaña peshtam ñeñt penen enot. Allempoñapa' o'ch pçctenen.

9 Allempoñapa' o' čha'nen coťa'nenan mellañoťeñ. Pedroñapa' čha otenapañ attate' čhopo'teñ, tarraña ama čhoye' čhopo'teñe. Allempoñapa' o' ahuanenet.

10 Ahuanenetpa' o' metenet all cohuen puesheñarr guardia. Ahuerreterr allponpa' o' meterreterr all cohuen po'psheñeñ guardia. Allempoñapa' o' čhenet allot e'ñe čha'nenet allecma chopeñe'chen acheñenesha'. Chenet yetarropa' ñeñťña yetarrpa' asret nanac echarr. O' čhenet e'ñe allpa' añña yetarrpa' o' tora'nom e'ñe ñoťa. Tora'nenpa' ñetñapa' o' čha'nenet. Chenet a'yotpa' allñapa' all chope'chnomuet e'ñe parro mame'pa' allotñapa' o' ahuerřña Yompor po'mllañoťeñer allotñapa' o' ñapťamena Pedro.

11 Allempoñapa' čhapoña Pedro pueyočhro, atet ot:

—Po'ñočhepa't ama čhoye' nečhopo'teñe. Yomporpa't mueñene' po'mllañoťeñer attoch a'qeshpäten. Te'pa' Herodespa' amach erroť pa'no. Judionesha'pa'čho'ña e'ñe orrena o'patenna.

12 O' čhapoña pueyočhro tematenñapa' o' čhap allo'tsen María pa'paquell. Añña Mariapa' ñeñť pachor Juan Marcos. Čhap all pa'pacłlopa' allñapa' allo'tsa'yen shonte' acheñ all ma'yochenet o'pono.

13 O' čhap allot be'tenetpa' chore'tosanet. O'ponoťñapa' čha'nom puesheñarr shopshesha' añ pa'so'cheñ Rode.

14 Huapapa' o' cheme'tan Pedro po'ñoñ. Pocsheñesha' materra o'pono o'ch oterrana' acheñenesha' ñeñť o'pono'tsa'yen. Tarraña ama tora'ņpsano Pedro. Čherr o'ponopa' atet otanet:

—Pedrepa't o' huena, allo'tsena a'yot.

¹⁵ Ñetñapa' cha otet:

—Amate'ca'ye ñeñteyaye, atta p̄otyen čate' pemospuena.

Ñaña'apa' alla oterrerr:

—Po'ñočca'ye Pedro.

Ñetñapa' oterreterr:

—Amate' Pedroyaye. Ñato' aña'e' Yompor po'mllañoñeñer ñeñtcha' cohuan̄p̄se' Pedro.

¹⁶ Atteñapa' Pedroñapa' alla chore'terraneterr yetarroť. Allempoñapa' toran̄p̄set. Toran̄p̄setpa' aña'pa't Pedro. Allempoñapa' atta cohuanrrortet.

¹⁷ Pedroñapa' o' echantan pot attoch o'ch muetsoñeñtet allochñapa' o'ch serrpare'tatuenanet. Allempoña o' muetsoñeñtuetpa' atet otanet atto Yomporpa' o' ča'nmater cárceloť. Otanet ñaña:

—O'ch soteña' Jacobo ñaña po'potantañ masheñnesha' atto ča'nmaterren Yompor po'mllañoñeñer.

Allempoñapa' alla ahuerr Pedro.

¹⁸ Atteñapa' o' puetaren. Arrña cárcelo solltarne-sha'ñapa' pueñchañoťetpa' otanna'tyeset:

—Errotenoťuañaca'ye ča'nenña Pedro. Er-rahuañaca'ye o' ahuen.

¹⁹ Atteñapa' o' e'nater Herodespa' ama esesha' entaye. O' alla a'p̄to'tare'tereter solltarne-sha' ñeññ cohue'ne' cárcel ama esesha' entaye errotenote' o' ahuen. Allempoña Herodesñapa' o' muevo'tuan solltarnesha' a'yo allcha' muet-sanatatuanet. O' allponmat Herodesñapa' o'čo' ahuo' Judeoť o'ch ahuo' Cesareo allñapa' allach allponmatena'.

20 Allempoña Herodesñaapa' nanac e'moñe'tenan tiro'marnesha' ñaña sidóno'marnesha'. Ñeñto'marña o'huañ apanet rreñets ñeñt nanac palltenet pa'nyeto. Ñeñto'marña ñetpa' mueneñet o'ch alla amo'tsteret Herodes attoch o'ch alla apuerranet ñeñt palltenet. Ñeñto'marña huaçha'ta shonte' tiro'marnesha' ñaña sidóno'marnesha' o'ch enteñeta' Herodes. Añña Herodes pa'taruasañer añ pa'so'cheñ Blastopa' e'ñe cohuen entapanet. Ñañaapa' o' a'pocatanet attoch ñetpa' serrpare'tet epuet amcha'taret.

21 Chap allempo'ch serrpare'tet epuet amcha'taretpa' Herodesñaapa' o' chorrana nanac cochnesha' pa'shtampa' anorros po'conaño'pa' eñosos. O' eños atet ñerra'm ñeñt amcha'taret nanac.

22 O'ña eñosua acheñenesha'ñaapa' o' rrannartetpa' atet otyeset:

—Ama acheñenocheye' eñetso, Partsepa't eñets.

23 E'ñepa'tcha' allempocma huapoña Yompor po'millaño'feñer o' atsna'tatosan Herodes. O' atsna'tpa' e'ñe rrohue pueñpa' o' rroma. Tarro'mar Herodespa' mueneñ o'ch Partsocoptarta. Acheñenesha'ñaapa' o' aye'choçhtatoñet atet ñerra'm Parets. Amaña çhoye' otaneto eñallña paterr Yompor. Añpa' allohua atet pe't Herodesoñ.

24 Allempoñaapa' o' epa'hua Yompor po'ñoñ erracmañen. Allo'na ame'ña'huanena shonte' acheñenesha'.

25 Añña Bernabé epuet Saulopa' o' asueneta' Jerusaléno, pomhueneta' quelle. Pomhueneta'

quellepa' o' puerracherret Jerusaléñoč. Añña Juan Marcospa' o' coterranet.

13

Allempo Pablo ñaña Bernabépa' ahuo't serrpare'tatoset anetso Chipro

¹ Ñeñt pame'ñeñočet apčhatse't Antioquíopa' allo'tsen puesheña'tets acheñ ñeñt a'mtene' Parets po'ñoñ, ñaña allo'tsen ñeñt nanac cohuen yečhatatse't Yompor po'ñoñ ñeñt atet ñerra'm añ: Bernabé, ñaña Simón, ñeñt Simónpa' oteñet ñaña Negro, ñaña allo'tsen Lucio ñeñt cireneo'marnesha' ñaña allo'tsen Manaén ñeñt parro cheshat Herodes ñeñt añcha'tarettetsa all Galileo, ñaña allo'tsen Saulo.

² Allempo čocma cohuentatoñete't Yompor, ñaña erročenopa' čoch tore'tete't.* Atteña añña Parets Puecamquēñpa' eñotatanet, atet otanet:

—Añ pocte' o'ch sene' Bernabé ñaña Saulo ñetpa' o'ch senanet nocop. Napa' o'ch napanet ñeñtča' po'taruas pet nocop.

³ E'ñe allempopa' tore'tetset. Allempoñapa' ma'yochet. Ma'yochuetpa' o' net pot ñeshetopa' allsensarettet allcha' torroñet Yompor po'taruas.

⁴ Allsensarettet e'ñe Parets Puecamquēñočpa' ahuanmuet Seleucio. Seleuciočñapa' ahuanm̄pset boto, o' čapuet Chipro.

⁵ Allña pueblo all čapuetpa' añ pa'so'cheñ Salamina. Chapuet Salaminopa' o' ahuanmuet

* **13:2** Añ tore'teñetspa' añecop o'ch yetorra Yomporcop. Amach añecpayaye atomat, ñeñtča' añecpa mameshacop o'ch yequečpa' yerrar.

judionesha' po'prahuo allcha' serrpare'tosñañet Yompor po'ñoñ. Ñaña cotenanet Juan Marcos ñeñtcha' yenpahuē.

⁶ Atteñapa' o' ahuanmuet serrpare'tats erracmañen all oteñet Chipre. Chapuet po'poñ anetso añ pa'so'cheñ Pafos. Allñapa' entoset puesheñarr judionesha' ñeñtpa' achyo'tañ añ pa'so'cheñ Barjesús. Ñañaapa' nanac serrpare'taten, tarraña ama Yomporeye' po'ñoñ a'mteno.

⁷ Ñañaapa' chocma yemtenana ñeñt amcha'tarettetsa atet ñerra'm gobierno' ñeñt allo'tsen. Añña amcha'taretpa' añ pa'so'cheñ Sergio Paulo, ñeñtpa' nanac es eñot. Añña amcha'taretpa' o' agotatan Bernabé ñaña Saulo. Ñapa' mueneñ o'ch e'man Yompor po'ñoñ atet serrpare'tenet.

⁸ Tarraña ñeñt achyo'tañpa' ama muenatano amcha'taret o'ch ame'ña. Ñañaapa' mueneñ o'ch a'mchettanet attoch amach ame'ñacheto amcha'taret. Añ ñeñt achyo'tañpa' ñeñtara oteñet ñaña Elimas.

⁹ Allempoña Saulopa' o' huomenc cohuenan ñeñt achyo'tañ. Ñehua, Saulopa' ñeñtara oteñet ñaña Pablo. Ñañaapa' e'ñe chorreña Parets Puecamquēñ.

¹⁰ O' cohuan achyo'tañpa' atet och:

—Papa' nanac peshquēñ acheñ, nanac peyeçcaten ñeñt ama cohuenayaye. Aña pōmpor pepen oneñet. Nanac pe'moñe'teñ ñeñt poctetsa Yomporecop. Esemphuachñaca' peuna'ña atto pōten ama cohuenaye Yompor po'ñoñ. Añpa' ñeñtña po'ñoçh ñeñt cohuentetsa.

11 Te'ña Yomporpa' o'ch tsa'tatapa. Te'pa' amach pecuerro. Allponmatcha' amach penterro puetare'.

Allempocma o' checmetmara enta. All chopeñe'chenpa' attach otyenanet:

—Sanmuen, o'ch secha'nmuen.

12 O' entan añcha'tareť ateťpa' o' ame'ña. Atarr huomenc entan Yompor po'ñoñ. Allohua atet pete't all Pafoso.

Allempo ñanom asena' Pablo Asio

13 Allempoña Pablo ñaña ñeñť cotene'pa' o' ahuanñset boto o' chapuet Pergo ñeñť allara Panfilio. Chapuet Pergopa' Juanña Marcospa' o' sa'nerranet. O' alla ahurr Jerusaléño.

14 Allempoña Pablo ñaña Bernabépa' ahuanerreterr, o' chapuet anetso ñeñť pa'so'cheñ ñaña Antioquía ñeñť allara Pisidio. Allempopa' o' čhapa'muen allempo amesen judionesha' Pabloña ñaña Bernabépa' o' ahuanmuet judionesha' po'prahuo. Allñapa' anorrča'toset ñamet.

15 Allña judionesha' po'prahuopa' o' lleyoñet Moisés po'ñoñ ñaña po'poñ ñeñť a'ñtaye't ahuať Yompor po'ñoñ. Allempoña o' lleya'huetpa' añña ñeñť añcha'tarettetsa puerahuopa' atet otanet:

—Eshaste' masheñneshare echene' ñoñets attoch soctape'chateypa' ñato' o'ch seserrpare'tatey.

16 Allempoña Pablopa' o' tomospa' echantan pot attoch muetsoñeñtuet atet otanet:

—Masheñnesha judioneshacha' ñaña allohuenes ñeñtes mecha'na'tene' Yompor, se'mñoten, o'ch notas:

17 Yapa' israelena'tarey ahuať Yomporpa' e'ñe pocte' entaneť yatañneshañ. Nanac a'níratanet allempo a'pueteť Egipto. E'ñe Yompor po'huanencoťpa' o' ahuanerranet Egiptoť.

18 Ama't atomat char allempo chopeñe'cheteť amaratareropa' čhocma cohuanñpsanet e'ñe cohuen, ñato' pa'tatsoch čharra' charte' cohuanñpsanet.

19 Allempoña čhačerret alla Canaáno Yomporpa' o' huapore'tatuerran cančherr po'poñe'ttsochma acheñ ñeñť yeča'yestseť all attoch apa'yerran yatañneshañ po'patseñ, e'ñe ñocpuet ama't ñaña puechemereshacpuet.

20 Allempoñeñ ñato' cuatrocientos cincuenta charte' o' nanet ñeñťcha' añcha'tareťtatsa ñocpuet. Atteñapa' o' čhap allempo orrta ñeñť a'mťayeť Yompor po'ñoñ ahuať, añ pa'so'cheñ Samuel.

21 Allempoña acheñenesha'pa' enamet Yompor o'ch apanet puesheñarr rey ñeñťcha' nanac añcha'tareťtatsa. O' nanet añ pa'so'cheñ Saúl ñeñť Cis puechemer ñeñťara pamo'tsna'tar Benjamín. Añña Saúlpa' o' añcha'tareťta pa'tatsoch čharra' char.

22 Allempoña Yomporpa' o' puerratañper attoch o'huañ añcha'tareťta Saúlpa' o' alla nerran po'psheñeñ ñeñť pa'so'cheñ David ñeñťara Isaiť puechemer. Añ Davidpa' e'ñe pocte' eñch Yompor ñeñťo'marña ateť ot ñocop: "Davidpa' e'ñe attecma cotape'chen ateť noctape'chen na neyočhro. Ñeñťo'mar neñoteñ ñapa' o'ch ame'ña'na na e'ñe poctacma."

† 13:22 Isaípa' ñeñťara ñeñť sochenet Jesé.

²³ Alla oterraneterr Pablo:

—Ñeñt puešheñarr David po'mrenñoñ Yomporpa' o' orrtatonay yocop ñeñtey israelena'tarey ñeñtcha' ya'queshpaterre'. Añ pa'so'cheñ Jesús. Te'pa' o' etsota atet otye't Yompor ahuat.

²⁴ Tarraña ama čhena' allempoch serrpare'tos Jesúsapa' añ ñanom orrtatsa Juanañ. Ñapa' serrpare'te't atet oche't, añ pocte' o'ch yoctape'cherr ello cohuen etserra allempoñapa' o'ch yapataretta Partsocop. Atet serrpare'tatey allohueney ñeñtey israelena'tarey.

²⁵ O' e'nuamochan ñeñt po'taruas pa'pa' Juanaññapa' atet otanet: “Napa' ama añeyayno ñeñt soten ñeñtcha' Cristotats. Ñapa' te'pa' ñeñtña nocta'nene' chenta'. Napa' ama esoshe'mano attoch ama't po'sapatrechapa' o'ch nepyoñ.”

²⁶ Alla oterraneterr Pablo:

—Sapa'čo'ña masheñneshacha' pamo'tsna'tarecmas penes Abraham. Ñaña arro'tsa'yen puešheña'tets ačeñ ñeñt mecha'na'tene' Yompor. O'ch notas allohuenes, Yompor o' mueñonay cohuen ñoñets alloch yequeshperra allohueney.

²⁷ Ama't o' čhap ñeñt Cristotatspa' añña ñeñt jerusaléño'marnesha', ñaña ñeñt pa'mcha'tarefernesha' penet, ñetñapa' ama esesha' eñotaye. Ama čhapaneto pueyočhreto atet ote't ahuat ñeñt a'mtaye't Yompor po'ñoñ ñeñt čhocma lleyenet añ yetro allempocma amesenet. Ñeñto'mar te'ñapa' o' etsotatoñet Yompor po'ñoñ. Te'ñapa' o' pomet Jesús attoch muetset.

28 Ñapa' ama't ama eñalle po'chñar atta otteñe'chet attoch muetsachet. E'ñe attota enamet Pilato muetsachepa'to'.

29 Allempoña o' etsotatuoñet ora allpon atet aquellcareñ ahuatoteñ ñocoppa' o' a'suachet corsochoŕpa' o' net mapuetpono.

30 Tarraña Yomporpa' o' tantater ama't o' rromua.

31 Allempoña tantaterpa' allponmat orrtame'tnerrana ñeñt ñanom coŕa'nmue' Galileoŕ allempo on Jerusaléño. Te'pa' ñetpa' o' a'poŕoñet atto tanterra Jesús, o' a'poŕoñet allohuen acheñeneshesho.

32 Yapa'cho'ña te'pa' o'ch yeserrpare'tatas saña añ ñeñfara cohuen ñoñets. Ama't ahuat Yomporpa' otaneŕ yatañneshañ atetcha' pa esempo

33 te'ñapa' o'cho' etsota yocop ñeñfey yatañneshañ po'mrenñey. O' etsota po'ñoñ allempo tantaterran Puechemer Jesús, tarro'mar atet oteney ñeñt Salmos 2, atet Yompor otan Puechemer: "Papa' Nechemerep, te'ñapa' o'ch neñotach acheñenasha' po'ñoçh pa'apa' Nechemer nepenep."

34 Ama't ahuat Yomporpa' oteŕ o'ch tantaterpa' amach alla rromuerre'te. Ñeñŕpa' atet oteney añ ñoñets ñeñf ahuatoteñ aquellcareñ: "Po'ñoçh o'ch na'natapa paña atet na'nacha David."

35 Ñaña po'poñ capítulo Salmos all oten atet: "Yomporpa' amach muenatano Puechemer ñeñt nanac Parets o'ch puetsohua po'chets."

36 Añ ñoñetspa' yeñoteñ ama añecpayaye David tarro'mar yeñoteñ David allempo e'nuan allpon

atet muenach Yompor pamo'tsna'tarecoppa' allempoñapa' o' rroma. Allempo rromapa' o' pampuet allo'tsen pa'tañneshañ, po'chetspa' o' puetsohua epuet.

³⁷ Tarraña Jesús po'chetspa' ama puetso ama't coñe'ta tarro'mar Pomporpa' o' tantater.

³⁸ Ñeñto'marña añ poctetsa o'ch masheñneshacha' señoach añ Jesús ñeñt atet pena. Ñach yepretnerre' yo'chñar. Ñeñto'mar te'pa' o' neserrpare'tatas.

³⁹ Añ Moisés po'ñoñ ñeñt anaret ahuatoteñpa' amach errotentot yepretnaterro allo yo'chñar. Tarraña te'pa' añña yame'ñeñt Jesús pa' añepa't alloch e'ñe apretna'huaretterra yo'chñar.

⁴⁰ Alla oterrerr Pablo:

—Te'pa' secuach, o'ch soctape'ch cohuen te't huaponasa ñeñt atet ote't ñeñt a'mtaye't ahua't Yompor po'ñoñ. Atet otete't ahua't:

⁴¹ Se'mñot ñeñtes achmãare'tets, te't secuanrrorteño'ta sechenca'huerra. Te'pa' allempo ora socrenmeñpa' napa' o'ch norrtatonas ñeñt ama sentare. Tarraña ñato' sapa' amach same'ño ama'tcha' serrpare'tataset. Añpa' allohua huañ atet serrpare'tatanet Pablo.

⁴² Allempoña cha'nmaçherret acheñenesha'ñapa' atet ochet Pablo huapuepa'to' po'poñ semana o'ch serrpare'taterraneterr po'pocheño añ ye'tro allempocma amesenet.

⁴³ Allempo ahuanerretpa' shonte' judionesha' o' co'ta'huanerret Pablo ñaña Bernabé. Ñaña o' co'ta'huaner shonte' ñeñt ama judioneshayaye tarraña ñetpa' o' ame'ñatanet judionesha'

ahuañacma. Añña Pablo ñaña Bernabé serrpare'tatanet o' cotape'chatanet attoch chocma o'ch cotape'choñet Yompor pomuereña.

⁴⁴ Po'poñ semana o' çherrerr allempo amesenet. Huaçhenerr shonte' acheñenesha' o'ch e'mñnoteneterr Yompor po'ñoñ. Autsa ora allohuen acheñenesha' ñeñt yeçhetsa all e'ñe huaçha'tuet.

⁴⁵ Allempoña judionesha' ñeñt ama ame'ñetsopa' o' eñchet shonte' acheñ huaçha'tatsapa', puesope'cheñoçetpa' o' cohuana'chet Pablo. Ñeñt atet oten Pablopa' ñetña'pa' o'ch otenet ama atteyaye. Nanac achmāre'chet.

⁴⁶ Tarraña ama mecha'to Pablo ñaña Bernabé. O' serrpare'tet huomenc, atet otet:

—Añ poctetsa o'ch yeserrpare'tatas sanom Yompor po'ñoñ, tarro'mar sapa' judioneshas. Tarraña ñerra'm sapa' ama semno, ñerra'm ama pocteye' señche attoch sapa' corretsasach e'ñe tayoteñ errponañohuen, amach erroç yepaso. Te'pa' añach yeserrpare'tat ñeñt ama judioneshayaye.

⁴⁷ Tarro'mar atet oteney Yompor po'ñoñoç, arr oteney atet:

Napa' o'ch nenas sa atet ñerra'm puetare', sach a'puetarsañpsats. O'ch sa'puetarsañpsoñ po'poñ acheñ poçta'pña ñeñt ama judioneshayaye. Ama't allohuen acheñenesha' ora allohuanen patspa' o'ch peñotatuanet attoch qeshperret.

⁴⁸ Allempoña ñeñta e'mhuet añ ñoñetspa' añña ñeñt ama judioneshayaye atarr coshet, nanac cohuen eñchet Yompor po'ñoñ. Allempoña'pa' o'

ame'ñenet allohuen ñeñt o' anare'tta attoch ñetpa' corretsetach tayoteñ e'ñe errronañohuen.

⁴⁹ Atteñapa' o' epa'hua Yompor po'ñoñ erracmañen.

⁵⁰ Tarraña puesheña'tets judionesha' o' cotape'chachet acheñenesha' attoch o'ch huapore'tateret Pablo ñaña Bernabé. Añña ñeñt atet cotape'ch coyaneshachno ñeñt cohuen entaprete' acheñenesha' tarro'mar añ coyanesha' e'ñe cohuen cotape'che't Partsocop. Ñaña ñeñt amcha'tarettetsa all, judionesha'pa' o' e'moñe'tachet Pablo ñaña Bernabé. Ñeñto'marña orrtatet atsrre'mueñets o' huapore'tateret Pablo ñaña Bernabé.

⁵¹ Ahuanenetpa' o' pa'shetca'tnenet po'patser pa'tcoñ attoch eñoch judionesha' ama pocteye' entaretteto ñeñt atet o' pñohuet, te'ñapa' amach alla huaçherrete'te. Allempoñapa' ahuanmuet ñaña Iconio.

⁵² Tarraña ñeñt o' ame'ña'hua all Antioquíopa', ñetñapa' nanac coshenet, ñaña o' chorraret Parets Puecamquëñ.

14

Allempo çhapuet ñaña anetso pa'so'cheñ Iconio

¹ Allempoña çhapuet Iconiopa' o' be'toscha'tet parro judionesha' po'prahuopa' o' serrpare'tatoset all. Nanac cohuen serrpare'tatet ñeñto'marña ame'ñachet shonte' acheñenesha' — ama't judionesha' ñaña ama't ñeñt griegonesha'.

² Añña judionesha' ñeñt atpare'tene' Yompor po'ñoñ ñetñapa' toma'tamñset Pablo ñaña Bernabé. Nanac sasare'teñet taye'to' acheñenesha' ñeñt

ama judioneshayayepa' cohuen enteññañet atto serrpare'ten.

³ Tarraña ama't e'moñe'tanet patantarr acheñenesha'pa' ñetñapa' ama mecha'teto. Alla atomatet serrpare'tet Yompor po'ñoñ. Orrtatet ñeñt' acheñenesha' ama puentareto ñeñtña eñotatahuet po'ñoçh atto serrpare'tenetpa' añmapa' Yompor pomuereñoť huapanet añ ñoñets. Yomporpa' nanac ahuamencat panet.

⁴ Atteñapa' añña patantarr acheñenesha'pa' e'ñe cohuen enteñet atet serrpare'tatanet Pablo ñaña Bernabé. Tarraña po'potantañña'pa' ama. Ñetñapa' añña ame'ñatahuet judionesha'. Ñeñto'marña ama patrraye' cotape'chenoña acheñenesha' all.

⁵ Atteñapa' o'pacha shonte' judionesha' ama't ñaña ñeñt' ama judioneshayaye ñaña ñeñt' añcha'tareteçhnopa' o'pacha o'ch rromuet huomencpa' o'ch rrolle'chet.

⁶ O' e'mare'chet çha o'patarettenetpa' añña Pablo ñaña Bernabépa' o' yeterretpa' ahuanmuet ñaña Listro. Chapuet Listropa' çha asuanmuetpa' o' metet ñaña Derbo. Añpa' ñeñtara anets all otenet Licaonia. Erracmañen chopeñe'chet allo'mar.

⁷ All chopeñe'chnenetpa' all serrpare'tnenet Yompor po'ñoñ.

Allempo çhapuet ñaña anetso pa'so'cheñ Listra

⁸ Allempo Listro'tsenetpa' allñapa' allo'tsen puesheñarr acheñ, çha echarrtena pa'tac, ama eshcaye' chope'cheno, ama't ahuatoteñ ñapa' atta eñalletña. Ñaña'pa' alla anen.

⁹ Allña anenpa' alla e'mñnoten an atet serrpare'ten Pablo. Pabloñapa' cohue' allapa' o' eñoch añ acheñpa' o' yemtana Yompor ñapa' o'ch a'crrater.

¹⁰ Ñeñto'marña Pablopa' atet och huomenc:

—O'ch notaḡ, o'ch ḡaten.

Ahuepa'tcha' tanta allempocma allorocma čha chope'chnets.

¹¹ Allempo eñch allohuen acheñenesha'pa' čha rrannartet. Pocsheñofetpa' atet otet:

—¡Partsepa't! Ñeñt Parets yepen ñeñtepa't puenasetsa acheñ. Te'pa' o' čhap e'ñe yesho. Añpa' atet otet po'ñoñeto ñeñt Licaonačh.

¹² Añña Bernabépa' o' sochet, atet otet:

—Añepa't ñeñt yeyomporer Júpiter.

Pabloñapa' sochet ñapa' añ ñeñt po'yompor-ret Mercurio. Tarro'mar sochet atet ñapa' nanac serrpare'ten cohuen atet ñerra'm po'yompor-ret Mercurio.

¹³ Nehua, acheñenesha' allpa' echenet po'prahua' allecmach ma'yochyete't po'yompor-ret ñeñt otenet Júpiter. Ñeñtpa' e'ñe ñehuapo't anaret allempopa' o'ch taya yerrofa'nmos pa'netsreto. Ñeñt corneshatets puerahuopa' o' huapa. Huapatan huaquësh, huapatan ñaña shonte'ror. Mueneñ o'ch muetset huaquësh Pablocop ñaña Bernabécop tarro'mar chocma muetsete't huaquësh po'yompor-recop. Ñaña tarro'mar atet muenen acheñenesha'. Ñetpa' čha otenapuetañ Pablo ñaña Bernabépa' añte' ñeñt po'yomporer penet.

14 Allempoña eñoch Pablo ñaña Bernabé ñeñt atet pena acheñenesha'pa' nanac lleca'rrtet. Puelquëñoftetpa' o' rrarre'tet pa'shtampa' o' matrra'tet allo'tsa'yen acheñenesha'. O' rrannaretnomuet, puerranarotetpa'

15 atet otet:

—Eso'marte'ca'ye masheñneshacha' atet sepena. Yapa'cho' arromñaŕeya attey ñerra'm sa. Ñeñto'marña o' yeserrpare'tatas cohuen ñoñets attotcha' sequechpuerr ñeñt atet sepena ñeñt e'ñe orrena. Te'pa' añña poctetsa o'ch same'ñera Yompor ñeñt ama arromñaŕeshayaye, ñeñtara Yompor ñeñt yeçhcate' enet ñaña pats ñaña ñeñt añecmuen sa'p. Ñaña ora allohuen ñeñt yentyen ento ñaña ñeñt yentyen patsopa' ña yeçhcatue' ñaña ñeñt sapo'tsen ña yeçhcatue'.

16 Alla oterraneterr Pablo:

—Ahuat Yomporpa' muenatan acheñenesha' o'ch pa'yaset ñeñt atet muena'yenet e'ñe ñañeñeta.

17 Tarraña ama a'ypo'ñano acheñenesha'. Chocma apanete't attoch eñochet po'ñoçh eñall Yompor. Chocma mueranete't ñeñto'marña chocma huatache't ñocpuet attot yeçhcanete't puenarmet, atto eñalletete't puerraret atto coshete't. Añpa' ñeñta ñeñt atet otan Pablo allohuen acheñenesha'.

18 Tarraña ama't atet otan acheñenesha'pa' o' alla muenereterr o'ch muetset huaquësh ñocpuet atet pete't po'yompor-recop. Tarraña Pablo ñaña Bernabépa' ama muenataneto.

19 O' atomatpa' huaçha'ta puesheña'tets judionesha' ñeñt huetsa Antioquíot ñaña

Iconioŧ. Coŧape'chatoset acheñenesha' po'poñ. E'moñe'tachet Pablo. Atteñapa' rrolle'chet Pablo. Rrolle'tuetpa' čha otapuetañ o'te' rroma. Chetare'tnomet puebloŧ a'yenet.

²⁰ Ñeñña ame'ñatsapa' alla arrotanñpeñet alla cohueñetpa' ñañaapa' ahuepa'tcha' alla tanterra, o' alla ahuerterr pueblo. Tsapañapa' Pablo ñaña Bernabépa' ahuanerret alla Derŧo.

²¹ Chapuet Derŧopa' serrpare'tuerreterr Yompor po'ñoñ ñaña all. Shonte' acheñ ñeññ allo'tsen ame'ñenet ñamet. Allempoñapa' ahuanerreterr Listro, ñaña asuerreta' Iconio ñaña Antioquío.

²² Ora allohuanen ta'yeset yenpuet ñeññ ame'ñetsa attotcha' huomenc pet pueyočer. O' coŧape'chatanet ñaña attoch čhocma yemchet Yompor ama't esempo huapanet mueročteñets. Tarro'mar e'ñe yemueročteñoŧ yečapcha' all anča'tareñtena Yompor.

²³ O' na'yeset puesheña'tets acheñ ñeññča' pompor pa'yes ñeññ pame'ñeñoŧ apča'yetsa. Pueŧore'teñoŧetpa' o' ma'yochamñpesyet ñeññča' pompornesha' pa'yeset, atet ochet:

—Yomporepa'ch seyenpue', ñeññara Yompor ñeññ o' same'ña'huerra.

Atet pa'yeset ora allohuen anetso all ame'ña'yesa acheñenesha'.

Allempo čhačerret alla Antioquío allot ahuanmuet ahuaña

²⁴ Allempoñapa' asuanerret Pisidio'mar allotpa' ahuanerret Panfilio. Cherret anetso ñeññ pa'so'cheñ Perge.

²⁵ Serrpare'tuerreterr Yompor po'ñoñ all Pergo, allempoñapa' ahuanmuet ñaña Atalio.

²⁶ Chapuet Ataliopa' alloñapa' ahuanm̄set boto, o' alla čačherret Antioquío ñeñtara anets alloť ahuaña ñeñt ame'ñetsa all ma'yochan̄psapanet attoch yenpanet Yompor esheccha' etsotoñet po'taruas. Te'ñapa' o' e'nuet.

²⁷ O' čačherret allpa' apčhachet allohuen ñeñt ame'ñetsapa' serrpare'tatueret ora allohuen atto Yomporpa' yenpanet. O' serrpare'tatanet atto Yompor a'pochtatanet, añe'na serrpare'tatet ñeñt ama judioneshayaye, añecop attoch ame'ñerret ñamet.

²⁸ Alla atomatet parro epuet ñeñt ame'ñetsa.

15

Allempo a'pochtachet Jerusaléño ñeñticha' atet pet

¹ Atteñapa' čhap ñaña acheñ ñeñt huetsa Judeot. Chapuetpa' o' yečhatoset ñeñt ame'ñetsa all, atet otosanet:

—Te'pa' aña sepalltena attoch sequeshperra o'ch setsorranna'ta ñeñtes asheñorres atet yeyčhena ya allempoteñ atet yečhaterrey Moisés.

² Añña Pablo ñaña Bernabépa' ama pocteye' eñcheto atet. Ñetpa' atet otet:

—Ama po'ñočhaye' añ palltetso o'ch yetsorranna'ta ñeñtey asheñorrey.

Ñetñapa' alla nanac es otanna'tet. Ama a'pochtacheto. Ñeñto'marña allempopa' o' net Pablo ñaña Bernabé ñaña po'poñečno acheñ attoch ñetpa' o'ch ahuanmuet Jerusaléño o'ch enteñeta' Jesús puellsensarnesha' ñaña ñeñt

pompornesha' pen ñeñt̃ ame'ñetsa all. Añecop tet attoch o'ch a'p̃to'teneta' erra'tsente' pocte' ñeñt̃cha' atet̃ pet.

³ O' so'tuanma ñeñt̃ ame'ñetsapa' ahuanmuet. Arr oñmuet Fenicio'mar allotñapa' ahuanmuet Samario'mar. Allña oñemuanmuetpa' all serrpare'tyesnomuet. Añ serrpare'tyesnomuet atto o' ame'ña ñeñt̃ ama judioneshayaye. Pame'ñeñotetpa' o' a'ypo'ña'huerret ñeñt̃ ahuať poctap̃ñet. Ñeñt̃ña nanac coshate'ña allohuen ñeñt̃ ame'ñetsa.

⁴ O' chapuet Jerusaléñopa' e'ñe cohuen agapanet Jesús puellsensarnesha' ñaña ñeñt̃ pompornesha' pen ñeñt̃ ame'ñetsa all. Ñaña allohuen ñeñt̃ ame'ñetsa allpa' o' agapanet e'ñe cohuen. Allempoñapa' serrpare'tatoset ora allohuen atet̃ yepanet Yompor.

⁵ Tarraña patantarr fariseonesha' ñeñt̃ ame'ñetsapa' o' tantapa' atet̃ ot:

—Acheñ ñeñt̃ ama't ama judioneshayaye, añ palltetsa o'ch atsorrarett̃a allohuen asheñornesha', ñaña allohuenetpa' otarett̃etepa' añ palltetsa o'ch ame'ñeññañet ñaña Moisés po'ñoñ ñeñt̃ atet̃ anaret̃ ahuatoteñ.

⁶ Ñeñto'marña Jesús puellsensarnesha', ñaña ñeñt̃ pompornesha' pen ñeñt̃ ame'ñetsa allpa' o' apchet attoch a'poc̃tchet este' poc̃tetsa ñeñt̃cha' atet̃ pet.

⁷ Ñeñto'marña alla nanac es otanna'tyeset. Allempoñapa' o' tanta Pedro. Tantapa' atet̃ otanet:

—Sapa' señoñe'tña masheñneshacha' ahuaña Yomporpa' o' na'n na. Añecop na'n o'ch ne-

serrpare'tach ama't ñeñt̃ ama judioneshayaye. O'ch neserrpare'tatanet Yompor po'ñoñ attoch ame'ñerret ñamet.

⁸ Ñehua, Yomporpa' entennay yeyo'cher. Ñapa' eñoteñ ama't añ ñeñt̃ ama judioneshayaye o' ame'ñyet pueyo'chreto. Ñeñto'marña o' chorratanet Puecamquëñ attecma atet chorrenya yaña. Attoña eñotatay e'ñe pocte' entenamet ñamet.

⁹ Ñeñto'mar yeñoteñ ama yaptayaya morrentenyo Yompor. Añña ama't ñetpa' morrentenanet ama't ñeñt̃ ama judioneshayaye. Pame'ñeño'tetpa' ahuo't e'shohuerranet po'chñar ñeñt̃ pueyo'chro'tsa'yenet.

¹⁰ Te'ñapa' eso'mare'tña ama pocteye' senteñe ñeñt̃ atet o' p̃ohua Yompor. Añecop ñeñt̃ ame'ñetsapa' eso'mare'tña semneñ o'ch senanet ñeñt̃ nanac torrapo' entenet. Ama't ya judioneshaypa' amach erro'teno o'ch yetsotua allohuen ñeñt̃ atet anaret. Ama't yatañeshañpa'cho'ña ama etsotete'te.

¹¹ Añcha'ña yeñot e'ñe Yepartseshar Jesús po-muereño'tpa' o'ch yequeshpa, attecma ch qeshpet ñamet.

¹² Ñeñta e'm allohuen ñeñt̃ ap'chatsa allpa' alla moma'rrtet. Atto e'mñochet. Bernabé ñaña Pablopa' ña nanac serrpare'tatahuet. Añ serrpare'tatanet atto Yomporpa' nanac ahua'mencat p̃anet ahuaña allempo serrpare'teneta' allo'tsa'yen ñeñt̃ ama judioneshayaye. Ñeñto'marña orrtatanet ñeñt̃ ama puentareto ñeñt̃cha' eñotatahuet añmapa' po'ño'ch Yomporesho't huena.

13 O' serrpare'tuetpa' allempoñapa' atet ot ñaña Jacobo.

—O'ch masheñeshacha' se'mñoten namã.

14 Simón Pedropa' o' serrpare'tatuas atet Yompor te'pa' o' orrtatan pomuereña añecop ñeñt ama't ama judioneshayaye. Ñaña ahuo't orrtatan pomuereña añecop ñeñtcha' ame'ñatahuet attoch aye'chochtatoñet Yompor pa'so'cheñ ñamet.

15 Po'ñoçh te'pa' o' etsota ñeñt atet oteney ñeñt a'mtaye't Yompor po'ñoñ ahuat. Añpa' ñeñt atet quellquë't ahuat atet ñerra'm Yompor otatset:

16 Allempo o'ch meten shonte' charpa' napa' o'ch alla norrtater puesheñarr ñeñt David po'mrenñoñ ñeñtcha' ahuaencattatsa atet ahuaencatte't ahuat pa'tañ David. Tarro'mar shonte' char ama't puesheñarrapa' ama orrteno David po'mrenñoñ ñeñt nanac ahuaencat.

17 Añecopcha' norrtater allochñapa' ama't po'poñechno acheñenesha' ama't ñeñt ama judioneshayaye o'ch ame'ña'hueret ñamet Yompor, ñaña allohuen erra'tsencha' muenats.

18 Atet ot Yompor ñeñtara ñeñt eñotatay ahuatoteñ ñeñtcha' atet pa. Añpa' allohua ot ñeñt a'mtaye't Yompor po'ñoñ ahuat.

19 Alla oterrerr Jacobo:

—Te'pa' añña e'ñe pocte' nenten na amach ya'mñechatatsche ñeñt ama judioneshayaye ñeñt o' puesuerran ñeñt ahuat poctaþña attoch ame'ñeret Yompor.

20 Te'pa' añña pocte' o'ch yequellcanet ñeñtcha' ama þatsteto ñeñtþa' añ: Amach rratsteto

po'chets ñeñt muetsenet ayečcataretēcop ñeñt po'yomporer pen ñeñt ama judioneshayaye ñeñtara ñeñt ama ame'ñetso. Ñaña o'ch yot Janet amach chetapretatsteto taporets. Ñaña o'ch yot Janet amach rratsteto ñeñt muetsenet ñeñt atta a'pañareṭ, ñaña amach rratsteto ñeñt ño'shetsa oño. Ñaña amach es rratsteto es po'rras.

21 Alla oterrerr Jacobo:

—Añpa' ñeñtach atē yequellcanet. Tarro'mar ahuaṭoteñ o' serrpare'tuoñet Moisés po'ñoñ ora allohuen anetso'mar. Ñaña paṭe'tets semana añ judionesha'pa' čhocma lleyeññañet Moisés po'ñoñ all po'prahueto. Añpa' allohua atē ot Janet Jacobo.

22 Allempoñapa' o' a'pocṭachet o'ch net puešheña'tets ñeñt e'ñe allo'marnesha' ñeñtcha' mueñet Antioquío, o'ch coṭeret Pablo ñaña Bernabé. Atēpa' e'ñe pocte' eñch allohuen—Jesús puellsensarnesha' ñaña ñeñt pompornesha' penet, ama't ñaña allohuen ñeñt ame'ñetsa all. Añ net Judas Barsabás ñaña Silas. Añña epsheña ačeñpa' e'ñe cohuen eñch allohuen ñeñt ame'ñetsa.

23 Ñetpa' o' anmuet, ñeñt atē oten carta:

“Masheñeshacha' ñeñtes yečhetsa anetso Antioquío ñaña Sirio ñaña Cilicio: Allohueney ñeñtey ame'ñetsa o'ch yehuomčha'tas sa añ yecartot —ñeñtey Jesús puellsensarneshay ñaña ñeñtey pompornesha' pen ñeñt ame'ñetsa arr. O'ch yehuomčha'tas sa ñeñtes ame'ñetsa saña ñaña ama't ñeñtes ama judioneshayayso.

24 O'ch yotas, yapa' o' ye'mare'ch o' čhap se-sho puesheña'tets acheñ arroť ñeññ muenets o'ch a'mñechatasa. Ñetñapa' o' nanac moññe'tatasa soctapña. Tarraña te'ñapa' o'ch yotas, añ acheñpa' ama yaye' mueñenaye.

25 Ñeñño'mar pocte' yenteñ allohueney o'ch yene' epsheña acheñ ñeñtcha' yemñonas epuet Bernabé ñaña Pablo ñeññ nanac yemuerena.

26 Tarro'mar nanac yemorrentenanet ahuañapa' all serrpare'teneta' autsañ muene' amtsanatareťetuet all. Tarro'mar e'ñe puemorrenteñoťet Yepartseshar Jesucristo atet aťpareťtet.

27 Añ yemñonas Judas ñaña Silas. Ñetpa' o'ch serrpare'tatenseta' ora atet yoten ya arr.

28 Parets Puecamquēñpa' o' eñotatey ñeññ e'ñe pocte' yenten ñeñtcha' yenonas. Amach aña yenonaso ñeññ nanac torrapo'. Te'pa' añ palltetsa ñeñtcha' atet sepa.

29 Amach serratsto po'chets ñeññ muetsenet ayečcatareťecop ñeññ po'yomporer penet. Ñaña amach serratsto ñeññ muetsenet ñeññ atťa a'pañareť. Ñaña amach serratsto es po'rras. Ñaña amach sečtapretatsto řaporets. Ñerra'm amach atet sepo ñeñtpa' e'ñech pocte'. Añpa' ñeñtch yotas. Yomporepa'ch sa'nataya." Añpa' allohua huañ ñeññ atet oten carta.

30 Allempoñapa' o' mueñet Judas ñaña Silas epuet Pablo ñaña Bernabé. O' ahuanerret Antioquío. Chačerret Antioquíopa' o' apčhatuet allohuen acheñenesha'pa' o' aposanet añ carta.

31 Ñeññ apčhatsapa' o' lleyet añ carta.

Lleya'huetpa' nanac coshatanet ñeñt atet actape'chatarettet cartoť.

³² Añña Judas ñaña Silas, ñetpa'cho'ña nanac a'potoñet Yompor po'ñoñ ñamet. Ñetpa'cho'ña a'mtenet Yompor po'ñoñ. Nanac serrpare'tatet. O' cotape'chachet e'ñe cohuen ñeñt ame'ñetsa allochñapa' huomenccha' pet pueyočher.

³³ O' allponmatet allpa' allempoñapa' secherret alloť amñareťtet ahuaña. Ñeñt ame'ñatsa Antioquíopa' o' so'tneret e'ñe cohuen, otanet:

—Yomporepa'chña ya'nataya parro allohueney.

³⁴ Tarraña Silaspa' mueneñ o'ch a'pa all, Judaspa' o'ch ahuer.

³⁵ Añña Pablo ñaña Bernabé allponmaterret Antioquí. Yečhatapretereta' epuet po'poñečno ñeñt yečhatets all. Serrpare'tapretereta' Yompor poñoñ epuet po'poñečno.

Allempo puepocheño ahuererr Pablo serrpare'tats allemeñ anetso'mar

³⁶ Atteñapa' o' atomat Pabloñapa' otan Bernabé:

—O'ch ahuerrey, o'ch yabčhera' ñeñt ame'ñetsa ora allohuen anetso all yeserrpare'toñ Yompor po'ñoñ ahuaña attoch yeñoč erroťenette'ña te'.

³⁷ Bernabéñapa' aña e'ñe pocte' ent o'ch coťa'ner Juan Marcos.

³⁸ Tarraña Pablopa' ama pocteye' eñche tarro'mar ahuaña allempo čhapuet Panfilio, Juan Marcospa' čha sa'nerranet, o' puerrerra. Ama allo'na yenpuenaneto all serrpare'tyeset.

³⁹ Ama erroťeno a'poctacheto, čha sa'nannerret. Bernabépa' aña aner Marcos. O' ahuañpset boto, čačherret Chipro.

40 Pabloñapa' aña e'ñe pocte' ent o'ch anerran Silas. Ñeñt ame'ñetsa allpa' o' so'tneret, e'ñe cohuen otneret:

—Yompor e'ñe pomuereño'tpa' a'natyepa'ch.

Allempoñapa' ahuanenet.

41 Asueneta' Sirio'mar ñaña Cilicio'mar. Allo'tñapa' yenpuet allohuen ñeñt pame'ñeño't ap'chetsa parro. O' yenpuet añecop attoch huomencccha' pet pueyo'cher.

16

Allempo Timoteopa' cota'nerran Pablo ñaña Silas

1 Pablo ñaña Silaspa' asuerreta' anetso añ pa'so'cheñ Derbe. Allo'tñapa' ahuanerret alla Listro. Allñapa' allo'tsen puesheñarr acheñ ñeñt ame'ñetsa añ pa'so'cheñ Timoteo. Ñeñt Timoteopa' añ pachor pen judionesha' ñeñt ame'ñetsa. Pomporñapa' ama judioneshayaye aña griegonesha'.

2 Ñeñt ame'ñetsa Listro ñaña Iconiopa' nanac cohuen enteñet Timoteo.

3 Ñeño'marña e'ñe pocte' eñch Pablo o'ch cota'nerranet Timoteo. Tarraña ato'tña anemhueta' allcha' tsorreñet atet ye'chena joreyonesha', tarro'mar allcha' tetpa' shonte' judionesha'. (Ñehua, Pablopa' ama mueno o'ch atsrre'mach judionesha'.) Allohuenetpa' o' eño'tuet ñeñt Timoteo pomporpa' ñeñt ama judioneshayaye aña griegonesha'.

4 All oñomyeset allemeñ añetsopa' otuosanet añ ñoñets atet a'pocstat Jesús puellsensarnesha'

ñaña ñeñt pompornesha' penet Jerusaléño. Añ eñotatuosanet ñeñtcha' atet pet.

5 Atteñapa' allohuen ñeñt ame'ñetsapa' e'ñe pame'ñeñotet allo'na senet huomenc pa'nmuet pueyoçher. Pate'tets yetpa' allo'na sen atonetnomtsa ñeñt ame'ñetsa.

Allempo Pablopa' entan macedonio'marnesha' atet ñerra'm cho çhopo'teñ

6 Allempoñapa' arr asuerreta' ñaña Frigio'mar ñaña Galacio'mar tarro'mar Parets Puecamquëñpa' ama muenataneto o'ch serrpare'toñet Yompor po'ñoñ all Asia'mar.

7 Allempoñapa' ahuanmuet ñaña tenonet, çhappochet Misio ñaña arr sechet Bitinio'mar, tarraña Jesús Puecamquëñpa' ama muenataneto.

8 Atteñapa' metuet Misio'mar o' çaça'tet Troaso.

9 Chaça'tet Troaso tsapoñapa' añña Pablopa' orrtña atet ñerra'm cho es yeçhopo'ten. Atet ñerra'm pueçhopoñoñpa' o' entan puesheñarr acheñ macedonio'marnesha' alla ten, atet otare'ch: "O'ch sonaça't arr Macedonio, o'ch seyenpuenya'."

10 Allempoña errte' orretuoña macedonio'marnesha'pa' yañapa'* o' yesecha o'ch ahuey Macedonio, tarro'mar yoten po'ñoçhte' çhore'teney Yompor allochñapa' o'ch yeserrpare'teññaña' po'ñoñ all Macedonio.

Allempo çhap Pablo ñaña Silas Filiposo

11 Allempoña Troaso'tpa' año ahuañpsey boto. E'ñe paçharra yepe' o'ch yeçhap anetso añ

* **16:10** Ñehua, e'ñe allempocmapa' o' cota'nmanet ñaña Lucas, ñeñfara ñeñt quellquë' añ ñoñets.

pa'so'cheñ Samotracia. Allñapa' all yetsotnoma. Yahuanerrerr alloŧpa' tsapañña' o' yečhap ñaña anetso Neápoliso. Allñapa' all yetsotuerrerr.

¹² Yahuanerrerr alloŧpa' o' yečhap ñaña anetso añ pa'so'cheñ Filipos allpa'čho' all yetsotosa. Añ anets Filipospa' nanac atarr anets. Po'poñečno anets alla Macedonio'marpa' ama atarroyaye. Allñapa' allo'tsa'yen shonte' soltarnesha' ñeñt romo'marnesha'. Yapa' alla ya'llponmatoes all.

¹³ Allempoña čhap allempo amesen judionesha'pa' yañapa' yahuanma anetsot a'yo. O' yečhap ontapo all ye'nen ñato' allcha' ma'yochet. Yaña allpa' yentos puesheña'tets coyaneshačno all anorrčhenet. Yañapa' o'čho' yanorrča'tos yaña. Allempoña yapa' yeserrpare'tatanet Yompor po'ñoñ.

¹⁴ Puesheñarr coyanesha' ñeñt allo'tsen añ pa'so'cheñ Lidia ñeñt huetsa anetsot añ pa'so'cheñ Tiatira. Ñañaapa' aña po'taruas pen atto vendenan shetamuets yetsñorromamuen. Ñañaapa' ame'ñenana Parets. Allempoña e'mñotan Pablo ñeñt atet serrpare'ten aña Yomporpa' o' čhapatoñ pueyočhro ñeñt atet serrpare'ten Pablo.

¹⁵ Lidiaña pame'ñeñoŧpa' allenta apatareŧta, ñaña o' apatareŧta ñeñt parro yečhenet pocollo. Ñañaapa' o'čho' hua'ña'nerrey pa'paclo, atet ot:

—Ñerra'm e'ñe pocte' sentenen atto name'ñera Yepapar, o'ch sehuapa nepaclo ñato' allcha' som-mosa.

Ñañaapa' otare'tey yonepa'to' ñeñto'marña yapa' o' ahuey.

¹⁶ Parrochñapa' allempo yeta ontapo

allecma ma'yochenet toñoñapa' yentnomñ puesheñarr shopshesha' ñeññ chorrena oneñeñ. Añña oneñetpa' ñach eñoratene' shopshesha' ñeñto'marña ñerra'm erroten otanetpa' atto'chcho' pa. Amach pueno po'ñoñ ama't mamesha. Añña shopshesha'pa' eñall ñeññ pamo'mte' pen po'poñechno acheñ. Ñetñapa' nanaccha' ganatenanet quelle atto eñotañtena.

17 Ñañaapa' chocmach cota'nomye't epay Pablo. O'ch cota'nmueypa' o'ch rranare'tnoma chenta'pa' atetcha' ot:

—Añ encaneshachnopa' añ sherbenet Yepapar Ñeññ Nanac Parets. Arrpa' añecop huenet attoch o'ch serrpare'tataset attoch sequeshperra.

18 Atteñapa' ama't atomatpa' attecmach pena. Atteñapa' o' a'mñechatana Pablo. Pabloñapa' allenta puetallsapa' o' otan oneñeñ:

—Te'pa' e'ñe po'huamencot Jesucristopa' o'ch notañ, pequechpa'ner shopshesha'.

Allempocmuepa'tcha' quechpa'nerran shopshesha'.

19 Añña pamo'mtaynesha'pa' cotape'chetpa' otet:

—Te'pa' llequëñtsa, o' huañerr allo yeganena quelle.

Allempoña pa'tsrre'mueñoñetpa' o' rromuet Pablo ñaña Silaspa' anmarettet e'ñe po'huamencocma, o' achapataretet allo'tsa'yen añcha'taretnesha' allecma a'pocmatenet ñoñets.

20 Allempoña achapataretet allo'tsa'yen guardia pa'mcha'taretnesha'pa' o' otoset:

—Añmapa' ñeññ judionesha'. Nanac
atsrre'moçhtenet arr ya'netsro.

21 Ñetpa' yeçhatenyet atet yeçhenet ñet
ñeññpa' ama pocteye' yenteñe ya. Yapa'
romo'marneshaypa' ama cohuen yenteñe o'ch
atet yeña.

22 Allohuen acheñenesha'pa' nanac
atsrre'mateñet. Ñeñña guardia
pa'micha'tareternesha'pa' atet otan pueyochre-
sha':

—Te'pa' o'ch serrotanetpa' o'ch senallanet.

23 Allempoñapa' o' nallet Pablo ñaña Silas nanac
huomenc. Allempoña o' anallaretetuetpa' o'
abe'tarettet ñaña cárcel; atet ochet ñeññ co-
huam̃pene' cárcel:

—O'ch secuam̃psanet e'ñe huomenc.

24 Allempoña atet otaretetuetpa' añña ñeññ co-
huam̃pene' cárcelpa' o' abe'tanet nanac o'pono.
Allñapa' nanac echarr p̃am̃psanet ñaña o' ar-
matar̃psarettet pa'tcoť tablat e'ñe echarr.

25-26 Atteñapa' o' ma'yocha Pablo ñaña Silas.
Ñaña o' morrechet, puemorrecheñoťetpa' nanac
aye'choçhtateññañet Yompor. Añña po'poñeçhno
acheñ ñeññ abe'taret ñaña allpa' ñetñapa' o'
e'mñotanet. Allempoña çhap rroçh tsappa'
machayotepa'tcha' pella pats nanac huomenc,
ama't allo' tomatenet echarr cárcelepopa' çha
pa'shma huomenc. Puepelleñoť pats huomencpa'
o' torna'tua ora allpon all ayottam̃psarettenet.
Ñaña ora allpon allo huanquëñet acheña' o'
pueyna'tuen.

27 Allempoña ahuo't e'mansa ñeñtã cohuanmpene' cárcelepopa' ahuo't entan o' torna'tuen allo ayotam̃psarettenetpa' o' chetan po'cchell o'ch muetsa ñañaña. Ñapa' cho' otapañ ñeñtã ayottam̃psaretpa' o'te' yetuena.

28 Añña Pablopa' o' chore'ch huomencpa' atet och:

—Amach erroť peřatsto ama't mamesha. Yapa' allo'tsa'yenya allohueney.

29 Allempoñapa' aña enamnom lampareña'pa' mata allo'tsen Pablo ñaña Silas. Puenm̃chañoťpa' cha pa'shmuena ñaña e'ñe puenm̃cha'na'teñoťpa' o' concorposa e'ñe ñesheto.

30 O' cha'nmača'tatanetpa' atet otanet:

—Nomporneshacha' ¿este'ña pocte' te' ñeñtcha' atet neřa attoch nequeshperra naña?

31 Ñetñapa' atet ochet:

—Añ pocte' o'ch pame'ñera Yepartseshar Jesucristo, allochñapa' attoch pequeshperra. Ñaña attoch queshperra ñeñtã parro peyčhena pepaclo.

32 Allempoña ñeñtã cohuanmpene' cárcelepopa' o' a'secherranet pa'paclo, allñapa' serrpare'tachet Yompor po'ñon, ñaña allohuen ñeñtã pa'paclo'tsen o' e'm̃ñotet ñamet.

33 Allempocma ñeñte tsaprocma o' e'pana'tyerranet all atserrparettet. Allempoñapa' o' apatareťta ña, ñaña allohuen ñeñtã pa'paclo'tsa'yenpa'cho'ña o' apatareťtet ñamet.

34 A'tapatanet pa'paclopa' rratanet. Pame'ñeñoť Yompor atarr nanac cosha. Ñaña allohuen ñeñtã pa'paclo'tsenpa' atarr coshet ñamet.

35 Tsapať puetarenpa' añña guardia pa'mcha'tareťernesha' o' mueñet puesheñarr guardia, ñeñcha' otosets:

—O'ch sa'rroyer Pablo ñaña Silas.

36 Ñeñť cohuanmpene' cárcelpa' atet otañ Pablo:

—Oten añcha'tareť secha'nerrepa'to'. Te'ñapa' orrerres, Yompore'pach sa'nataya.

37 Tarraña Pabloñapa' atet otanet:

—Yapa' romanona'tarey yaña. Ñeñť ñoñets anareť Romoťpa' oten ama pocteyaye o'ch yecoñchach acheñ ñerra'm ama yeñoteña' po'ñochte' eñall atto otteñe'cheñet acheñ. Tarraña añña añcha'tareťnesha' ama e'nano ñeñť e'ñe po'ñoč atet yepena. Atta nallatyet allo'tsa'yen shonte' acheñenesha' allotñapa' o'cho' atta yottam̄psatyet arr cárcelo. Te'ña ñetpa' mueneñet o'ch cha'nmaterryet e'ñe a'nahua. Ñeñťpa' ama pocteyaye atet. Te'pa' o'ch sotuer añcha'tareť huapuetepa' arr cha'nmaterryetepa' e'ñe ñet.

38 Añña guardiapa' otuerran pa'mcha'tareťernesha' atet oten Pablo. Ñetñapa' cha yorenet allempo e'mare'chet ñetpa'cho'ña romanona'taret ñamet.

39 Allempoña huacha'tetpa' enamareťterret peretneñets. Allempoña cha'nmatenanetpa' atet otanet:

—Te'pa' orrerres, sahanerra bačhayo.

40 Allempoña cha'nenet cárceloťpa' ahuanerret o'ch alla ašchereta' Lidia. Allempoñapa' serrpare'tuerret parro ñeñť ame'ñetsa, cotape'chatuanerret cohuen, allempoñapa' ahuanerret allot.

17

Allempo chap Pablo ñaña Silas Tesalónica

¹ Allempoña ahuanerret alloṭpa' ahuanmuet anetso Anfípoliso, alloṭña' ahuanmuet ñaña anetso Apolonio. Alloṭña' o' chapuet ñaña anetso ñeñṭ pa'so'cheñ Tesalónica. Allña' allo'tsen judionesha' po'prahua'.

² Pabloña' o' be'tosos ñeñṭ atecma pena. Allña' serrpare'tatosanet Yompor po'ñoñ. Allña' ma'panerr semana. Allempoña chen yeṭ allempo amesenetpa' o'ch'cho' serrpare'tatanet Yompor po'ñoñ ñeñṭ atet aquellcareṭ.

³ Allpa' añ ye'chatanet atet anaretta ñeñṭcha' Cristotats ñerra'm esempoch huapa añ patsropa' nanaccha' muerochtachet. Tarraña o'ch muerochtatueta' elloch alla tanterra ama'tcha' rroma. Ateṭ otanet:

—Te'ña' o'ch notas, añ Jesús ñeñṭara ñeñṭ o' neserrpare'tatuaspa' ñeñṭña Cristotets.

⁴ Puesheña'tetspa' pocte' eñchet o' ame'ñyet Jesús ñeñṭo'mar ñetpa' yemteñet Pablo ñaña Silas. Ñaña shonte' griegonesha' ñeñṭ ahuaṭoteñ cohuen cotape'chets Partsocoppa' o' ame'ñeñet Jesús. Ñaña shonte' coyaneshachno ñeñṭ e'ñe cohuen entyen acheñenesha' ñetpa'cho'ña o' ame'ñerret ñañet.

⁵ Judionesha'ña ñeñṭ ama ame'ñetsopa' ama pocteye' enteñeto attoch acheñenesha'pa' o'ch yemchet Pablo, ñeñṭo'marña puesope'cheñoṭetpa' o' e'moñe'chet. Ñeñṭo'marña a'sechet puesheña'tets acheñ ñeñṭ ama tama es sherbetso ñeñṭ atṭa ellapetseṭ anorrets all shontena

acheñenesha'. A'sechet o'ch apčhachet shonte' acheñ attoch e'moñetachet Pablo. Ñetña pa'tsrre'mueñoŕetpa' ahuanmuet Jasón pa'paclo all a'posa Pablo ñaña Silas. O'pachet errotenoŕpa' o'te' čha'nmačha'tet a'yoŕ attoch acheñenesha'pa' o'ch rromuet.

⁶ Allempoña čačha'tet Jasón pa'paclopa' tarraña ama entaretteto. Ñapŕa rromuet Jasón ñaña po'poñečno acheñenesha' ñeñŕ ame'ñetsa. Ñetaña anmarettatset amčha'taretesho. Pa'tsrre'mueñoŕetpa' nanac ama'točetnomuet attotačo' čhapuet allo'tsen amčha'taretnesha'. Allñapa' atet otoset:

—O' čhap acheñ ñeñŕ muenene' o'ch a'po'poñeterrnay yocŕaŕña. Atto' pohanmuet ama't po'poñ anetso'mar, te'pa' o' čhapuet ñaña arr.

O' alla oterreterr:

—Añ Jasónpa' o' agapanet e'ñe cohuen te'pa' ñaña pa'paclo a'puenet.

⁷ Ñetpa' ama pocteye' enteñeto atto amčha'taret o'ch nan ñoñets all anetso Romo. Ñetpa' aña otenet eñallo' po'poñ amčha'taret ñeñŕ nanac ahuamencaŕ ñeñŕpa' año' pa'so'cheñ Jesús.

⁸ Acheñenesha'ñapa' ñeñŕa e'muetpa' nanac atsrre'muet ñaña ama't amčha'taretnesha'.

⁹ Allempoña Jasón ñaña po'poñečno acheñpa' o' ayoramŕsarettet allpon po'čllayoret. Allotpa' otarettet:

—Añ quellepa' allach yapuerres ato't ahuerra' Pablo ñaña Silas.

Allempoñapa' a'rroyeret Jasón ñaña po'poñečno acheñ.

Allempo čhap Pablo ñaña Silas anetso Bereo

10 Allempoña acheñenesha' ñeñt ame'ñetsapa' o' mueñeret Pablo ñaña Silas Bereo. Tsapocma amñareñtenet a'nahua. O' čhapuet Bereopa' be'tosča'toset judionesha' po'prahuo.

11 Añña judionesha' ñeñt Bereo'tsa'yenpa' ñetñapa' e'ñe cohuen cotape'chenet ama atteyayeto atet ñerra'm judionesha' ñeñt Tesalónico'tsa'yen. E'ñe pocsheñesha' e'mñotoñet Yompor po'ñoñ, allotña ñetpa' o' e'nyeset Yompor po'ñoño all aquellcaret ahuatoteñ. Tarro'mar ñetpa' mueneñet o'ch eñochet ñato' po'ñochte' atet serrpare'ten Pablo ñaña Silas. Pate'tets yetpa' attecma pete't.

12 Ñeñto'marña shonte' acheñenesha' ñeñt ame'ñatsa. Shonte' ñaña coyaneshačhno ñeñt griegonesha' ñeñt nanac sherbetspa' o' ame'ñenet ñamet. Ñaña po'potantañ shonte' yacmanesha' o' ame'ñenet.

13 Añña judionesha' ñeñt yečhetsa Tesalónicopa' o' e'mare'chet Pablo o' alla serrpare'tuerranerr Yompor po'ñoñ ñaña Bereo. Ñeñto'marña huačha'tet ñamet all attoch atsrre'matachet acheñenesha' o'ch e'moñe'tachet Pablo.

14 Añña acheñenesha' ñeñt o' ame'ñapa' o' mueñet Pablo tepa'to' ontapo allo'tsen sa'p atarr. Añña Silas ñaña Timoteopa' alla a'pa Bereo.

15 Puesheña'tets acheñpa' o' co'ta'nmet Pablo. Ñetpa' alla neñeta' Pablo anetso ñeñt pa'so'cheñ Atenas. Allña so'tanna'tuet Pabloñapa' atet otanet:

—O'ch sotuer Silas ñaña Timoteo onetepa' ñamet e'ñe tayecma.

Allempo čhap Pablo ñaña Silas Atenso

16 Pabloñapa' alla cohuanet Atenso. Allña cohuanetpa' shonte' entosan ayečcataretečno all Atenso, ñeñt' po'yomporer pa'yen acheñenesha'. Ñañaapa' nanac llecachet.

17 Pabloñapa' mueneñ o'ch be'tos judionesha' po'prahuo attoch serrpare't epuet parro judionesha' ñaña po'poñečno acheñ ñeñt' cohuen cotape'chets Partsocop. Pate'tets yetpa' o'chčo' ahuo' all shontena acheñenesha' pueblo allñaapa' o'chčo' serrpare'tet parro ñeñt' allo'tsa'yen.

18 Parrochpa' aña huapatsa ñeñt' ame'ñenaya Epicuro poctařña, allotpa' o' huapa ñaña ñeñt' ame'ñenaya po'poñ cotarñats ñeñt' otenet estoico. Ñetñapa' atet otet:

—¿Este'ca'ye cotape'chenña añ acheñ ñeñt' atta nanac eñets?

Po'potantaññaapa' atet otet:

—Ñato' añte' muenen o'ch yečhatey po'poñ po'yomporer ñeñt' ama yentare ya.

Tarro'mar Pablopa' añ serrpare'tatenanet atet pena Jesús ñaña ama't atto tanterra Jesús.

19 Ñetñapa' o' anmet Pablo all oteñet Areópago allecma apčhena eñotañnesha'. Allñaapa' otoset:

—Ñehua, te'pa' o'ch potey este'ña poctape'chen pa. Yapa' te'pa' yemneñ o'ch yeñoč.

20 Tarro'mar ñeñt' peserrpare'tenpa' ama ye'mare. Yapa' yemneñ o'ch yeñoč este' nanac poten.

21 Ñehua, allohuen atenso'marnesha' ñerra'm añ serrpare'tats ñeñt' ama puentaretopa' ellapenetcha' e'mñotet. Ñeñtach pa'terr

ma'yočhret. Ñaña ñeñt yečha'huerra Atensopa' ñeñt huapyetsa po'poñ anetsotpa'te'pa'atta penet ñamet.

²² Allempoña Pablopa'tomos rročho all oteñet Areópagopa'atef otanet:

—Atenso'marneshacha' napa' neñotenes sapa' aña atarr sema'yočhrena ñeñt seyomporer sepa'yen.

²³ All nasuanempa' shonte' nentyesnom ñeñt sema'yochyena ñeñt seyomporer sepen. Paterr allecma sema'yochenapa' napa' nent all oten añ ñoñets: "Añpa'añecop Yompor ñeñt ama yeñotena'." Ñeñt sema'yochena ñeñt ama señotena'pa' ñeñtara Yompor te'pa' ñeñtcha'ña neserrpare'tatas.

²⁴ 'Añ ñeñtara Yompor ñeñt yečcate' añ pats. Ñaña yečcatan allohuen ñeñt yentyen aña patsro. Ña Pamo'mte' pen enet ñaña pats. Ñeñto'marña ya ñeñtey arromñaateypa' ama pallteno o'ch yeyečcatoñ allcha' yečha.

²⁵ Ñaña ama pallteno o'ch es yař. Ñocop ama es palltetso. Elloña ñaña yapuene' allohueney atto yocrrena, apueney ñaña atto yo'rerrerrena. Ñapa' apueney ora esocmañen.

²⁶ 'Ora allpon pa'namen acheñ ñeñt yečha'yetsa aña patsro Yomporpa' ña yečcatue' e'ñe puesheñarroña acheñ. Ñapa' o' nohuanet e'ñech allempohua corra'yeset. Ñaña o' na'yesuanet e'ñech erra yečha'yeset aña patsro.

²⁷ Tarro'mar Yomporpa' yečcatan pa'namen acheñ tarro'mar añ cotape'ch allochñapa' allohuen acheñpa' ñerra'm e'ñe acořa e'neretpa'

po'ñoçhpa' enteretcha'. Ñapa' allame'ttso'tsenate' yeshoť.

28 Tarro'mar e'ñe ñeshoť te'pa' yocrrena ñaña e'ñe ñeshoťpa' yeçhope'chen, ñaña e'ñe ñeshoťpa' ye'ñalleta. Ama't atet quellquë't ahuat puesheñarr samo'ts sa ñeñť etsotaye't ñoñets. Añmapa' ñeñť quellquë't samo'ts ahuat: "Te'ña po'ñoçh Yomporpa' puechemerasha' peney."

29 Alla otterrerr Pablo:

—Ñehua, ñerra'm po'ñoçh Yompor puechemerasha' peney ya, ama pocteyaye o'ch yoch Yomporpa' arroť ayeçhcatareť oroť, amapa' arroť ayeçhcatareť asretoť, amapa' arroť ayeçhcatareť mapyoť. Añmapa' ñeñť ayeçhcatareťpa' e'ñe ya yoctap'ñoña ayeçhcatareť, atet es yetma'ntatena ya.

30 Ahuat acheñpa' ama't ama eñotenano ñeñť cohuentetsa Yomporecop, Yomporpa' amach erroť p'aneto. Tarraña te'ñapa' oteney yoctape'cherrepa' ello cohuen Yomporecop, allohueney acheñey ñeñťey corra'yetsa añe patsro.

31 Yomporpa' tarro'mar mueneñ o'ch yoctape'cherr etserra tarro'mar ñapa' o' ne' esempoch allohueneypa' yorrterrach ñesho. Te'pa' o' nan Jesús ñach acrerre' allohuen acheñ ñeñť e'ñe po'ñoçh atet pete't. Acrancha' ñeñť cohuen acheñ ñaña ama't ñeñť ama cohueno acheñ. Ñeñto'marña te'pa' o' eñotatuay Jesúsapa' ñach acrerrets tarro'mar Pomporpa' o' tantater ama't o' rromua ñaña Jesúsapa' e'ñe pocte' es pen. Te'pa' o' eñotatuay allohueney acheñey.

32 Allempoña serrpare'tan Pablo attoch

yetanterra ellopa' añña puesheña'tets acheñpa' o' achm̄are'chet. Tarraña po'potantañña' atet otet:

—Ñehua, ñato' esempochña ye'mñnoterrperr po'pocheño.

³³ Allempoñapa' ahuerr Pablo.

³⁴ Tarraña puesheña'tetspa' yemchet Pablo ñaña o' ame'ñet. Añña puesheñarr ñeñt ame'ñatsa añ pa'so'cheñ Dionisio ñeñtara ñeñt añcha'tarettetsa ñeñt a'pocstatene' ñoñets all oteñet Areópago. Ñapa' o' ame'ña, ñaña po'psheñeñ coyanesha' ñeñt pa'so'cheñ Dámaris. Ñaña po'poñechno acheñ o' ame'ñet ñamet.

18

Allempo chap Pablo Corinto

¹ Allempo ahuo' ñaña anetso all oteñet Corinto.

² Chap Corintopa' entosan puesheñarr judionesha' añ pa'so'cheñ Aquila. Ñapa' errete huetsa Italiot epuet puetapor ñeñt pa'so'cheñ Priscila. Año'mar huenet Italiot tarro'mar añcha'taret Claudiopa' o' nan pa'terr ñoñets all Italo. Ñeñtpa' atet ot: Allohuen judionesha'pa' ahuanerretepa'to' Romot. Aquilapa' arr eñalletña Ponto. Pabloñapa' ahuo' o'ch entenana' Aquila epuet puetapor.

³ Ñetpa' ñeña po'taruas penet atto yeçcatenet shetamtsopo'. Pabloñapa' alla a'pa epuet attoch taruaset p̄rro.

⁴ Pate'tets semana allempo çhen yet allempo amesenet Pabloñapa' o'chçho' ahuo' judionesha'

po'prahuo. Allñapa' allcha' serrpare't epuet judionesha' ñaña ñeñt ama judioneshayaye. Ñapa' atarr mueneñ o'ch ame'ñatanet.

⁵ Allempoñapa' huapa ñaña Silas epuet Timoteo. Taya huapuet Macedoniot. Allempopa' añ nanac torrena Pablo serrpare'te'. Ñapa' añ eñotatenan judionesha' Jesús pa' ñeñtaraca'ye Cristoterrets ñeñt atarr cohuenet ahuatoteñ.

⁶ Judionesha' ñapa' nanac e'moñe'chet Pablo, o' achmāre'chet. Allempoña Pablo pa' o' pa'shman pa'shtam attoch eñochet nanac atpare'tenet. Allempoñapa' atet otanet:

—Sapa' sañeñach a'chencatuerrtsa. Tarraña napa' amach es seyohua'no. Te'pa' tayoteñ añach neserrpare'tat ñeñt ama judioneshayaye.

⁷ Allempoñapa' ahuerr. Chap añ ñeñt pa'so'cheñ Justo pa'paclo ñeñt ame'ñenaya Yompor. Pa'paquēllpa' allame'ttso'tsen allo'tsen judionesha' po'prahua'.

⁸ Ñeñt amcha'tarettetsa judionesha' po'prahuo ñeñtpa' añ pa'so'cheñ Crispo. Crispopa' o' ame'ñerrana Yepartseshar Cristo ñaña allohuen ñeñt pa'paclo'tsen. Shonte' corinto'marnesha' e'mñotoñet Yompor po'ñoñ, o' ame'ñerret ñaña o' apatarettet Yomporecop.

⁹ Atteñapa' orrtoña Pablo atet ñerra'm cho es yeçhopo'ten. Yomporpa' ahuo't otan Pablo:

—Amach pemcha'tatsto, çhocmach peserrpare't, amach atta pemamtetatsto.

¹⁰ Napa' o'ch necuam̄peneḡ attoch amach esesha' erroḡ es peḡaye. Tarro'mar napa' nechen shonte' acheñ añ anetsroḡ ñeñtcha' name'ñaya.

11 Allña'pa' allena alla pa'terr char ñaña meter-rerr pechapña arrorr. Allpa' nanac ye'chatanet Yompor po'ñoñ.

12 Allempoña añcha'taretta Galión e'ñe alla Acayopa' judionesha'ña o' ap'chetpa', o'pachet Pablo. Allempoña o' rromuetpa' anmet añcha'tare'tesho allecma a'pochtatenet ñoñets.

13 Chapuet allpa' atet otoset:

—Añ acheña'pa' aña ye'chatenan acheñenesha' atto'ch ame'ñyet Yompor, tarraña ñeñt'pa' ama atteyaye atet oteney Moisés po'ñoñ ñeñt' atet anaret.

14 Ahuo'ch eñoseñ Pablo'pa' Galiónña'pa' atet otanet:

—O'ch notas ñeñtes judioneshas, ñerra'm añ acheñ a'nte' o' pohua ñeñt' ama cohuenopa' amapa' atet ñerra'm cho muetsenan acheñ, ñehua, pocte' napa' o'ch ne'mñnotas atto sottene'cheñ.

15 Tarraña ñerra'm amate' atteyaye, aña'pa' e'ñe socpa—atet sey'chaten sa ñeñtes judioneshas, amapa' esesha'te' same'ñena, amapa' ñeñt' atet oten ñoñets ñeñt' atet anaret socop. Ñeñto'marña napa' notenes ñeñt'pa' socpa. Ñeñto'marña napa' amach neñoso añecop ñeñt' e'ñe socpa.

16 Allempoña'pa' o' cha'nma'cha'taterranet.

17 Allempoña acheñenesha' aña rromuet Sóstenes. Sóstenes'pa' ñeñt' añcha'tare'tetsa judionesha' po'prahuo. O' rromuetpa' o' nalle'chet e'ñe alla allame'tets añcha'tare'tesho. Añcha'tare't Galión'pa' ama cohua'psaneto.

Allempo cherrerr Pablo Antioquíu

18 O' atomaterrerr Pablo alla Corinto allem-poñapa' o' so'tnerran ñeñt' ame'ñetsa. Aña coterre' Priscila ñaña Aquila. Allotpa' año ahuanĩpset boto, arrcha' tet Sirio'mar. Arr asuanmuet anets Cencrea. Allñapa' o' shopena'tatosa Pablo. Añecop shopena'tata attoch eñochet o' etsotuan po'ñoñ ña ñeñt' atet otan ahuaña Yompor ñeñt'cha' atet pa Yomporecop.

19 Allempoña chapuet Efesopa' allñapa' o' sa'nerran Aquila ñaña Priscila. Ñañaapa' o' ahuo' judionesha' po'prahuo allcha' serrpare'tet parro judionesha'.

20 Allñapa' otare'chet Pablo a'puepa'to' alla atomat, tarraña Pablopa' amo' mueno.

21 Allempoña so'tnerranetpa' atet otanet:

—Napa' o'ch alla ahuerren Jerusaléno allcha' nocshapretuerra añ yeter ñeñt' anaret Partsocop allempoch alla cosherrerr judionesha'. Ñerra'm Yomporcha' muenatspa' ñato' o'ch nohuerrerr esempo.

Allempoñapa' ahuanĩperrerr boto.

22 Allempoñapa' arr etsotamĩpsosa Cesareo. Cesareotñapa' asuanom Jerusaléno allcha' abechnoman ñeñt' ame'ñetsa all. Allempoñapa' o' alla ahuer Antioquío.

Allempo poma'pocheño ahuererr Pablo serrpare'tats allemeñ anetso'mar

23 Antioquíopa' alla allponmatnerr, allotñapa' o' ahuererr. Arr asuanerr Galacio'mar allotpa' ahuer Frigio'mar. Ñeñt' ame'ña'yetsa allpa' o' yenpanet attoch huomenc perret pueyocher.

Allempo Apolos atarr cohuen serrpare'tatosanet all anetso Efeso

24 Ñehua, allempopa' eñall puesheñarr judionesha' añ pa'so'cheñ Apolos ñeñt huetsa Alejandro. Ñaña'pa' o' chap Efeso. Atarr cohuen serrpare'tenan Yompor po'ñoñ, atarr etsotenan Yompor po'ñoñ ñeñt atet aquellcaret ahuatoteñ.

25 Ñapa' ayçhataret ñeñt atetcha' perra Yepartheshar ñeñtara ñeñt Cristotats. Ñapa' e'ñe po'ñoç serrpare't huomenc, yeçhatanet ñeñtcha' atet perra Jesús. Añaña ama e'ñe eñotueno ora atet pena Jesús. Aña eñoten atet yeçhate't Juanañ ñaña atet apate't Juanañ.

26 Ñapa' serrpare'te't huomenc judionesha' po'prahuo. Allempoña e'm Priscila ñaña Aquila, ñetña'pa' anmet ellonet allcha' eñotachet e'ñe ora ñeñt atet pa Yompor ñeñtaña palltena o'ch eñoch e'ñe poctacma.

27 Allempoña'pa' secha Apolos Acayo. Añaña ñeñt ame'ñetsapa' o' yenpuet. Ñetpa' o' quellquët carta añecop ñeñt ame'ñetsa all Acayo attoch ñetpa' o'ch agapet Apolos e'ñe cohuen. Allempoña o' chap all Acayopa' nanac yenpan ñeñt ame'ñenaya cohuen ñoñets all.

28 O' eñotatanet po'ñoç Jesús'pa' ñeñtca'yeña Cristoterrets ñeñt atarr cohuenet ahuatoteñ. Yompor po'ñoñot ñeñt aquellcaret ahuatoteñ o' gatyesanet atto Jesús o' etsotatuan ñeñt aquellcaret ahuatoteñ. Ñeñt allo'tsa'yen allohuen acheña'pa' e'ñe po'huamencocma yeçhatanet. Allempoña ama't puesheñarra judionesha'pa' ama erro't otenaye' enteto.

19

Allempo cherrerr Pablo Efeso

¹ Allempo Corinto'tsenmeñ Apolos, Pabloñapa' alla chopeñe'chen aspentarero. Atteñapa' o' alla cherr Efeso. Allñapa' all entosan allponsheña ñeñt ame'ñetsa. Tarraña ñetpa' allpon eñotenet allpon serrpare'tate't Juanañ.

² Pabloñapa' a'p'to'tan ñeñt ame'ñetsa, atet otanet:

—Sapa' allempoteñ same'ña, ¿ahuo't chorrasaña Parets Puecamquëñ?

Ñetñapa' o' anapuet:

—Yapa' ama ye'mareña ñato' eñallfe' Parets Puecamquëñ.

³ Pabloñapa' alla oterrerr:

—¿Errofenote'tña sapatareta?

Ñetñapa' atet otet:

—Yapa' yame'ñeño't atet otye't Juanañ attotña yapatareta.

⁴ Pabloñapa' alla oterrerr:

—Añoña apaten Juanañ atto o' cotape'cherret ello cohuen Yomporecop allotñapa' o'ch apatarettet attoch ame'ñeret ñeñtcha' huapatsa chenta'. Añoña ñeñt huapatsa chenta'pa' añepa't Jesús.

⁵ E'muet atetpa' apatarettterret pame'ñeño'tet Yepartseshar Jesús.

⁶ Allempoña Pablopa' o' a'p'llanet potot. Allempoñapa' ahuepa't chorrannet Parets Puecamquëñ. Allempoñapa' o' eñosyeset po'poñ ñoñtso, o' a'poñoñet atto eñorana'tanet Yompor.

⁷ Ñeñt eñosyesets po'poñ ñoñtsopa' allo'tsen ñato' çharrasheña puechena epsheña.

⁸ Pablopa' nanac serrpare'tate't all Efeso. Pate'tets semana o'chcho' be'tosos judionesha' po'prahuo o'chcho' serrpare'tatanet atet pena Yompor po'cohuenña ñeñt atto atarr ayochreshattena ña. Ama mecha'te'te ama't mamesha. O'chcho' yeçhatanet allochñapa' o'ch ame'ñatanet. Atteñapa' o' ma'pña arrorr.

⁹ Tarraña puesheña'tets acheña'pa' nanac atpare'chete't ama ame'nyeto atet serrpare'tatanet Pablo. Patpare'teño'tetpa' ama't all shontena acheñenesha'pa' o' sasare'toñet Jesús poçta'ña. Allempoñapa' ahuer Pablo. Ñeñña ame'ñetsapa' o' coteret. O' ahuanmuet allo'tsen Tiranno pue'scuela. Allña' pate'tets yetpa' añña Pablopa' o'chcho' serrpare'tatanet pue'scuelpahuo.

¹⁰ Atteñapa' o' met epa char. Allohuen asio'marnesha' o' e'mare'toñet Yompor po'ñoñ—allohuen judionesha' ama't ñaña allohuen ñeñt ama judioneshayaye.

¹¹ Yomporpa' nanac ahuaamencat ðan Pablo. Ñeño'marña nanac orrtatanet Yompor po'partsoña ñeñt ama puentareto.

¹² Atteñapa' añña acheñenesha'pa' o'chcho' anerret ñeñt es a'plla'yen Pablo, atet ñerra'm es pañell amapa' pañoshe'm. O'chcho' anmet allo'tsen ñeñt atsna'tets. O'ch çhapachet allpa' o'chcho' corrreraña atsnañeñ. Ama't po'neñeteretpa' o'chcho' queçhpa'nerranet.

¹³⁻¹⁴ E'ne allempopa' allo'tsen puesheña'tets

judionesha' ñeñt̃ achyo'tañnesha' ñeñt̃ chocma chopeñe'chets erracmañen. Ñehua, ñetpa' añ puechemereshanet ñeñt̃ puesheñarr judionesha' ñeñt̃ara ñeñt̃ cornesha' nanac añcha'taret añ pa'so'cheñ Esceva. Allo'tsen cancherrsheña puechemerasha'. Ñetpa'cho'ña o' topachet ahuo'ch quechpatachet ñamet acheñenesha' po'neñefer e'ñe pa'so'chño Yepartseshar Jesús. Ahuo'ch pet atet pena Pablo. Puesheñarrña ñeñt̃ chorrena oneñeñpa' otoñet po'neñefer:

—Napa' o'ch notap̃, e'ñe pa'so'chño Jesús ñeñt̃ serrpare'ten Pablo o'ch pequechpa'ner añ acheñer.

¹⁵ Allempoña atet ochet oneñeñpa' ahuepa'tcha' eñoraña, oneñeñpa' atet ot:

—Jesúspa' neñoteññañ po'huamenc, Pablopa'cho'ña neñoteññañ atet po'huamenc echen. Tarraña sapa' eseshasuañaca'ye. Ama neñotennaso sehuamenc.

¹⁶ Allempoña acheñ ñeñt̃ chorrena oneñeñpa' omachana'tanet, orrotet parro epuet achyo'tañnesha'. Oneñeñpa' nanac atserrp̃atse'tanet allohuenet. Muelle'mcoñ atserrp̃atse'tuanet o' matrra'tuet pocolloñ.

¹⁷ Añña allohuen efeso'marnesha'pa' o' e'mare'chet atet o' pet—allohuen judionesha' ñaña ñeñt̃ ama judioneshayaye. Atarr yore'tanet. Allempoñapa' añcha'na'tpo' enteñet Yepartseshar Jesús.

¹⁸ Shonte' acheñ ñeñt̃ ame'ñetset allempoñapa' huapyeset, o' a'meta'yesoset atto achyo'tyesete't̃.

19 Patantarrpa' o' huapatyeset po'libro ñeñt' allo eñotet achyo'tatset. E'ñe all shontena acheñenesha' o' chama'tuet po'libro. Allempoñapa' o' somuerret errponte' tsa'tena allpon libropa' o' sala amnaroch çarra' mil poçllayoret. Ñeñt' allpon tsa'tena allohuen libro.

20 Ñeñto'marña atarr aña'na'tpo' entoñet Yompor po'ñoñ. Atarr ame'ñet.

21 Allempoña e'ñe Yompor Puecamquëño'tpa' o' secherrerr Pablo o'ch ahuerrerr Macedonio ñaña Acayo, allotña o'ch asuanerrpa' o'ch ahuerr ñaña Jerusaléño. Allotñapa' atet ot Pablo:

—Te'pa' aña palltetsa o'ch ahuen ñaña Romo.

22 O' mueñan epsheña acheñ ñeñt' yenpuene' ñeñt'cha' ñanom tatsa Macedonio. Aña ñeñt' epsheñapa' añ pa'so'cheñ Timoteo ñaña Erasto. Pabloñapa' o' a'pohuerra allponmat Asio.

Allempo nanac ama'toçhtena acheñenesha' all Efeso

23 Allempopa' o' atsrre'ma puesheña'tets acheñ. Añ atsrre'matahuet atfo' pena ñeñt' ame'ñetsa.

24 Allo'tsen puesheñarr añ pa'so'cheñ Demetrio ñeñt' ñanom e'moñe'te' ñeñt' ame'ñetsa. Ñapa' añ po'taruas pen o'ch yeçcatyesan pocollatollesha' añ toma'ntatena pocoll ñeñt' allecma muechatse'tenet ñeñt' po'yachorer penet ñeñt' otenet yachor Diana. Añ pocollatollesha'pa' arroto' ayeçcataretta asertallo't. Shonte' acheñ ñeñt'ara po'taruas penet, Demetrio ña apahuete't po'taruas atet. Shonte' quelle ganete't po'taruasot.

25 Atteñapa' Demetriopa' o' apçhatuan allohuen pa'taruasañer ñaña po'psheññeçhno, ñetpa'çho'ña

ñeñtara po'taruas penet. Apçhatuanetpa' atet otanet:

—Masheñneshacha' sapa' seño'teñ añ yetaruas ñeñtapa' alloch yegana shonte' quelle.

²⁶ Te'pa' seño'teñ ñaña añ ñeñt otenet Pablopa' ahuo't otuan acheñenesha' añ ñeñt yeyoser ñeñt yeyeçhcaten yapa' ñapa' oten amo' Partsoyaye. Ñapa' o' cotape'chatuan shonte' acheñenesha', te'pa' shonte' o' ame'ñatua. Ñetpa' o' huapore'tuerret shonte' ñeñt yapuenanet ñeñtcha' ma'yochet. Sapa' o' sentue atet penet arr Efeso ñaña o' se'mare'ch atet pa'yenet ora erraḡaren Asio'mar.

²⁷ Alla oterraneterr Demetrio:

—Ñeñto'mar te'pa' o'ch notas, ñato' o'ch huañerr yetaruas alloch yeganerra quelle. Tarraña ñeñtapa' ama pocteyaye. Ñato' ellopa' o'ch a'ypo'ña'hueret ñaña yachor Diana ñeñt puerahuo'tsen. Ñato' allempopa' ama't yachor Dianapa' o'huañcha' añcha'na'tpo' eñchet, ama't ñaña ora allohuen asio'marnesha' ñeñt po'yachorer pene'.

²⁸ Ñeñta e'm allohuen acheñenesha'pa' nanac atsrre'matanet. Pa'tsrre'mueño'tetpa' o' rranare'tyeset, alla oterrete't:

—¡Paretsña'cho' yachor Diana!

²⁹ Shonte' acheñ nanac ama'toçhtenet allohuenet. O' rromuet Gayo ñaña Aristarco ñeñt macedonio'marnesha' ñeñt parro chopeñe'chen Pablo. O' matrra'tet allo'tsen pocoll atarrpo' allecma apçhena acheñenesha'.

30 Pabloñapa' mueneñeñ o'ch be'tos ñaña all ama'toçhtenetpa' tarraña añña ñeñt ame'ñetsapa' ama muenacheto.

31 Ñaña puesheña'tets ñeñt añcha'tarettetsa all Asio ñeñt muerenaya Pablopa' o' mueñoñet ñoñets attoch amach tatsto all apçhenet te't muetseñet.

32 Allña apçhenetpa' atta rranare'tyenet. Puesheña'tetspa' atet otyeset atet co'tape'chyenet ñet, po'potantañña' atet otyeset po'poñ ñeñt atet co'tape'chyenet ñamet. Allohuenet ama't ama eñotueñeto esocopte'ña apçhenet, tarraña atñaña nanac ama'toçhtenet.

33 Puesheña'tets judionesha' o' cheta'nmet Alejandro o' huapachet attoch eñosachet. Ñaña' o' echantosán pot attoch o'ch muetsoñeñtet añecop attoch o'ch a'poc'tatan ñoñets judioneshacop.

34 Tarraña allempo acheñenesha' ñeñt ama judioneshayaye o' eñchet Alejandro ñapa' judionesha' ñetña'papa' alla rranare'terreterr. Atarr tematen rrannartenet. O'chçho' alla oterret allohuenet parro:

—¡Paretsñaçho' yachor Diana! ¡Paretsñaçho' yachor Diana!

35 Allempoñapa' puesheñarr añcha'taret ñeñt taruaset gobiernocoppa' o' emma'huanet, atet otanet:

—Masheñeshacha', o'ch notas ñeñtes yeçhetsa arr Efeso. Ama't allohuen acheñenesha' erraparen e'ñe eñotueñet efeso'marneshaypa' yapa' ñeñtey cohuanpene' yachor Diana ñeñt puerahuo'tsen, ñeñtara yachor Diana ñeñt nanac Parets, ñeñt sohuatsa ento't.

³⁶ Ñeñtpa' yeñotueñ allohueney acheñey. Amate' errotenoñ yoto ama atteyaye. Ñeñto'marña e'ñe pocte' o'ch semtsoñeña. Amachña čha sama'toçhtatsto.

³⁷ O' alla oterraneterr añcha'tareñ, atet otanet:

—Secua' ahuo't sehuapach arr añ epsheña acheñ. Tarraña ñetpa' ama es yoreneto yachor po'prahuoñ ñaña ama achmare'teñeto yachor.

³⁸ Ñeñto'marña te'pa' o'ch notas, ñerra'm mueneñ Demetrio ñaña pa'taruasañrečno o'ch otteñe'chatanetpa' te'pa' e'ñe pocte' temantanetepa'. Tarro'mar te'pa' atorareñ allcha' a'pocatatet ñoñets. Ñeñtcha' a'pocotate' ñoñetspa' allo'tsena.

³⁹ Tarraña ñerra'm este' semnen o'ch sa'pocatat po'poñpa' ñeñtpa' añ pocte' o'ch sa'pocatach allecma apçhena ñeññ nanac añcha'taretečno.

⁴⁰ Ñato' temanta'yeta ya tarro'mar yapa' e'ñe attota yama'toçhtena.

⁴¹ Ñeñña otuanetpa' o' mueñhuerranet. Allempoñapa' ahuanomhuerret.

20

Allempo çherrerr Pablo alla Macedonio

¹ Allempoña o' muetsoñeñtuerret Pabloñapa' agotatuan ñeññ ame'ñetsa. O' cotape'chatnenanet e'ñe cohuen. Allempoña e'ñe puemorrenteñoñanet e'ñe cohuen so'tuanenanetpa' o' ahuen, o'ch ahuer Macedonio.

²⁻³ All oñerr Macedonio'marpa' nanac serrpare'tatnerranet Yompor po'ñoñ. Atteñapa' o' çherr Grecio ñeññara all oteñet Acayo. Allpa' alla

a'pohuerra ma'pña arrorr. Autsaño' tam̄psatsañ ñaña Sirio botopa' tarraña o' e'mare'ch allpa' cha o'pateña judionesha' o'ch rromapet. Ñeñto'marña alla secherra Macedonio (tarro'mar allpa' patso'marach chope'chnerr).

⁴ Allempoña ahuer Macedoniopa' allpon acheñ o' coteret. Ñeñtpa' ñeñtara añechno: Sópater ñeñt bereo'marnesha', allotpa' ñaña Aristarco ñaña Segundo ñeñt tesalónico'marnesha', allotpa' ñaña Gayo ñeñt derbo'marnesha', allotpa' ñaña Timoteo, ñaña allo'tsen Tíquico ñaña Trófimo ñeñt asio'marnesha'. Allpon acheñ coterre'.

⁵⁻⁶ Arr cha'cha'tet Filiposo. Allempoña ñetpa' ahuanmuet o'ch otet, arrcha' cohuosyet Troaso. Yapa' alla ya'pa Filiposo epan Pablo allponmat.* Allempoña o' huañ allempo coshenet allempo rrenet pan ñeñt ama achasareteyaye allempoñapa' o' yahuanma yaña. Allempo ahuan̄psey botopa' pa'mnarmatñoñapa' o' ye'chap yaña Troaso. Allñapa' allo'tsa'yen ñeñt otatsa ahuaña. Allñapa' alla ya'posa can'cherrmat.

Allempo Pablopa' emo'tnom anetso Troaso

⁷ Allempoña chap allempo motta'muena yetñats temen'pa' yap'cha allohueney ñeñtey ame'ñetsa. Yeyerpueño' Yepartseshar Jesús'pa' o' yerra' pan ñeñt ashota'tare' ñeñt atet anare' Yomporecop. Allempoña Pablopa' nanac serrpare'tatanet. Ñapa' otanet:

—O'ch ahuenen tsapa'.

* **20:5-6** Lucas ñeñt quellquè' añ ñoñets ñapa' co'a'nman ñaña Pablo.

Ñeñto'marña ama't o' rroch tsapuenpa' alla ser-
rpare'tatenanet.

⁸ Allña yapçhena pocollo enopa' nanac a'yohuen
bat. Allpa' shonte' lampareñ ñeñt corra'yetsa.

⁹ Allñapa' allo'tsen puesheñarr huepuesha' añ
pa'so'cheñ Eutico. Ñañapa' alla anen ventanot.
Atto nanac serrpare'ten Pablopa' Euticoñapa'
ahuo't alla ma' anatot. Ahuo't alla ma'pa'
machayota shora'nom patso. Ma'pa piso allot
shora'nom. Allempoña echantsetpa' o' rroma.

¹⁰ Allempoña sohuerra ñaña Pablo. O' huapa o'
mo'capa' a'chono'tos allempoñapa' otanet:

—Amach sellcatsto, Yomporpa' o'ch alla tanta-
ter.

¹¹⁻¹² Añña huepuesha'ña ñeñt o' shora'nemuapa'
o' alla aneret e'ne huomech. Allempoña allo-
huenetpa' atarropa'tcha' coshet. Allempoñapa'
o' alla a'terr Pablo. Allñapa' o' rrallme'chet.
O'ña rrallme'chuetpa' o'huañ tematen all ser-
rpare'tatannenet. Atteñapa' o' puetarespenet.
O'ña puetaresuenpa' o' ahuen Pablo.

*Allempo ahuanerret Troasot arr cha'cha'tet
anetso Mileto*

¹³ Allempoña yapa' o' yahuanma o'ch yota
o'ch yerrma' añecmuen noñt ñeñt otenet bote
o'ch ahuanpsey Asóno allcha' yecuos Pablo.
Tarro'mar otey Pablopa' ñapa' arro'ch oñom
patso'mar o'ch chap Asóno. Allotñapa' o'ch a'tap
ñaña boto, tarro'mar atet o' ya'pocstat epay Pablo
ahuañacma.

¹⁴ Atteñapa' o' ye'chap Asóno. Allñapa' all yen-
tanna'ta epay Pablo. Allotñapa' a'tap ñaña boto,

alotñapa' ahuañpsey parro. Atteñapa' o' yeçhap Mitileneo.

¹⁵ Mitileneotñapa' o' alla ahuañperryerr boto. Tsapañapa' a'yo'mara yoñem Quío. Alotña tsapatenerrrpa' alla yetsotosa Samsó. Yemterrrerr Samsotpa' alla yamesuerrerr Trogilio. Alotña tsapatenerrrpa' alla yetsotuerrerr Mileto.

¹⁶ Allñapa' ot Pablo amach yetatsto Efeso tarro'mar ñapa' ama mueno o'ch alla yatoma'tare'tnom Asio'mar. Ñapa' aña mueneñ o'ch yeçhap tecma Jerusaléño añecop o'ch yentapreterra' Pentecostepo.

Allempo e'ñe ñeñteshaña serrpare'tatnerranet Pablo Efeso

¹⁷ Ñeñto'marña allempo Mileto'tseneypa' Pabloñapa' agotatan ñeñt pompornesha' pen ñeñt ame'ñetsa Efeso, onetepa' Mileto all o' yeçhap ya.

¹⁸ Allempoña o' huacha'tet Pabloñapa' o' serrpare'tatanet, atet otanet:

—Sapa' señothenen atet o' neñoahuanma sesho, ama't ahuatoteñ allempo ñanóm neçhap Asio all seyçhena.

¹⁹ Sapa' señothenen añecop netorrena Yomporecop ama añecpaye' netorreno attoch acheñenesha'pa' o'ch entenen e'ñe cohuen ñeñt e'ñe orrena. Napa' ama't neya'chpeñesha' netorrena Yomporecop tarraña judionesha'pa' nanac o'patennet. Ama't pa'namen nehuapoya e'ñe nemueroçhteñoïpa' çhocma netorrena Yomporecop.

²⁰ Señothenen ñaña napa' o' neserrpare'tatuas ora allohuen ñeñt poctetsa socop. Ama es

na'nasotam̃psaso ama't coñe'ta. Napa' o' ney'chatuas allohuenes parro allempo sap'chena ñaña o' ney'chatyesnomues e'ñe sepaclo'mar.

21 O' neserrpare'tatuas añ pocte' o'ch soctape'cherr ello cohuen Yomporecop ñaña añ pocte' o'ch same'ñera Yepartseshar Jesucristo. Ñeñtpa' atet o' notuas allohuenes ñeñtes judioneshas ñaña ama't ñeñtes griegoneshas.

22 Te'pa' o'ch ahuerren Jerusaléno, tarro'mar o' sechaterren Yompor Puecamquëñ. Tarraña o'ch necherr Jerusaléno'pa' ama neñoteña' ñeñtcha' allohuen nehuapoya all.

23 Aña neñoten o' eñotaten Parets Puecamquëñ ñeñtcha' atet pa'net o'ch yottam̃pesnetpa' o'ch muerochtatnet. Ora allpon anetso attec mach pa'net.

24 Tarraña ama't atetpa' napa' ama nem'cha'teno. Ama'tcha' nerromapa' pocte' nenteñ o'ch nerroma. Te'pa' añ palltetsa o'ch ne'nua netaruas. O'ch netsotatuon ora allohuen ñeñt atet llesensa'n Yepartseshar Jesús. Ñeñt atet llesensa'n Yepartseshar Jesús'pa' ñeñtpa' attoch neserrpare'tach acheñenesha' ñeñt cohuen ñoñets atto Yompor pomuereño'tpa' a'queshpaterreycha'.

25 O' alla oterraneterr Pablo:

—Te'pa' neñoteñ sapa' amach senterrno po'pocheño, ama't allohuenes allo' nechopeñe'chuanom serrpare'tnomue' Yompor po'cohuenña. Aña neñoten amach senterrno.

26 Ñeñto'marña te'pa' o'ch neñotatas ñerra'm eseshas chenquërrtsapa' tarraña napa' ama es na'chencatam̃psase'te tarro'mar napa' chocma

neserrpare'tatase't attoch amach sechenquërro.

27 O' neserrpare'tatuas ora allohuen atet cotape'chateney Yompor. Ama es na'nasotam̃psaso ama't coñe'ta.

28 Allempoñapa' alla oterraneterr ñeñt pompornesha' penet:

—Te'pa' seño'ta'tach. Te'pa' añ pocte' o'ch secuam̃peñ cohuen allohuen ñeñt ame'ñenaya Yompor. Atetcha' sepa atet ñerra'm ñeñt cohuañpene' po'carrneror. Sapa'cho'ña atetcha' sepa sam̃a o'ch secuam̃peñ ñeñt ame'ñetsa. Ñeñtcha' setaruas sepa' atet llesenses Paret Pucamquëno't. Tarro'mar Yepartseshar Jesúsapa' o' rroma ñocpuet ñamet.

29 Napa' neñoteñ allempoch ama allo'tsennopa' o'ch huaponasa ñeñtcha' seshquë', ñapa' mueneñcha' o'ch a'psatas Yompor po'ñoñ. Atetcha' huapuet atet ñerra'm ma'yarrpa' ñerra'm huapapa' o'ch a'chencatuan allohuen carrnero.

30 Ama't e'ñe sagattsapa' orrtetcha' ñeñtcha' seshquë', ñeñt ama Yomporeyaye po'ñoñpa' ñeñtcha' serrpare'tatase'tcha'. Tarro'mar ñetpa' mueneñtcha' o'ch ame'ñatuaset e'ñe ñet pocta'pña.

31 O' alla oterraneterr Pablo:

—Te'pa' seño'ta'tach. Chocmach seyerpa'na tarro'mar sapa' seño'teñ o' ma'pa char chocma noctape'chatas cohuen—ama't yeto, ama't ñaña tsapo. Ama't neya'chpeñesha' chocma noctape'chatase't.

32 'Te' Yomporpa' cohuañpsasepa'ch. Yomporepa'chña po'ñoñ seño'tate' puemuereña. Yomporepa'chña po'ñoñ sey'chate' attoch

huomenc sepa' seyoçher. Yomporepa'chña po'ñoñ sa'queshpaterre' atet ñerra'm ñeññ allohuen ñeññ pame'ñeñoçet o' a'cohuentatuareçterret.

³³ Ñaña napa' ama neye'chapreto po'psheñeñ po'çllayor, amapa' pa'shtam ama neye'chapreto.

³⁴ Sapa' señoçenen ñeññ allpon nepalltenapa' e'ñe notot netaruasa' atto nechen ñeññ nepallta'yena. Ñaña e'ñe na netaruasoçpa' es napa'yeñ ñaña ñeññ noctene'.

³⁵ E'ñe na netaruasoçpa' çhocma neñoçatenes ñeññ poçtetsa o'ch yetaruasa' attoch es yechyes alloch yeyenpue' ñaña po'psheñeñ ñeññ es palltetsa. Añ poçte' o'ch yeyerpueña atet otye't Yepartseshar Jesús. Ñapa' atet ote't: "Nanac yocshena ñerra'm esempo es yapa'yeñ po'psheñeñeçhno, añña ama tama yocsheno ñerra'm esempo po'psheñeñpa' o'ch es apueney ya."

³⁶ Ñeñña otuapa' o' concorpa o' ma'yochatnenanet.

³⁷ Añña acheñenesha'pa' pomorrenteñoçet Pablopa' o' yahuanrrortet. A'çhono'chetpa' o' tso'ttsapa'chet.

³⁸ Atarr llequët nanac. Atet o' otanet Pablo ñeñña nanac llecatahuet çarro'mar ñapa' otanet "amach senterrno arr patsro." Allempoñapa' o' coça'neñet Pablo arrohua allo'tsen bote.

21

Allempo o'ch alla çherrerr Pablo Jerusaléño

¹ Allempoña o' yesa'nenanetpa' o' ahuañperryerr boto. Alloñapa' paçharra

yepa'pa' o' yečhap Coso. Tsapaťña'pa' arr yečhap Rodaso. Alloťña'pa' arr yetsotosa Pátaro.

² Pátaroña'pa' o' yentos po'poñ bote ñeñtcha' tatsa Fenicio. Yaña'pa' o'čho' ya'tapos alloťña'pa' ahuañperryerr boto.

³ Allempoña yetamñena sa'popa' yentnom coñe't pats ñeñt pa'so'cheñ Chipre, e'ñe arroť yentnomi ye'chcoťeroť. Atteña'pa' o'čho' yemtamñes boto, arr yesechena Sirio. Allempoña'pa' arr yetsotosa all oteñet Tiro, tarro'mar allpa' o'ch a'suatatsre'tet botot.

⁴ Yaña'pa' o' yesua attoch yentnomi ñeñt ame'ñetsa all. Allña'pa' alla ya'posa cančherrmat. Ñeñtña ame'ñetsa allpa', ñetña'pa' ochet Pablo:

—Amach petatsto Jerusaléño.

Tarro'mar Parets Puecamquēña'pa' ahuo't eñotatanet atetcha' pet Pablo all Jerusaléño.

⁵ Tarraña allempoña o' met cančherrmatpa' o' alla yahuanerrerr. Allempoña allohuen yacmanesha'pa' coťa'nemyet pueblot a'yenet, ñaña pueťaporeshoñuet ñaña puechemerneshet. Allña'pa' all yeconcorposa ontapopa' o' yema'yochosa all.

⁶ Allempoña o' yema'yochuapa' o' yeso'tenanet. Allempoña yapa' o' ya'tenerr boto, ñetña'pa' o' ahuanerret pa'paclo.

⁷ Allempoña o' yener Tiroťpa' arr yetsotuenerr Tolemaido. Allña'pa' all yehuomcha'tnomi ñeñt ame'ñetsa. Allña'pa' all yepatrranom yet.

⁸ Tsapaťña'pa' o' yahuanenerr, allempoña'pa' arr yečhap Cesareo. Allña'pa' o' yebe'tosos Felipe pa'paclo, allpa' allcha' yommosa. Añ Felipepa'

ñeñt serrpare'tene' cohuen ñoñets. Ñaña ñeñtara Felipe ñeñt net ahuaña ñach epatyesahuet rreñets epuet po'psheññechno pechapsheña.

⁹ Añ ñeñtara Felipepa' echenan pa'tatssheña po'sñesha'. Ñetpa' ama arrollareteto. Ñetñapa' nanac a'poteññañet ñamet Yompor po'ñoñ.

¹⁰ Allempoña ya'llponmatos allpa' o' huapa ñeñt a'mtene' Yompor po'ñoñ añ pa'so'cheñ Agabo. Ñapa' Judeoť huapa.

¹¹ Allempo huapapa' o' pueyosan Pablo po'chanar. Añña chanaretspa' Agabo ñañeña huancatatsa e'ñe potot ñaña pa'tcoť. O' huanca'huapa' atet otan Pablo:

—Ñeñtpa' atet oten Parets Puecamquëñ, ñeñtep echene' añ chanaretspa' judionesha' ñeñt Jerusaléño'tsa'yenpa' atetcha' huancapet atet nehuanca te' ñañeña. Ehuancaretcha' o'ch pomapet allo'tsen acheñenesha' ñeñt ama judioneshayayeto.

¹² Ñeñtña atet ye'mpa' yotare'ch Pablo:

—Amach petatsterro Jerusaléño.

Ñaña ñeñt acheñenesha' ñeñt allo'tsa'yenpa' atet otare'chet Pablo ñamet.

¹³ Allempoña Pablopa' otanet:

—Eso'mare'tña nanac seyahuena, te'pa' o'ch sellcaten. Napa' e'ñe pocte' nenteñ huanca'netepa'. Ñaña e'ñe pocte' nenteñ nerromuepa' Jerusaléño, attoch nerroma e'ñe neserrpare'teñoť Yepartse-shar Jesús po'ñoñ.

¹⁴ Pabloñapa' ama e'mñotye. Allempoña ama erroť yepepa' o'huañ erroť yoch, aña yoter:

—Ñehua, ñerra'm atette' muenen Yomporpa' ama'tpa' attepa'ch.

¹⁵ Allempoñapa' o' yañño'tatsre'tena. Allempoña o' yañño'tatsre'tuapa' yahuanenerr Jerusaléño.

¹⁶ Añña puesheña'tets cesareo'marnesha' ñeñt ame'ñetsapa' allenta co'a'nenyet, arr nehuerryeta' all ye'chena Mnasón ñeñtara ñeñt chipro'marnesha'. Ñaña' ahuatoteñ ame'ña'hua. Pa'pacloñapa' all ya'posa.

Allempo Pablopa' emo'tuerr Jacobo ñeñt Jesús pa'mo'nasheñ

¹⁷ Allempoña o' ye'cherr Jerusaléño'pa' añña ñeñt ame'ñetsa allpa' e'ñe pocsheñesha' agapyet.

¹⁸ Tsapatña puetarenpa' yahuanma parrocm Pablo o'ch yenteña' Jacobo. Añña allohuen ñeñt pompornesha' pen acheñenesha' ñetpa'cho'ña alla yentosanet, allo'tsa'yenet ñamet.

¹⁹ Pabloñapa' o' huomñcha'tosanet allohuenet. Huomñcha'tuanetpa' allempoñapa' serrpare'tatuerranet e'ñe ora allpon Yompor po'huamencot o' etsotuoñ e'ñe ñocop. Serrpare'tatuerranet atto acheñenesha' ama't ñeñt ama judioneshayayetopa' o' ame'ñatuanet ñamet.

²⁰ Ñeñta e'mhuetpa' nanac aye'chochtatoñet Yompor. Tarraña allempoñapa' atet ochet:

—Tarraña masheñe, ahuo't peño'ch te'pa' shonte' mil judionesha' o' ame'ñenet ñamet. Ñetpa' e'ñe huomenco otenet añ palltetsa allohueney ñeñtey judioneshay o'ch ye'pohua atet otye't Moisés.

²¹ Ñetpa' o' e'mare'tonapet peñoñ añe'no' pey'chaten judionesha' ñeñt ye'cha'yetsa po'poñ

anetso all yeĉha'yena ñeñt̃ ama judioneshayaye atto año' pocte' o'ch puesuerret Moisés po'ñoñ. Ñaña o' e'mare'tapet ahuo' potuanet amach tsorratsteto puechemeretollesha', ñaña amo'ch p̃atsteto atet yeyĉhena ahuatoteñ.

22 Allempoñapa' alla otereterr Pablo:

—Ñehua, te'pa' ĉerroĉe'tcha'ña yeĉaña te' tarro'mar po'ñoĉhpa' o'ch e'mare'tapet o' peĉherr arr?

23 Ñehua, te'pa' o'ch pe'mñotey o'ch yotaĉ ñeñt̃cha' atet peĉa. Ñehua, arpa' arro'tsen pa'tatssheña ñeñt̃ netset ñetañeña ñeñt̃cha' atet pet Yomporecop, ñeñt̃ atet yeyĉhena ya ñeñt̃ey judioneshay.

24 Te'pa' aña pocte' ñeñt̃cha' atet peĉa. O'ch panemñ añ pa'tatssheña e'ñe epaspa' o'ch sa'cohuentatena' ñeñt̃ atet anaret Yomporecop ñeñt̃ atet yeyĉhena ya ñeñt̃ey judioneshay. Ñaña añ pa'tatssheñapa' o'ch petsa'tanet attoch shopena'tatet, ñaña ora ñeñt̃ paltetsapa' o'ch petsa'tanet. Allochñapa' allohuen judionesha' o'ch eñochet po'ñoĉhpa' ama atteyaye ñeñt̃ atet e'mare'tet p̃ocop, tarro'mar allempopa' o'ch eñotapet p̃apa'ĉho'ña o' peĉohua ñeñt̃ atet oteney Moisés po'ñoñot̃.

25 Tarraña añecop ñeñt̃ ama judioneshayaye ñeñt̃ o' ame'ñapa' yapa' o' yemñanet carta, o' yotuanet cartoĉ ñeñt̃ pocte' yenten ñocpuet ñeñt̃cha' atet pet. Ñeñt̃pa' añeĉhno: Amach rratsteto po'ĉhets ñeñt̃ muetsenet ayeĉcataretocop ñeñt̃ po'yomporer penet. Ñaña o' yotuanet amach

rratsteto es po'rras, ñaña amach rratsteto ñeñt muetsenet ñeñt atta a'pañaret. Ñaña o' yotuanet amach chetapretatsteto taporets. Ñeñta yotanut yecartot.

Allempo rromapueret Pablo all Parets pa'paclo

²⁶ Allempoña Pablopa' o' anman añ pa'tatssheña. Tsapañña' o' a'cohuentatet e'ñe parro, ñeñt atet yeçhena judionesha'. Allempoñapa' ahuanmuet Parets pa'paclo o'ch eñotatenaneta' esempoch o'ch met allponmat e'ñe allempoch o'ch a'cohuentatuet. Allempochña Pablopa' o'ch muetsatanet Partsocop carrnero puesheña'ttsocmuet, ñeñtpa' atet pena judionesha' Yomporecop.

²⁷ Tarraña o' taya çhampoch cançherrmat allempoch o'ch a'cohuentatuetpa' añña judionesha' ñeñt huetsa Asio'tpa' o' eñchet Pablo all Parets pa'paclo. Ñetñapa' o' atsrre'matachet acheñenesha' attoch o'ch e'moñe'chet Pablo. Allempoñapa' o'ch rromuet Pablo.

²⁸ Pa'tsrre'mueño'tetpa' o' rranare'tyeset, otye-set:

—Masheñnesha judioneshacha' o'ch seyenpa'y. Te'pa' o' yenter añ acheñ ñeñt ye'moñe'tene' ñeñtey judioneshay ñeñtara ñeñt o' puesuerran Moisés po'ñoñ ñaña ñeñt o' a'sosyatuan Parets pa'paquëll. Te'pa' o' erracmañen atet o' yeçhatyesuan acheñenesha'. Elloña te'pa' o' abe'tatan ñaña acheñ ñeñt ama judioneshayaye arr Parets pa'paclo. Allochñapa' ahuo'ch a'sosyatuan Parets pa'paquëll.

29 Tarro'mar atet otet o' eñchet Pablo epuet Trófimo all chopeñe'chen epuet Jerusaléño. Trófimo ñeñtpa' efeso'marnesha', ama judioneshayaye. Ñetpa' cho' otenapuetañ ñato' Pablopa' o'te' abe'tatan Trófimo all Parets pa'paclo ñeñt ama pocteye' enteno judionesha'.

30 Allempoñapa' allohuen acheñenesha'pa' o' at-srre'muetpa' matrra'tet allo'tsen Pablo o' rromuetpa' o' cheta'nmet a'yenet Parets pa'paclo. Allorocma yotetuet Parets pa'paclo.

31 O' muetsamochet Pablopa' añña ñeñt solltarnesha' pa'mñcha'tareterpa' o' e'manet atet nanac ama'tochtena allohuen acheñenesha' all Jerusaléño.

32 Ñaña'pa' o' anman allpon solltarnesha' ñaña allpon capitánnesha'pa' o' matrra'tet allo'tsa'yen acheñenesha'. Allempoña acheñenesha'pa' o' entapan solltarnesha' epuet pa'mñcha'tareterpa' o'huañ chota'chet Pablo.

33 Allempoña chap añcha'taretpa' o' rromatan Pablopa' o' huanquët epa cadeno. Allempoñapa' a'p'to'tanet:

—¿Eso'tña pa'so'cheñ añ acheñer?

Ñaña o' a'p'to'tanet:

—¿Esté'ña o' p'ohua ña?

34 O' anapyeset po'poñe'ttsocma. Puesheña'tets acheñpa' otyeset atet cotape'chet ñet, po'potantañña'pa' atet otet po'poñ ñeñt atet cotape'chenet ñamet. Nanac ama'tochtenet ñeñto'marña ama eñocheto e'ñe po'ñoçh ñeñt atet o' p'ohua Pablo. Ñeñto'marña añcha'taretpa' anmatan Pablo pocollo all shontena solltarnesha'.

35 Allempoña o' chapuet allot a'tenet pocollopa' añña solltarnesha'pa' o' enatnomet Pablo eno, tarro'mar taye'to' acheñenesha' pa'tsrre'mueño'tpa' muetseñet.

36 Tarro'mar acheñenesha'pa' o' coťa'huanmet. Puerranare'teño' otyesnomuet:

—¡Semtseñaca'ye!

Allempo Pablopa' e'ñe cohuen eños ñocop allo'tsa'yen ñeñt e'moñe'tene'

37 A'tapachet pocollopa' Pabloñapa' otosan solltarnesha' pa'mcha'tareter, eños griegaçho, ot:

—Te' napa' nemneñ o'ch notap̄ paterr ñoñets.

A'mcha'tareñapa' och:

—¿Po'ñoçha't pe'muen griegaçh?

38 Alla otererr a'mcha'taret:

—Papa' ¿ama't aneyaype egipto'marnesha' ñeñt atsrre'mate' ahuaña acheñenesha' atto ñetpa' atpare'chet gobierno', ñeñtara ñeñt ahuanmue' pa'tatsoch mil amtsañnesha' a'yo amarato?

39 Pabloñapa' alla otererr:

—Napa' amaca'ye ñeñteyayno, napa' judioneshan ñeñten tarso'marneshan, ñeñtara anets nanac atarr ñeñt allara Cilicia. Napa' o'ch notare'tap̄ attoch pemnaten o'ch neños acheñenesnacop.

40 Allempoña'pa' o' muenatan Pablo o'ch eños. Pabloñapa' alla tomos allotecma a'tenetpa' echantosan pot attoch muetsoñeñtua acheñenesha'. Allempoña o' muetsoñeñtuetpa' Pabloñapa' o' eños hebreyaçho, atet otanet:

22

¹ —Masheñeshacha' ñaña nomporneshacha', o'ch se'mñoten ñeñtcha' atet neños e'ñe nocop.

² Allempoña e'mhuet atto o' serrpare'tatanet e'ñe ñet po'ñoñetopa', allempoñapa' o' e'ñe muet-soñeñtuet poctacma. Pabloñapa' alla oterraneterr:

³ —Napa' judioneshan, arr ne'ñalleta Tarso e'ñe alla Cilicia. Tarraña arrña e'ñe eñotñan Jerusaléño. Ñeñt neyçhate' napa' ñeñtpa' Gamaliel. E'ñe ña pueyçhateñoftenpa' netsotuoñ e'ñe poctacma ñeñt Moisés po'ñoñ ñeñt atet anaret ñeñtcha' atet pa yatañneshañ. Nanac nema'yoçhra ñeñt Yomporecop ñeñt atet sepena te' sa.

⁴ Napa'çho'ña ahuañmo'chapa' nanac nemue-roçhtache't ñeñt cotene' Jesús poctapña. Napa' o'ch nerrmanatanet, allotñapa' o'chçho' nehuan-catanet, ñaña o'chçho' nabe'tatanet ñaña cárcelo. Ñaña nemtsatatue't —yacmanesha' ama't ñaña coyaneshaçhno.

⁵ Ama't cornesha' ñeñt nanac añcha'taretpa' eñotuane't ñeñt atet nepe't. Ñaña allohuen ñeñt pompornesha' penetpa' e'ñe eñotuennet ñamet ñeñt atet nepe't. Ñet allempopa' ahuo't apnet orden ñeñtcha' napueña' yamo'ts judionesha' ñeñt Damasco'tsa'yen. Añ orden ñeñtpa' alloch mueñanet attoch o'ch nerrmanatue ñeñt ame'ñaye't Jesús. Ehuancaretetpa' o'ch nahuanmanet Jerusaléño allcha' yecoñchatuanet.

*Allempo Pablopa' serrpare'tatanet atto ello cotape'cherran cohuen Yomporecop
(Hch. 9.1-19; 26.12-18)*

6 'Atteñapa' o'cho' ahuen Damasco. Allempoña nechapmoch Damascopa' allempo o' chapmoch pocto. Ñeñña nanac poptetsa entotpa' machayo'tepa'tcha' choyo'tam̄psapuen.

7 Allempoña choyo'tam̄psen e'ñe neshopa' nañapa' alla nerrmopra patso. Allempoña nechap patsopa' ne'm ñoñets ñeññ atet oten: "¿Eso'mare't Saule, pemuerochtatennanña ñeññ name'ñenaya?"

8 Nañapa' o' not: "¿Eshape't Ayochreshate eñets?" Ñeññ eñetspa' alla oterrerr. "Napa' ñeññen Jesús en ñeññen nazareto'marneshan, naramche'ña atarr pemuerochtaten."

9 Ñeñña allo'tsenen e'ñe parropa' ñetpa'cho'ña entetca'yeña ñeññ nechoyo'te' ñeññña' cha yore'tanet tarraña ñetña' ama eñochetoña ñeññ atet notare'tta.

10 Nañapa' o' alla noterrerr: "¿Est'e' Partse-shacha' poctetsa ñeññcha' atet ne'pa?" Partsesha'ña Jesús pa' alla oterrerr: "Te'ñapa' o'ch petanta o'ch ahue'p Damasco. Allcha'ña otapet allohuen ñeññ anaret ñeññcha' atet pe'pa."

11 Allempoñapa' o'huañ nenta tarro'mar o'rrechaten ñeññ po'ptetsa ñeññ nechoyo'tam̄pse'. Ñeñña noctene' ñetña' echa'nomnet notot. Attoña chapatnet Damasco.

12-13 'Ye'chap Damascopa' allempoñapa' huapa puesheñarr añ pa'so'cheñ Ananías. Añña Ananías pa' nanac ame'ñenana ora allohuen ñoñets ñeññ atet anaret yocop ñeññey judioneshapay ñeññcha' atet ye'pa. Añña judionesha' ñeññ ye'cha'yetsa Damascopa' nanac cohuen enteñet Ananías. Nañapa' huapa neshopa' allenta

ponmosnapa' otosen: "Te'pa' masheñe Saule pecuerrepa'ch." Nañapa' allorocmuepa'tcha' necuerr, allempoñapa' neñch Ananías.

14 O' alla oterrerr Ananías: "Añ Yompor ñeñt Po'yomporer pe't yatañneshañ, ñaca'yeña pa'crerre'ña pa' ama't ahuatoteñ añecop o'ch peñotuerrñañ atet muenen ña. O' muenatap ñaña o'ch penterrñañ paña Puechemer ñeñt e'ñe pocte' es pets. Ñaña o' muenatap o'ch pe'mñotoñ e'ñe ña po'ñoñ ñeñt atet o' otuañ.

15 Te'pa' ñeñtpa' atetcha' peña, o'ch pa'potoñ Jesús po'ñoñ erracmañen ñeñt atet o' pentua ñaña ñeñt atet o' pe'mua.

16 Te'pa' añ palltetsa o'ch petanta, e'ñe pame'ñeñoñ Yepartseshar Jesús pa' o'ch pa'pataretterra, attochña e'shohuaretterra po'chñar." Neñtpa' allohua atet oten Ananías.

Atto Pablopa' eñotatanet ñapa' ña serrpare'tatene' ñeñt ama judioneshayaye

17 O' alla oterrerr Pablo:

—Allempoña o' met allponmatpa' o' nohuerrerr arr Jerusaléno. Parrochña allempo nema'yochena Parets pa'paclopa' allña pa' orrtona atet ñerra'm cho es ye'chopo'ten.

18 Allempoña o' orrtona Yepartsesharpa' atet oten: "Tayecma o'ch ahuerre'p arro't Jerusaléno't, tarro'mar arrpa' amach esesha' pe'mñotaye allempoch pa'potoñ neñoñ."

19 Nañapa' alla notererr: "Partseshacha' ama't atetpa' allohuen achenesha'pa' e'ñe eñotuennet atet o' ne'pohua. Eñotuennet atto napa' nebe'tose't

judionesha' po'prahuo atto nenalle'tache't ñeñt
 pame'ñenaya, ñaña atto nabe'tatanete't cárcelo.

20 Ama't allempo muetset Estebañañ ñeñt
 pa'potaye't peñoñpa' napa'cho'ña allempopa'
 e'ñe pocte' neñch muetsetepa'. Napa' allña
 necuam̄psanet pa'shtam ñeñt rrolle'te'. All
 necuapretpa' napa'cho'ña e'ñe pocte' neñch
 atepa'ña pet."

21 O' alla oterrnerr Yepartseshar: "Ama't atetpa'
 te'pa' o'ch ahuep̄ o'ch nemñañ allap̄ar allo'tsa'yen
 acheñenesha' ñeñt ama judioneshayayeto."

*Allempo solltarnesha' pa'm̄cha'tareterpa'
 abe'tatan Pablo o'pono*

22 Ñeñta otua Pablopa' añña acheñenesha' ñeñta
 e'muetpa' o'huañ e'mñochet. O' alla rrannarter-
 reterr, atet otet:

—¡Semtseñaca'ye! Ama pocteyaye o'ch corra ñeñt
 atet acheñ arr patsro.

23 Pa'tsrre'mueñoñetpa' alla rrannarterreter-
 rpa', o' gogo'tyeset pa'shtam enonet, allotpa'
 a'rrotsetyeset ñaña patspa' o' huapore'tyeset
 enonet.

24 Allempoñapa' añña ñeñt solltarnesha'
 pa'm̄cha'tareterpa' o' abe'tatan Pablo o'pono.
 O'ch ashtet attotcha' a'meta'huan ñeñt atet o'
 p̄ohua. Ñapa' mueneñ o'ch eñoch esocopte' nanac
 ama'toçhtenet ñocop.

25 Allempoñapa' o' huanquët Pablo attoch ashtet.
 Huanca'huet Pabloñapa' otan capitán ñeñt tets al-
 lame'tets:

—Ta', ¿pocete't senteñ o'ch sashte' acheñ ñeññ romanona'tar, ñaña ama señoña' ñeññ atet pena? Ñoñets ñeññ atet anaret Romoŕpa' ta', ¿pocete'te'?

²⁶ Ñeñña e'm capitánpa' o' ahuo' allo'tsen pa'mcha'tareŕpa' atet otos:

—¿Erroŕena't pŕoctape'cheññañ añ acheñer? Añpa' romanona'tarca'ye.

²⁷ Añña ñeññ solltarnesha' pa'mcha'tareŕpa' o' huapapa' atet otosan Pablo:

—¿Po'ñocha't romanona'tarepŕ?

Pabloñapa' o' anaŕ:

—Napa' ñeññenca'ye.

²⁸ Ñeñña amcha'tareŕpa' alla oterranerr Pablo:

—Napa' o' netsa'ta shonte' quelle attoch a'punta'net attoch napa' romanona'tar pennet.

Pabloñapa' alla otererr:

—Napa' attot ne'ñalleta, ŕarro'mar na nomporpa' romanona'tar.

²⁹ Añña solltarnesha' ñeññ autsa ashtayeñ Pablopa', allorocmo' alla cheta'yerret a'yenet. Ñeññ pa'mcha'tareŕpa' ñapa'cho'ña cha yoren, ŕarro'mar o' çapoña pueyoçhro o' huanca'huet acheñ ñeññ romanona'tar.

Allempo eños Pablo allo'tsa'yen ñeññ çocma a'pocatyene' ñoñets

³⁰ Tsapatña puetarenpa' añña amcha'tareŕpa' o' agotatan cornanesha' ñeññ pa'mcha'tareŕnesha' pen allohuen judionesha' po'cornaneshar, ñaña o' agotatan ñeññ çocma a'pocatyene' ñoñets judioneshacop. Allempoña apçhetpa' o' pueyanŕperet Pablo allo huanquëtpa' o' anmet allo'tsa'yen amcha'tareŕnesha'. O' çapachetpa'

o' ʔomatōset e'ñe allame'tets. Añña am̃cha'tareʔ romanonesha'pa' mueneñ o'ch eñoch e'ñe po'ñoch esocopte' otteñe'cheñ judionesha'.

23

¹ Pabloñapa' o' cohua'yesan allohuen ñeñt̃ chocma a'pocatyene' ñoñets. Allempoñapa' atet̃ otanet:

—Masheñeshacha', napa' chocma nocrena cohuen Yomporecop, ama't ahuatoteñ ama't ñaña ʔeme'ttsen. Yomporpa' entennante' e'ñe cohuen neyoçher.

² Añña cornesha' Ananías ñeñt̃ara ñeñt̃ nanac am̃cha'tareʔpa' atet̃ otan ñeñt̃ tets e'ñe allame'tets Pableshe, atet̃ otanet:

—Chosañaca'ye asnama'te'.

³ Allempoña Pablopa' otan am̃cha'tareʔ, atet̃ och:

—Yomporpa' tsa'tatuerrpepa'ch, ʔarro'mar ama't ʔorrtenañ e'ñe cohuenpa' peyoçhropa' ama masosyape. Ñaña ñeñto'marña anareʔeʔ ʔa arr attoch ʔapa' peñotaten ñato' çate' nepena ñeñt̃ ama poc̃teyaye ñeñt̃ atet̃ otaney ñoñets ñeñt̃ atet̃ anareʔ. Tarraña ʔañapa' o' at̃ta pasnama'taten. Tarraña ñeñt̃pa' ama poc̃teyaye ñeñt̃ atet̃ otaney ñoñets ñeñt̃ atet̃ anareʔ.

⁴ Añña ñeñt̃ ʔom̃cha'tets allame'tetspa' o' che'ptare'chet Pablopa' atet̃ ochet:

—Papa' atarro't cohuen penteñña o'ch pesochatse'ch cornesha' ñeñt̃ nanac am̃cha'tareʔ ñeñt̃ nen Yompor.

⁵ Pabloñapa' anapanetpa' atet̃ otanet:

—Napa' ama masheñeshacha' neñoteñe añmapa' ñeñt'e' cornesha' ñeñt' nanac amcha'taret. Ñerra'm neñoteñeñpa' amach nochñe atet, tarro'mar anaret Yompor po'ñoño atet: “Ama asochatse'tpahuo acheñ ñeñt' amcha'tarettetsa socop.”

⁶ Allempoñapa' o' cotape'ch Pablo. Añña ñeñt' chocma a'pocatyene' ñoñets patantarrñapa' saduceonesha', po'potantañapa' fariseonesha'. Allempoña Pablopa' o' eñoch atetpa' allempoñapa' o' eños huomencpa', atet otanet:

—Masheñeshacha', napa'cho'ña fariseoneshan. Natañneshañpa'cho'ña fariseoneshet. Ñeñto'marña te'pa' otteñe'chennet tarro'mar napa' name'ñena atto ñerra'm yerroma, Yomporpa' tantaterreycha' esempohuañen.

⁷ Ñeñta otua Pablopa' allempoñapa' ama patraye' cotape'cheto ñeñt' actape'chatañnesha'. Añña ñeñt' fariseonesha' ñetpa'cho'ña cotape'chet paterr, po'potantañña ñeñt' saduceonesha'pa', ñetpa'cho'ña o' cotape'chet po'poñ. Amaña patraye' cotape'cheto.

⁸ Ama patraye' cotape'cheto tarro'mar saduceonesha' ñetpa' cotape'chenet ñerra'm yerromapa' amach yetanterro. Ñaña ñetpa' otenet ama eñalle Yompor po'mllañoñeñer ñeñt' huetsa entot, ñaña ñetpa' otenet ama eñalle yecamquëñ. Tarraña fariseonesha' ñetpa' cotape'cheñet po'ñoñ ñerra'm yerromapa' yetanerrach. Ñaña ñetpa' otenet po'ñoñ eñall Yompor po'mllañoñeñer ñeñt' huetsa entot, ñaña po'ñoñ eñall yecamquëñ.

9 Allempoñapa' ñetañeño' nanac ama'toçhtet. Atteñapa' puesheña'tets fariseonesha' ñeñt nanac etsotene' ñoñets ñeñt atet anaret o' tomosetpa' eñososet Pablocop, atet otet:

—Añ acheñer yapa' ama yenteññañe erra'tsente'ña po'chñar. Po'ñoçhpa' ñato' orrtoña Yompor po'mllañoñeñer ñeñt huetsa entoñ amapa' ñato' es ñeñt camquëñets ñato' ñeñt orrtenoya. Ñeñto'marña yapa' amachña cha yepatare'tatsche Yompor ñerra'm ñafe' atet muenatene'.

10 Allempo nanac ama'toçhtenetpa' añña solltarnesha' pa'mñcha'tareterpa' o' cotape'ch, atet ot:

—Ñato' o'ch rraquët Pablo.

Ñeñto'mar o' chore'tan po'poñ solltarnesha' o'ch huapuet o'ch chetereta' Pablo allotpa' o'ch aneret pocollo all shontena solltarnesha'.

11 Tsapatña tsapopa' o' alla orrteññañerr Pablo Yepartseshar, atet otos:

—Amach pellcatsto, tarro'mar Romopa'cho'ña all palltena o'ch pa'poñon neñoñ atet o' pa'poñon arr Jerusaléño.

Allempo judionesha'pa' atarr o'pachet Pablo o'ch muetset

12 Tsapatña puetarenpa' añña judionesha'pa' atarr o'pachet Pablo ahuo'ch muetset. Ñetpa' o' a'pochtachet, atet otet:

—Yapa' amach yerrerroña' ñerra'm amach o' yemtso Pablo ñaña amach es yorrerro. Atteña ñerra'm amach attetopa' ama'tpa' esepa' yetan-toya.

13 Ñeññaña o'patenayapa' ñato' metente' pa'tatsoñ çharrasheña.

14 Allempoña o' a'pochtatueta' ahuanmuet ñaña allo'tsa'yen cornaneshá' ñeñt pa'mcha'tareternesha' pen allohuen judionesha' po'cornaneshar ñaña allo'tsa'yen ñeñt pompornesha' penet. O' chapuet allpa' atet otoset:

—Yapa' o' ya'pochtatueta atet: Yapa' yoten ñerra'm amach o' yemtso Pablopa' amach yerro. O' ya'pochtat ñaña atet: Atteña ñerra'm amach attetopa' ama'tpa' esepa' yetantoya.

15 Alla oterreterr:

—Ñehua, te'pa' o'ch yotas ñeñtcha' atet sepa. O'ch soteña' ñaña ñeñt chocma a'pochtatyene' ñoñets allotpa' eñe parrocmapa' o'ch semña ñoñets allo'tsen solltarnesha' pa'mcha'tareter, o'ch soch huapachetepa' Pablo sesho attoch o'ch señoñ este' o' pohua. Tarraña ama'tcha' atet seshcanetpa' yañapa' allo'tsa'yeneycha' toño attoch yapa' o'ch yerrmañ.

16 Añña Pablo pa'ñachorpa' o' e'mare'ch cha o'pateññañet pa'go'pa' o' ahua' solltarnesha' pa'paclopa' o' otenana' pa'go' Pablo.

17 Alloña Pablopa' o' chore'tan puesheñarr capitán, atet och:

—Añ huepuesha'pa' o'ch panemñ allo'tsen pa'mcha'tareter tarro'mar ñapa' atarr mueneñ o'ch es a'metena'.

18 Capitánñapa' o'cho'ña anman huepuesha' allo'tsen pa'mcha'tareter. Allempoña chappa' atet otosan pa'mcha'tareter:

—Añ Pablo ñeñt ehucaretpa' ahua't chore'ten allotpa' oten ahua'ch nanemñ añ huepuesha' pesho tarro'mar ñapa' nanac mueneñ o'ch es a'metena' pesho.

19 Añña am̃cha'taretpa' o' echa'nman hupuesha' pototpa' o' anem̃ a'yenetpa' atet otos:

—Ñehua, o'ch p̃oten este' pemnen o'ch p̃oten.

20 Hupuesha'ñapa' atet och:

—Añña judionesha'pa' o' a'pochtachet attoch o'ch enamapet o'ch pemñe Pablo tsapat allo'tsa'yen ñeñt̃ chocma a'pochtatyene' ñoñets. Ñaña o'ch otapet añeçpo'ch pemñe atto'ch eñochet e'ñe po'ñoch este' o' p̃ohua.

21 Tarraña amach p̃ame'ñatstaneto errotencha' otospet tarro'mar metente' pa'tatsof̃ çharrasheña judionesha' ñeñt̃cha' camroya toño ñeñt̃cha' rromapue' go'. Ñetpa' o' a'pochtachet amach rrrerreto ñaña amach es orreto ñerra'm amo'ch muetseto go'. Ñaña o' a'pochtachet ñerra'm amo'ch attetopa' ama'tpa' esepa'to' tantahuet. Te'pa' aña palltetsa ñeñt̃cha' atet p̃otanet.

22 Am̃cha'tareñapa' atet otan hupuesha':

—Tarraña amach esesha' p̃otatsto p̃apa' o' p̃otuenna'.

Ñeñta otuepa' allempoñapa' o' mueñer.

Allempo çhapachet Pablo allo'tsen gobernador Félix

23-24 Allempoña am̃cha'taretpa' agotatan epsheña po'captáner. Allempoña o' çhapuetpa' atet otapanet:

—Cherra'ch a las nueve tsappa' o'ch secamrat doscientos solltarnesha' ñaña setenta ñeñt̃ montenaya cahuall, allotpa' ñaña doscientos ñeñt̃ orrene' muetsamets alloch quellaret. Allotpa' o'ch sanem paterr cahuall amapa' epa alloch

monta'nma Pablo. Alloñapa' o'ch sahanma Cesareo attoch sechapach cohuen Pablo allo'tsen gobernador Félix.

²⁵ Allotpa' quellcan ñaña carta ñeñtpa' atet ot:

²⁶ “Gobernador Félix ñeñtep nanac cohuenep añcha'taret, na Claudio Lisiaspa' o'ch nehuomcha'tap añ necarto.

²⁷ Añ yacmapa' ahuo't rromue' judionesha' o'ch muetseta'na' nañapa' o' neñoche ñapa' romanona'tar. Nañapa' nehuapa epan nesolltarne-sharpa' o' na'rroyatatos.

²⁸ Napa' nemneñ o'ch neñoche esocopte' nanac otteñe'cheñet, ñeñto'marña napa' o' nanem allo'tsa'yen ñeñ chocma a'pocatyene' ñoñets ñeñ atet yechenet ñet.

²⁹ Tarraña napa' neñotoñ ñeñtecop otteñe'cheñet, tarro'mar ñetpa' otenet ama atteye' peno atet anaretet ñocpue. Ñeñtecpaña otteñe'cheñet tarraña ama añecpayaye attoch o'ch yemtsach amapa' o'ch yeyottam'psach.

³⁰ Allempoña napa' o' ne'mare'ch judionesha'pa' cha o'pateña o'ch muetset. Ñeñto'mar te'pa' o'ch nemne pesho tayecma. Ñaña o' notueña ñeñ otteñe'chene' arpa', te'pa' a'meteñetepa' pesho esocopte' otteñe'cheñet. Te'pa' ñeñfach nota'p.” Allohua huañ po'carta.

³¹ Allempo atet otanet pa'm'cha'tareterpa' añña solltarnesha'pa' e'ne a'nahua anmet Pablo tsapocma. Alloñapa' o' chapuet all anetso pa'so'cheñ Antípatris.

³² Tsapaña añña solltarnesha' ñeñ chope'chets pa'tcopa' allo'ta puerra'cherret Antípatriso'. Al-

lotpa' aña anmue'ña Pablo Cesareohua ñeñt̃ montetsa cahuallo.

³³ Allempoña chapuet Cesareopa' o' aposet gobernador carta. Ñaña o' chapachet Pablo e'ñe ñesho.

³⁴ Allempoña gobernadorpa' o' lleya'huan cartapa' a'p̃to'tan Pablo:

—¿Erra'tsena'tña anetsroṭ pehuapa?

Ñaña'pa' atet och:

—Arroṭ nehuapa Ciliciot̃.

Allempoña gobernadorpa' o' eñoch allot huapa

³⁵ allempoña'pa' otan Pablo:

—Te'pa' allach ya'pochtachña' ato't hua'cha'ta' ñeñt̃ potteñe'chene'.

Allempoña'pa' o' mueñan po'solltarneshar cohuam̃psetepa' Pablo allara añcha'taret Herodes po'palaciopahuo.

24

Allempo judionesha'pa' otteñe'choset Pablo allo'tsen añcha'taret Félix

¹ Pa'mnarmatñoña'pa' huapa ñeñt̃ pa'm̃cha'tareter pen allohuen judionesha' po'cornaneshar, ñeñt̃pa' añ pa'so'cheñ Ananías. O' huapa ñaña allponsheña ñeñt̃ pompornesha' penet. Alloṭpa' huapa ñaña puesheñarr ñeñt̃ pa'so'cheñ Tértulo ñeñt̃pa' ñeñt̃cha' eñosapretahuē. Allempoña huapuetpa' o' ahuanmuet allo'tsen gobernador attoch otteñe'choset Pablo.

² Allempoña'pa' huapachet ñaña Pablo'pa' o' chore'chet ñanom Tértulo attoch eños ñanom. Ñaña'pa' añecpa eños attoch otteñe'chet Pablo.

Ñanompa' o' eños eñe cohuen gobernadorocop ñeñt Félix, atet ot:

³ —Pa gobernadoro, nanac cohuen yenteneþ tarro'mar eñe þotot yocrrena e'ne cohuen ama eñalle attoch yeçllaranna'ta. Ñaña þapa' o' þa'pocatonay eñe cohuen ñeñt yepalltena arr yenyo. Ñeñto'mar ya te'pa' yemneñ o'ch yeparasyoso't þocop attoch çhocma peyenpueney cohuen.

⁴ Te'pa' attoch amach alla nellapso eñosetspa' napa' nemneñ eñe pemorrenteñoþpa' o'ch pe'mñoten mame' ñeñtcha' notaþ.

⁵ Yapa' yeñoteñ añ yacmapa' nanac atsrre'moçhtena, nanac moññe'tatyenana ora allohuen judionesha' atto te'pa' ama patrraye' cotape'cheneto. Ñaña añmapa' ñeñt pompore pen allohuen ñeñt coçene' pocþaþña ñeñt huapatsa Nazaretot.

⁶ Elloña te'pa' mueneñeñ o'ch a'sosyatuanenñ ñaña Parets pa'paquell, tarraña yañapa' o' yer-rmue'. Ñaña yapa' yemneñeñ o'ch ya'pocacheñ atet anaret yocoppa'

⁷ tarraña o' huapa añcha'taret Lisias epuet po'solltarnesharpa' eñe po'huamencocma o' puerratanþpenyeta'.

⁸ Allotñapa' atet otey ñeñtey otteñe'chene' yehuapuepa'to' pesho. Te'pa' þachña a'þto'tare'te' attoch peñoç þaña ora allohuen attot yotteñe'cheñ. Añpa' allohua atet eños Tértulo ñeñt eñosapretahuat.

⁹ Judionesha'pa'çho'ña atet otet:

—Po'ñoçhca'ye atet.

¹⁰ Allempoña gobernadorpa' o' yochan Pablo attoch eños ñaña. Allempoña Pablopa' atet ot:

—Napa' e'ñe nocsheñesha' o'ch neños pesho e'ñe nocop, tarro'mar napa' neñoteneñ o' shonte' char atto ña'mñcha'tareñtena arr yenyoy.

¹¹ E'ñe ñaya o' met çharramat puechena epomuet atto o' nema'yochuena' Parets pa'paclo all Jerusaléño. Ama't esesha' ña'pñto'tpa' atetcha' otapet.

¹² Tarraña allempo ñetpa' ama entneto o' esesha' notnare't, ñaña ama na'tsrre'moçhtana'che acheñenesha'. Ñaña ama na'tsrre'moçhto ama't Parets pa'paclo, ama't ñaña judionesha' po'prahuo, ñaña ama't all chopeñe'chyen acheñenesha'.

¹³ Neñto'marña te'pa' amate' erroñen eñotatapeto añmapa' ñeñt e'ñe po'ñoçh attota otteñe'chennet.

¹⁴ Napa' te'pa' añach na'meta' pesho, napa' name'ñena ñeñt e'ñe alloch yequeshperra. Po'ñoçh napa' añ name'ñena ñeñtara Yompor ñeñt Po'yomporer pe't yatañneshañ. Ñaña añ name'ñena ora allohuen ñoñets ñeñt atet anareñ judioneshacop. Ñaña añ name'ñena ñeñt atet quellquë't ahuat ñeñt a'mñtaye't Yompor po'ñoñ.

¹⁵ Ñaña napa' añ name'ñena ñeñt attoch esempohuañen Yomporpa' tantaterrancha' allohuen acheñ—ñeñt e'ñe cohuen acheñ ñaña ama't ñeñt ama cohuenayaye acheñ. Ñetpa'cho'ña ñeñtara ame'ñenet.

¹⁶ Neñto'marña napa' çhocma nema'yochrena attoch Yomporpa' enten e'ñe cohuen, ñaña attoch acheñenesha'pa'cho'ña o'ch entennet e'ñe cohuen ñamet.

17 'Napa' shonte' char chocma nechopeñen erraparen anetso'mar. Te'pa' o' taya nohuerra arr attoch napa'yesuer namo'tsesha' quelle ñeñt huocchañneshachno. Añ quellepa' ñeñtara apa'yesen ñeñt ame'ñenaya Yompor. Napa'cho'ña eñalleñ ñeñtcha' nepomañ Yomporecop.

18 O' taya chapmochañ allempoch o'ch na'cohuentatuañ Yomporecoppa' judionesha'ñapa' o' entnet all Parets pa'paclo. Tarraña allempopa' ama tama shonteyaye acheñ ñeñto'mar ama tama esesha' ama'tochtetso.

19 Tarraña e'ñe allempopa' o' cha'cha't ñaña judionesha' ñeñt huachetsa Asiot. Ta', te'ñapa' eso'marte'ña ama ñetaye'ña huapatseto arr attoch ñerra'm po'ño'ch mueneñet o'ch otteñe'chnet na.

20 Tarraña te'pa' ama huapueto ñetpa' ñehua, te'pa' otetepa' ñeñt huacha'tatsa te'. A'metetepa' ñerra'm po'ño'chte' este' nepanta' allempo na'tomos allo'tsa'yen ñeñt chocma a'pocatyene' ñoñets.

21 Allempopa' aña neños paterr huomenc atto notanet. Añecop napa' otteñe'chennet tarro'mar napa' name'ñena atto ñerra'm yerromapa' yetan-terrach esempo. Ñehua, ñato' ñeñtecpate' otteñe'chennetña te'.

22 Ñeñta otua Pablopa' aña Félixpa' ama mueno o'ch alla serrpare'terretter; tarro'mar ñapa' o' eñotmoch atet ame'ñena ñeñt cotene' Cristo. Ñeñto'marña atet otanet:

—Ñehua, te'pa' ñeñtach yot. Esemepochña huapa ñaña añcha'tare't Lisiaspa' allempochña ya'pocatat ñoñets.

23 Allempoña atet oterran po'captáner:

—Te'pa' allach secuanpererr Pablo. Amach tama sa'montsatsche. Ñaña čhocmach semnach ñeñt yemtenaya o'ch es aḡ ñeñt palltena.

²⁴ Allponmaterrerrpa' o' huerra Félix Cesareo epuet pueḡapor ñeñt pa'so'cheñ Drusila, ñeñtpa' judionesha'. O'ña čherr Félix o' agotatuenan Pablo tarro'mar ñetpa' mueneñet o'ch serrpare'tatanet ñamet Pablo errotente' ame'ñenana Jesucristo.

²⁵ Allempoña čhap Pablopa' o' serrpare'tatanet cohuen ñeñt atet yepena ya ñeñtey ame'ñetsa. Ñaña atet otanet añcha' yema'yočhra attoch e'ñe pocte' es yeḡa'yen, ñaña amach yeḡatsto ñeñt ama cohuenayaye tarro'mar Yomporpa' tsa'tatuerryach allempoch acerran allohuen acheñenesha'. Ñeñta otua Pablopa' añña Félixpa' čha yoren. Allempopa' alla oter:

—Te'pa' orrerreḡ, esempochña
e'ñe pocta'huerrnanerrpa' o'ch alla
nečhore'taterrerr.

²⁶ Félixña'papa' atta cohuenan Pablo ñato' o'ch aḡ quelle añecop attoch a'royer. Ñeñto'mar errotenopa' o'chčo'ña agotach attoch serrpare'tet epuet.

²⁷ Atteñapa' o' met epa charpa' o' camyerra gobernador, huapa po'psheñeñ amčha'taret añ pa'so'cheñ Porcio Festo. Ñaña'papa' nanac mueneñ o'ch coshatan judionesha' ñeñto'marña ama a'royerrano Pablo, atet ot:

—Allepa' preso.

25

Allempo čhapachet Pablo allo'tsen amča'tareť Festo

¹ Allempoña amča'tareťta Festo all Cesareopa' poma'pamtañoña' o' ahuo' Jerusaléño.

² O' čhap Jerusaléño'pa' añña cornanesh' ñeñť nanac amča'tareťnesha' ñaña epuet ñeñť nanac sherbets judioneshacoppa', o' serrpare'tatapet Festo atto otteñe'cheñet Pablo.

³ Ńetpa' atet ochet Festo agotatanepa'to' Pablo attoch huapa Jerusaléño, tarro'mar ñetpa' ahuañacma a'pocstatuet o'ch cohuet Pablo toño attoch muetsapueret all.

⁴ Festoña'pa' atet otanet:

—Pablo'pa' allo'tsena all yottampeñet Cesareo. Napa' o' nesecherra o'ch ahuerren Cesareo. Ńato' e'ñech na'llponmatena o'ch ahuerren.

⁵ Te'pa' ñeñť nanac amča'tareťtetsa socoppa' cota'nerrnetepa' allochña'pa' otteñe'cheñetepa' Pablo all, ñerra'm po'ñočhte' eñall alloch otteñe'chet.

⁶ Festoña'pa' alla a'pa Jerusaléño allponmat. Ńato' po'psocmatño amapa' po'čharramatño'pa' o' ahuerren Cesareo. Cherr Cesareopa' tsapaťña e'ñe ahuatecmapa' o' anorros allecma a'pocstatenet ñoñets. Alloťña agotatan Pablo.

⁷ Allempoña huapachet Pablo'pa', añña judionesh' ñeñť huačha'tatsa allpa' čha arrotampesyet. Allempoña'pa' otteñe'choset. Shonte' esocmañen nanac sosey toma'tampesyesoset Pablo, tarraña ama erroťenoť eñotacheto amča'tareť Festo attoch otoset e'ñe po'ñočh.

⁸ Pabloñapa' o' eños ñaña ñocop atet ot:

—Napa' ama cho nachmāre'teno ñoñets ñeñt atet anaret judioneshacop. Ñaña napa' ama cho na'sosyateññañe Parets pa'paquell. Ñaña napa' ama cho naṭpare'teno ñoñets ñeñt nen amīcha'taret Romot.

⁹ Tarraña Festopa' nanac mueneñ o'ch coshatan judionesha', ñeñto'marña otan Pablo:

—¿Pocte't penteñ o'ch ahueṣ Jerusaléño allñapa' allcha' nentonap̄ atto po'ñochte' alloch otteñe'chapet?

¹⁰⁻¹¹ Pabloñapa' alla anapuererrr, atet ot:

—Napa' añña pocte' nenten o'ch a'pocaton amīcha'taret ñoñets ñeñt romo'marnesha', tarro'mar amate' errotenot neto Jerusaléño, tarro'mar ama erroṭ nepeñeña judionesha', ama't p̄apa' peñotueñ. Ñeñto'mar aña pocte' nenten o'ch a'pocaton amīcha'taret ñoñets ñeñt romo'marnesha'. Te'pa' arro'tsenen pesho ñeñteṣ eñets epaṣ amīcha'taret romo'marnesha' ñeñt pocte' nenten na, ñach a'pocate'ña ñoñets nocop. Tarraña ñerra'm po'ñochte' añ o' neṣohua ñeñt ama pocteyaye amapa' atet ñerra'm alloch muetsanet ñeñtpa' e'ñe pocte' muetsanetepa'. Tarro'mar ama nemno o'ch na'queshpata nañeña. Tarraña ñerra'm e'ñe attotapa' ama pocteyaye o'ch pepomuen judioneshesho. Ñeñto'mar napa' nemneñ o'ch a'pocaton amīcha'taret ñoñets ñeñt romo'marnesha' e'ñe ñapueṣ.

¹² Allempoña Festopa' o' serrpare'tet epuet ñeñt parro cotape'chatannenet. Allempoñapa' atet otan Pablo:

—Te'pa' nanac am̄cha'taretesho pesechenapa' ama'tpa' allcha'ca'ye peta.

Atto eños Pablo allempo huapa am̄cha'tareť Agripa

¹³ O' allponmaterrerrpa' huapa am̄cha'tareť Agripa epuet po'ch Berenice. O' chapuet Cesareo all emoteñeta' am̄cha'tareť Festo.

¹⁴ O' allponmatosetpa' allempoña Festopa' serppare'tatanet atto otteñe'cheñet Pablo, atet otanet: Arrpa' allo'tsen puesheñarr yacma ñeñt na'nom Félix ahuaña all yottampeñet.

¹⁵ Allempoña napa' Jerusaléño'tsenenpa', añña cornanasha' ñeñt pa'm̄cha'tareťernesha' pen allohuen judionesha' po'cornaneshar, ñaña po'potantañ ñeñt pompornesha' penet, ñetñapa' o' serrpare'tatnet atto otteñe'cheñet Pablo, ñaña otnet napa' nemtsachepa'to' Pablo.

¹⁶ Nañapa' atet notanet: “Ñeñt ñoñets anareť Romoťpa' ama pocteyaye o'ch yemtsach acheñ ñerra'm ama eñorena' e'ñe ñocop attoch eñotatanet atto otteñe'cheñet.”

¹⁷ Ñeñto'marña allempo huačha'ta judionesha' nesho, allempoña na tsapatñapa' o' nanorros allecma ya'poctaten ñoñets. Allempoña napa' o' nagotach Pablo.

¹⁸ Añña ñeñt huačha'tatsapa' allenta tom̄cha'toset attoch o'ch alla otteñe'chueñeterr Pablo, tarraña amaña añeye' a'meta'yeseto atto ñeñt poctetsa o'ch yemtsach acheñ.

¹⁹ Aña a'meta'yeset ñeñt e'ñe ñocueta atet yečhenet ñet judioneshet. Ñaña aña a'meta'yeset ñeñt poctařña puesheñarr ñeñt pa'so'cheñ Jesús,

Ƨarraña ñeñƧpa' o' rroma, Ƨarraña Pablopa' Ƨha oten ñeñƧpa' o' tanterra.

20 ÑeñƧo'marña napa' ama tama neñoche attoch na'pocƧat ñoñets ñocpuet. ÑeñƧo'marña atet noch Pablo po'tomña: “¿PocƧe'te' penteñ o'ch ahuep Jerusaléño allcha' ya'pocƧatena' ñoñets?”

21 Tarraña Pablopa' ama mueno. Ñapa' aña muena' allach arr; allotcha'ña esempopa' entateñetepa'to' añcha'taret Augusto all Romo. ÑeñƧo'marña napa' not: “Te'pa' allepa' arrma, esempochña napa' o'ch nemñe añcha'taretesho Romo.”

22 Allempoña añcha'taret Agripapa' atet otan Festo:

—Napa' atarr nemneñ o'ch ne'm ñaña er-rotente' serrpare'ten Pablo.

Allempoña Festopa' atet och:

—TsapaƧcha'ña pe'mñota'mueñ.

23 TsapaƧñaapa' huapa'muena añcha'taret Agripa epuet ñaña po'ch Berenice. Ñetñaapa' Ƨha cohuenetyesoset. Allempoñapa' be'tosƧa'toset allecma serrpare'tatannena añcha'taretnesha'. O' be'tosƧa'tet epuet ñaña solltarnesha' pa'mcha'taretnesha' ñaña po'poñechno acheñenesha' ñeñƧ nanac sherbets all anetso. Allempoña Festopa' o' agotatenanerr Pablo.

24 Allempoña huapa Pablopa' Festoñaapa' eñoratsapa' atet ot:

—Añcha'tarete Agripa, ñaña allohuenes ñeñtes arro'tsa'yenes: Te'pa' o' sentue añ yacma ñeñƧ nanac e'moñe'ten allohuen judionesha'. Ñetpa' o' otteñe'chuet e'ñe nesho allempo

Jerusaléño'tsenen ñaña arrpa' o' otteñe'chueñeta' allempo necherr ñaña arr. Ama't arrpa' o' che'chame'tueñeta', atet otyeset: "Chosa muetse', tarro'mar añ acheñerpa' ama pocteyaye o'ch alla corra."

²⁵ Tarraña allempoña napa' na'p̄to'tare'chpa' ama nentoñeña ñeñt̄ atto pocte' o'ch nemtsach. Ñaña e'ñe ña muenats o'ch entateñeta' añcha'taret̄ Augusto all Romo ñeñto'marña napa' pocte' nenteñ o'ch nemñe all.

²⁶ Tarraña napa' ama neñoteñe ñeñt̄cha' atet nequellcoñ ya'm̄cha'tareter̄ ñocop tarro'mar ama eñalle errotentcha' yotteñe'cheñ. Ñeñto'marña te'pa' o' nechore'tach arr all seshontena te'.

Allotña Festopa' atet otan añcha'taret̄ Agripa:

—Te'pa' p̄ach ñanom a'p̄to'tare'te' attoch napa' o'ch neñoch errotentcha' nequellca' carta añcha'taretecop.

²⁷ Napa' noctape'cheñ ama pocteyaye o'ch yemñe acheñ ehuancařeñ ñerra'm ama eñalle errotent o'ch yotteñe'cheñ.

26

¹ Allempoña añcha'taret̄ Agripapa' atet otan Pablo:

—Ñehua, te'pa' pocte' nenteñ o'ch peños p̄ama p̄ocop.

Allempoña Pablo e'ñe puehuom̄cha'teñoŋpa' o' echantañ pot, allempoñapa' eños ñocop, atet ot:

² —Te'pa' nocshena añcha'tarete Agripa tarro'mar eñall attotcha' neños pesho nocop, añecop tarro'mar cha otteñe'chenen judionesha'.

3 Napa' nocshena tarro'mar te'pa' o' peñoch pãña atet yeychena ya ñeñtey judioneshay. Ñaña o' peñoch attot ama patrraye' yoctape'chyeno. Ñeñto'marña te'pa' o'ch nenamaþ attoch pe'mñoten cohuen.

Atet atarr cotape'che't Pablo allempo ama ame'ñerra'

4 'Allohuen judionesha'pa' eñotuennet atet nocrrer' ahuat, ama't allempoteñ ne'ñalleta nenyoy, ñaña ama't allempo cheshenna' allempo yeyche't Jerusaléño epan namo'tsna'tarnesha'.

5 Ama't ahuatoteña' eñotuanete't napa' fariseoneshan ñeñtara ñeñt nanac etsotene' cotapñats nanac echarr allo yoctape'chen Partsocop. Ñeñt atet entnete't atet nocrrer'pa', atetcha'ñacho' a'meta'netañ.

6 Ñeñto'mar te'pa' arro'tsenen attoch sa'p'to'tare'ten, atto napa' name'ñena ñerra'm yerromapa' Yomporpa' tantaterreycha' esempohuañen. Añmapa' ñeñtara atet otane't ahuat Yompor yatañneshañ.

7 Ama't çharrasheña puechena epa ñeñtara ñeñt yatañneshañ yepen ñeñt chemere'tyesahuetpa', ñeñtña po'mñrenñetpa' e'ñe ame'ña'huenet ñeñt atet o' notuas. Ñeñto'marña ñet te'pa' nanac ma'yochrenet Yomporecop—yeto ama't ñaña tsapo. Tarraña ama't atet penetañ allohuen judionesha'pa' te'ñapa' e'moñe'tennet ama't napa' ñeñtara name'ñena atet ame'ñenet ñamet. Attoña amicha'tarete Agripa otteñe'chennetña te'.

8 ¿Eso'marte' sapa' soten amach errotenot tantaterrano Yompor arromñañnesha'?

Atto Pablopa' atarr muerochtatane't ñeñt ame'ñenaya Cristo

⁹ 'Napa'cho'ña ahuañmo'chapa' notenapañ ñato' ñeñte' poctetsa o'ch yemuerochtach ñeñt cotene' Jesús poctaṗña ñeñtara Jesús ñeñt nazareto'marnesha'.

¹⁰ Ñeñto'marña napa' nanac nemue-rochtatyese't acheñ Jerusaléño ñeñt ame'ñaye't Jesús poctaṗña. Shonte' acheñ ñeñt nabe'tate't cárcelo, tarro'mar cornanesha' ñeñt pa'micha'tareternesha' pen allohuen judionesha' po'cornaneshar, ñetñapa' o' apnet orden ñeñtecop. Ñaña allempo otyese't amicha'taretnesha' ahuo'ch muetsachet ñeñt ame'ñenaya Jesús poctaṗña' napa'cho'ña o'chcho' not, pocte'ñacho' muetsetepa'.

¹¹ Chocma nemuerochtatanete't ama't judionesha' po'prahuo'mar, ñaña nanaccha' nemne't o'ch nachmāre'tach ñeñt ame'ñatse't. Nanac natsrre'mueñoṗpa' noctare'tanete't erracmañen anetso'mar.

Allempo Pablopa' ello serrpare'taterraneterr atto ello cotape'cherran cohuen Yomporecop

(Hch. 9.1-19; 22.6-16)

¹² Alla oterraneterr Pablo:

—Atteñapa' o'cho' ahuen ñaña Damasco. Allempopa' napa' nechen orden ñeñt apuen ñeñt pa'micha'tareternesha' pen allohuen judionesha' po'cornaneshar.

¹³ Ñaña amicha'tarete te'pa' o'ch notaṗ ñeñt atet norrtoya allempo. Allempoña o' yechapmoch Damasco allempopa' o' chap pocto. Ñeñtña nanac poptetsa entoṗpa' machayoṗepa'tcha'

choyo'tam̄psapuen ama't ñeñt̄ epan nesen. Atet̄ poptenapa' metanenan atsne'.

¹⁴ Allempoña yapa' alla yerrmopra'yesa patso. Allempoña alla yerrmopra'yena patsopa', nañapa' o' ne'm ñoñets hebreyach̄o ñeñt̄pa' atet̄ oten: "Eso'mare't Saule pemuerochtatennanña ñeñt̄ name'ñenaya. Añpa' p̄añeña muerochtatetsa. Tarro'mar cha p̄ottena ñerra'mrrate' ashen ñeñt̄ e'ñe patpare'teñoñ ñañeñachña atserrp̄atetsa." Añpa' atet̄ oten ñeñt̄ norrtoya.

¹⁵ Nañapa' not: "¿Eshape'tña Ayochreshate eñets?" Ñañapa' alla otnerrerr: "Napa' ñeñten Jesús en ñeñt̄ara pemuerochtaten.

¹⁶ Te'pa' petanterra alla, ñeñt̄o'mar te'pa' o' norrta pesho attoch o'ch nenañ p̄a, p̄ach torratsa nocop, ñaña p̄ach a'pote' ñeñt̄ o' pentua te' ñaña ñeñt̄cha' neñotap̄ allempoch norrterrerr pesho.

¹⁷ Te'pa' o'ch nemñañ̄ allo'tsa'yen ñeñt̄ ama judioneshayayeto, tarraña napa' chocmach necuam̄psañ̄ ñerra'm esempo o'pataña judionesha' ñaña ama't ñeñt̄ ama judioneshayaye.

¹⁸ Tarro'marcha' nemñañ̄ allo'tsa'yen ñeñt̄ ama judioneshayayeña' allochñapa' attoch peserrpare'tatuanet attoch chapanet pueyoçhro, attoch o'huañcha' chope'chet checmeto. Añcha'ña o'ch alla chope'cherret puetaro. Ñaña attoch o'huañcha' ahuaencat̄ panet oneñeñ, añcha'ña ahuaencat̄ penahuet̄ Yompor. Allochñapa' o'ch ame'ña'huerrnet̄ na, allempoñapa' neñret̄na'huerranetcha' po'chñar, attoch o'ch parrocmatuerret e'ñe attecma atet̄ ñerra'm ñeñt̄ o' na'cohuentatua."

*Atto Pablo pa' ama atpare'tenano ñeññ atet gateñ
Partsesha' Jesús*

19 Alla oterraneterr Pablo:

—Ñeñño'marña añcha'tarete Agripa te' napa' ama natpare'teñe Jesús ñeññara ñeññ norrtoya entot.

20 Ñanompa' o' neserrpare'tatanet Damasco attoch cotape'cherret ello cohuen Yomporecop. Allochñapa' o'ch pa'yenet ñeññ cohuentetsa Yomporecop, attoch yeñoch po'ñoçh o' cotape'cherret etserra. Attecma neserrpare'tatanet ama't Jerusaléño, ñaña ora erracmañen Judeo'mar, ama't ñaña allo'tsa'yen ñeññ ama judioneshayaye.

21 Attoña judionesha'pa' o' rroma'net Parets pa'paclo o'ch muetsanetañ.

22 Tarraña Yomporpa' ahuo't a'natna nanac atto teme'ttsen nocrrena, attoch neserrpare'tach allohuen acheñenesha' — ama't ñeññ ama esoshe'mayaye, ñaña ama't ñeññ añcha'taretnesha'. Tarraña ama añeye' neyçhatenaneto ñeññ ama cohuenayaye. Añña attecma neyçhatenanet atet serrpare'te't ama't ñeññ a'mtaye't Yompor po'ñoñ ahua't. Ñeñtpa' ama't Moiséspa' atet ote't ñeññcha' atet perra esempo.

23 Ñeññara serrpare'tatanete't ahuo'ch huapa Cristo añ patsropa' nanaco'ch mueroçhtachet, allotpa' ahuo'ch rroma, tarraña ñapa' tanerrach. Atto'chña tanterra ñanompa' o'ch a'puetarsam̃psanet pueyoçher allohuen judionesha', ñaña ama't po'poñeçhno acheñ.

*Allempo Pablopa' atarr mueneñ o'ch ame'ñatana
amicha'taret Agripa*

²⁴ Allempoña atet eñen Pablo ñocoppa', Festoñaapa' atet och e'ñe huomenco:

—Chate' Pablo pemospuena tarro'mar nanac es p̄octape'chenpa' ñato' ñeñite' o' mospaterreḗ.

²⁵ Pabloñaapa' atet och:

—Ama Ayochreshate Festo choye' nemospueno. Añña neserrpare'tatenes ñeñt e'ñe po'ñoçh.

²⁶ Ama't amicha'taret Agripapa' e'ñe eñotueñ atet noten. Ñeñto'marña te'pa' o' neyemcha ña tarro'mar napa' neñoteñ, ñapa' o' entuon ñeñt atet nepena, ñaña tarro'mar ama a'nahua es neḗa'yeno.

²⁷ Amicha'tarete Agripa, ḗapa' ¿ḗame'ñeña't ñeñt a'mtaye't ahuat Yompor po'ñoñ? Napa' neñoteneḗ ḗapa' ḗame'ñeña.

²⁸ Allempoña Agripapa' atet otan Pablo:

—Cha't p̄otenapañ tayecmapa' o'ch ḗame'ñatna Cristo.

²⁹ Pabloñaapa' alla otererr: Ama't tayecma amapa' tsapaṭoneṭpa' napa' atarr nemneñ Yomporpa' o'ch ame'ñaterrḗa, ñaña ama't allohuenes ñeñtes ne'mñotene' te'. Atarr nemneñ o'ch same'ñerra allohuenes atet ñerra'm na, tarraña ama'tcha' atteseñ ñerra'm na, sapa' amuepa'chña ehucareṭeyayso.

³⁰ Allempoñaapa' o' tomcha'terret allohuenet—amicha'taret Agripa, ñaña gobernador Festo, ñaña Berenice ñaña allohuen ñeñt allo'tsa'yen.

³¹ Allempoña ahuanerretpa' atet otanna'tyeset:

—Añ yacmapa' ama es peno attoch o'ch yemt-sach amapa' attoch yemñe cárcelo.

³² Allempoña añcha'tareť Agripa otan Festo:

—Amach ña muenetsñe o'ch a'pocatenana' ñoñets añcha'tareťesho Romopa' yapa' o'te' ya'rroyereñ e'ñe țayecma.

27

Allempo anmet Pablo Romo

¹ Allempoña o' a'pocatuēt o'ch mueñet Pablo anetso Romo allara Italiapa' o' anmet allo'tsen capitán ñeñť pa'so'cheñ Julio, ñeñť po'capťaner penet ñeñť emchorrenaya añcha'tareť Augusto. Ñaña o' anmet po'poñečno ñeñť ayottam̄psaretečno o' apueñeta' Julio, allñapa' ñach cohuan̄pesnomahuet.

² Allempopa' allo'tsen ñaña Aristarco ñeñť macedonio'marnesha' ñeñť huetsa Tesalónicoť. Ñeñťcha' parro yocťanem̄ Pablo.* Allempoñapa' o'cho' yebe'ťoscha't boto ñeñť huetsa anetsot Adramitioť, ñeñťña botepa' o'ch etsotyesnoma allemeña sohua'puetso'mar ora Asio'mar. Allempoñapa' o'cho' ahuan̄psey boto.

³ Tsapaťñapa' arr yetsotosa all oteñet Sidóno. Allña capitán Juliopa' morrentnomana Pablo ñeñťo'mar o' muenach o'ch emo'tnoman pamo'tsesha', ñeñť yeča'yetsa all Sidóno, attoch ñetpa' o'ch apapet Pablo ñeñť palltena.

⁴ Allempoña ahuan̄perryerrpa' nanac yorrnotam̄pesnoma. Morrpa' ama muenatyē o'ch yemet attoch o'ch ahuey e'ñe pačharr all oñenet, ñeñťo'marña yepotesam̄pesuanma coñe'ť pats

* **27:2** Lucas ñeñť quellquē' añ ñoñets ñapa' cota'nman ñaña Pablo.

ñeññ pa'so'cheñ Chipre. Tarro'mar yepotesuanma attoch ñeññ patspa' o'ch a'npanñpsey mōrr.

⁵ Allempoñapa' arr yoñemuanom allame'tets Cilio'mar, ñaña allame'tets Panfilio'mar. Allempoñapa' yečhap ñaña Miro all yetsotosa, allara ñeññ pa'netser Licia.

⁶ Allña capitán Juliopa' entosan po'poñ bote ñeññ huetsa Alejandriot ñeññcha' tatsa Italio. Ñaña allempopa' otey ahuo'ch ya'tačha't all.

⁷ Allempoña o' allponmat ahuanñpsey e'ñe acořapa' e'ñe yemueročhenñoťa yemet ñaña Gnidot. Alloťpa'čo'ña ama muenaterryerro mōrr o'ch ahuaryerr e'ñe pačharr, ñeñño'marña yepotesamñpesuanerrerr coñe't pats ñeññ pa'so'cheñ Creta attoch ñeññ patspa' o'ch a'npanñpsey mōrr. Allñaapa' allpono'mar yoñom allecma etsotenet ñeññ pa'so'cheñ Salmón.

⁸ Yemueročhenñoťa yemetua ñaña allot e'ñe acořa. Atteñapa' yečhap ñaña all oteñet Cohuen Sohua'puetso. Alloťpa' e'ñe allame'ttsa anetso Lasea.

⁹ Yemueročhtame'teññoťpa' o' ya'llponmatnom ñeñño'mar allempopa' o' čhen allempo nanac añcha'nočhtena o'ch ahuanñpsey sapo'mar. Ñaña o' met allempo anareť judioneshacop allempocma ahuantenet pa'čhporrña Yomporecop, ñeñño'marña yapa' o' yeñoch o' čhen allempo nanac orrnotena sapo'mar. Ñeñño'marña Pablopa' o' yerpatanet,

¹⁰ ateť otanet:

—Masheñneshacha', napa' noctape'chen arepoña es yehuapoya toño allempoch

ahuanmperryerr. Napa' noctape'cheñ ñato' o'ch yechencatsre'tnoma, ama't ñaña yebotepa' chach chenca; ama't yapa'cho'ña arepoña cha yechenca.

11 Tarraña capitánñapa' o' ame'ñenana atet otanet ñeñt maneja'nene' bote ñaña ñeñt atet otanet ñeñt pamo'mte' pen bote. Ama ame'ñyeto atet otanet Pablo.

12 Ñaña all Sohua'puetso Cohuenpa', ama tama cohuenayaye o'ch allaya allempo chen orrnoteñtsopo. Ñaña allohuenetpa' o' e'ñe pocte' entuet o'ch ahuanmperryerr allot. Arro'chña yechap sohua'puetso all oteñet Fenice, tarraña allara anetso Creta. O' sechet Sohua'puetso Feniceo tarro'mar allpa' ama tama orrnoteno. Allñapa' allach ya'posa tarremphua o'ch metuen orrnoteñtsopo.

Allempo huomenquëshatampesnomuet sapo'mar

13 Allempoñapa' o' huapa mōrr po'pshemñtañot, tarraña ñeñt'pa' mamesha mōrraren. Allempoñapa' otyeset:

—Te'pa' pocte' o'ch ahuaryerr.

Allempoñapa' o'cho' cheterret ñeñt rremuene' botepa' o'cho' ahuanmperryerr. Allotñapa' e'ñe to'ña'so'mara yoñmañpes allara anetso Creta.

14 Tarraña e'ñe o'chtapa' ahuepa'tcha' huapa ñaña mōrr onnatot allente'tsen anets Creta. Allempoñapa' o'cho' yorrnotamñpesnoma nanac huomenc.

15 Botepa' ama eshcaye' to allenet anmamñpenyet allempoña ama erro't yepepa' o' anmamñsey orrno a'yenet.

16 Orrnoñapa' o' çhapatey po'pshemñtañoť allo'tsen coñe't rroçhpe'chañ añ pa'so'cheñ Clauda. O' çhapatey allo'temñta'n ama tama hueno mōrr. Allña e'ñe yemueroçhenñota yechant noñť ñeñť cheta'nen atarr bote. Allo'tpa' yesha'ch atarr boto.

17 Allempoña o' yesha'tua noñťpa' ñetñapa' huancatse'tet atarr bote attoch amach tare'che orrno. Ñaña ñetpa' añ mecha'tet ñato' botepa' o'ch çhap muelle'sato allo'tsen mueñ ñeñť ama echarroyaye ñeñť otenet Sirte. Ñeñto'marña o' pueyhuet enoť shetamuets ñeñť chope'chatene' bote attoch botepa' amach erreneť to.

18 Allempoñapa' ahuepa'tcha' yorrnotamñpes nanac huomenc. Tsapañña' chetanatet cargapa' saprrochet sa'po.

19 Poma'pamtañoñapa' o' saprronet ñaña ñeñť allpon echyen bote.

20 Allempopa' allponmat ama orrterro atsne' ama't ñaña rantoçhno, ama't mamesha. Nanac yorrnotamñpsa. Atteñapa' yot:

—Te'pa' amach erroteno yequeshperro.

21 Ñaña allponmat ama es yerro. Allempoña Pablopa' tompa' ot:

—Ñerra'm amach masheñneshacha' sa'tpa'noñe atet notaseñ, amach yonñe Cretoť, te'pa' amate' es yeyore'tenayñe ñaña allempopa' amate' yechencatsre'tañe.

22 Tarraña te'pa' o'ch notas, amach sellcatsto tarro'mar yapa' yequeshpach allohueney. Añachña chencatsre'tatsa bote.

23 Napa' neñoteñ tarro'mar tsapopa' orrtona mellañoťeñ ñeñť huetsa Yomporeshoť ñeñťara

Yompor ñeñt̃ puechemer nepene', ñaña ñeñt̃ara ñocop netorrena.

24 Ñeñt̃ norrtoyapa' atet̃ oten: "Amach Pablo pelcatsto tarro'mar pechapcha' allo'tsen añcha'taret̃ all Romo. E'ñe pot̃pa' Yomporpa' o'ch a'natana allohuen ñeñt̃ epaṣ̃ sechope'cham̃pen boto."

25 Ñeñto'marña notenes amach sellcatsto. Tarro'mar napa' neyemteña Yompor, ñerra'm erroten otenpa' atet̃cha' ṗa.

26 Tarraña ama't atet̃pa' chocmach yepotam̃ṗsa allempo o'ch yechapmoch patso. Añpa' allohua atet̃ otanet Pablo.

27 Allempoña o' met charramat puechena pa'tatsmat, at̃ta yetam̃pena sa'po ñeñt̃ otenet Adria. Allempopa'cho'ña yorrnotam̃pesnoma. Allempo chap rroch tsapopa' añña ñeñt̃ taruaset̃s botopa' atet̃ otet:

—Ñato' o' yechapmoch allo'tsen pats.

28 Allempoñapa' o' topaso'tet sa'p. Allempoñapa' ahuo't eñochet allo'tsen ma'poch charra' puechena pechap metro. Allempoñapa' o'cho' ahuaryerr allpononet̃pa' allpa'cho'ña o'cho' topaso'tuereterr. Allñapa' otet allo'tsen epoch charra' puechena cancherr metro. Allempoñapa' añ mecha'tet t̃aye'to' yeto'mam̃ṗsa mapyo.

29 Allempoñapa' o'cho' a'shore'tet puequë'nare'tot̃ pa'tatsm̃aga ñeñt̃cha' rremue' bote. Allempoña a'shore'tuet̃pa' o' cohuet ato't puetarena'.

30 Añña ñeñt̃ taruaset̃s botopa' a'suaterret e'ñe a'nahua noñt̃ tarro'mar ñet̃pa' añ muenenet o'ch caçhpa'nmuert̃ alla bote. Ama't

ahuepa't a'suaterret noñtpa' ñetpa' čha ottenet ñerra'mrrate' po'poñ a'shore'tenet ñeñčha' rromue' bote poñe'magot.

³¹ Allempoña Pablopa' eñotanet atet cotape'chen ñeñč taruaset botopa' atet otan capitán ñaña po'poñečno solltarnesha' atet otanet:

—Ñerra'm ama alla a'pueto botopa' sapa' amate' errotenoť sequesherro ama't puesheñarrotesa.

³² Allempoña solltarnesha'pa' o' tsorramřset noñč pochar attoch ahuo' a'yenet.

³³ E'ñe puetaresuanetsapa' añña Pablopa' atet otanet allohuenet:

—Te'pa o'ch serra'muen țarro'mar o' čharramat puechena pa'tatsmat sema'yochreñoť po'poñpa' ama semueno, ama es serreno.

³⁴ Ñeñčo'marña o' nota'muenes serra'muen attoch čherr sehuamenc, țarro'mar amach eseshas chencatso, ama't puesheñarrotesa.

³⁵ Ñeñča otuanet o' chetan panpa' o' ma'yocha e'ñe alla all shontena acheñenesha'. Alloťpa' shotan panpa' o' rre'.

³⁶ Allempoñapa' o' ye'chatanetpa' o' rret ñamet.

³⁷ Ñeñčey boto'tseney allohueneypa' allo'tsen doscientos setenta seis acheñenesha'.

³⁸ Allempoña ocha'huanet puerrarpa' alla saprroteneterr trigopo'r oño attoch o'huañcha' tama eñerrta bote.

Allempo taramřsanet sa'p po'bote

³⁹ Allempoña e'ñe puetaresuenpa' o' entet pats, țarraña ama puentareto ñeñč pats, țarraña allempo o' entet ñaña a'yohuen mueyapo's

allñapa' a'yohuen ñaña pueme'tar. Allempoñapa' coťape'chetpa' otet:

—Ñato' yečhapcha' all allochñapa' allcha' yetso-tosa cohuen.

⁴⁰ Alloťñaapa' tsorro'tet ñaña ñeñť rromuene' botepa' o' a'ypo'ña'nmet alla sa'po. Allempoñapa' o' pueyañperet allo huanquět ahuaña bote puepopař. Allempoñapa' echantet ñaña poñe'ñagoť shetamuets attoch miorrpa' o'ch matatan bote. Allempoñapa' o'čho' ahuañpsey pueme'taronet.

⁴¹ Allempoñapa' o' čhap bote all epchacra'stena sa'p all nanac epopa' rročhoñapa' čha muelle'sattena. Chap all botepa' čha ačhtosa poñe'ñagoť, ama erroť yepere. Arroťña puequ'e'nare'toť nanac emo'yarertena sa'p. Po'huamencpa' o' tarampsey yebote.

⁴² Allempoña solltarnesha'pa' mueneñ o'ch muetsanatuan ñeñť ayottampsaret taye'to' ñerra'm paťetpa' ahuo'te' yetet.

⁴³ Tarraña capitánpa' nanac mueneñ o'ch a'qeshpatan Pablo ñeñťo'marña ama muenataneto o'ch muetsanachet. Ateť otanet:

—Ñerra'm esesha'te' eñotene' paťatsapa' o'ch sepaťa sanom attoch seřchata yomťa'n.

⁴⁴ Alloťñaapa' saña ñeñťes ama eñotenaye paťatsapa' ñato' o'ch sanemyes tabla amapa' po'poñečhno ñeñť echyen bote, allochñapa' attoch seřchata saña.

Allempoñapa' o'čho' pechatuet allohuenet.

28

Allempo chapuet coñe't pats pa'so'cheñ Malta

¹ Allempoña o' yequeshpa'hua allohueneypa' allempoñapa' otyet añ coñe't patspa' año' pa'so'cheñ Malta.

² Añña acheñenesha' ñeñt yeçhetsa allpa' nanac muerapyet ñeñto'marña a'toronayet tso' allcha' yeshotosa, tarro'mar allempopa' cha huatena o' yesnate't. Tarraña e'ñe cohuen agapapuey allohuen acheñenesha'.

³ Pabloñapa' allenta tsella'tpechospa' o' a'tamo'ye' tso. Allempoñapa' machayota cha'nom shecheþ e'ñe tso't. Ahuo't atserr e'man tso'pa' o' cha'nompa', cha a'chan Pablo pototpa' alla a'sope'ch.

⁴ Acheñenesha' ñeñt yeçhetsa allpa' eñchet Pablo cha a'sope'cheñ shecheþ pototpa' atet otanna'tyeset:

—Añ acheñpa' amtsañte'ca'ye ñeñto'mar te'pa' ama't o' queshpa'hua sa'potpa' te'ña Yomporpa' o'ch tsa'tacha.

⁵ Tarraña Pablopa' pa'shque'cherra shecheþña'pa' o' shora'nerr tso, amaña erroteye' pe ama't mamesha.

⁶ Allempoña acheñenesha'pa' atta cohueñet Pablo ñato' machayotach añecmuenta potpa' o'ch taco'ra rromue'. Allempoñapa' o' cohua'huet o'chet ama es atsoto, allempoñapa' o' cotape'cherret po'poñ, atet otet:

—Añpa' po'ñoçh Paretste'.

⁷ Ñeñña ane'tañtetsa allpa' añ pa'so'cheñ Publio. All yeçhap yapa' allo'tpa' allame'ttsa

all yečhena Publio, allpa' allo'tsen po'patseñ. Ñapa' o' agapapuey e'ñe cohuen ñeñto'mar allpa' yema'pamuetnom pa'paclo.

⁸ E'ñe allempopa' añña Publio pomporpa' čha atsna'ten, nanac huoraten ñaña čha chemotse'ten, ama achñeno. Allempoña Pablopa' o' ahuo' o'ch enteña'. Allempoña čhap Pablopa' ñaña' ma'yocham'psosya. Allempoña Pablopa' o' a'plana'chpa' añña ñeñt' atsna'tetspa' allenta correna.

⁹ Allempoña e'mare'ch allohuen acheñenesha' atet o' p'osa Pablopa' huapyesa acheñenesha' ñeñt' atsna'tyets. Ñetpa'čo'ña e'ñe a'crratyesianet Pablo.

¹⁰ Ñeñto'marña acheñenesha'pa' shonte' regala'yesyet pa'namen. Ñaña allempo ahuan'perryerr botopa' nonayet allpon ñeñt' yepalltena.

¹¹ Allempoña o' met ma'p'ña arrorrpa' o' alla ahuan'perryerr po'pnañ boto. Ñeñt'ña botepa' ñeñt' cohue' o'ch metuen allempo orrnoteñtsopoten. Añ botepa' ñeñt' huapatsa ahuaña Alejandriot. Ñaña añ botepa' echenan poñe'magoť acheñma't' ñeñt' epuesha' ñeñt' toma'ntatenet po'yosret; ñeñt'pa' añ pa'so'cheñ Cástor; po'p'sheñpa' añ pa'so'cheñ Pólux.

¹² Allempopa' arr yetso'nom a' all oteñet Siracusa. Allña'pa' alla yema'pamuetnom.

¹³ Allo'tpa' allampaño'mara yoc'atop'ñe'ch pats, atteñapa' yečhap all oteñet Regio. Allpa'čo' all yetso'nom a'. Tsapa'tña'pa' o' m'orrarenerr mamesha'tets. Morrpa' arroť

huena yecha'ñeñta'not. Allempoñapa' o'cho' alla ahuanñpenyerr. Alloñapa' e'ñe puepomtañocma yečhap all oteñet Puteoli. Allpa' all yetsotosa.

14 Allñapa' yentos ñeñt ame'ñetsa. Ñetpa' a'patapyet all yečhenet, ñeñto'marña yapa' alla yecančherrmatnom ñesheto. Attotapa' o'cho' yeya'rrota ñaña Romo.

15 Añña ñeñt ame'ñetsa all Romopa' ahuo't e'mare'tyet o' yečhap allampañopa' allenta't onača'tet o'ch poctapyet. Puesheña'tetspa' o' čhapuet all oteñet Foro ñeñtara Apio. Po'potantañña'alla't čhapyeset rrocho all oteñet Ma'ppahua Pocoll. Allñapa' all pocta'yet. Allñapa' all entosanet Pablopa' nanac parasyoso'tan Yompor tarro'mar allempopa' nanac coshatapet Pablo.

16 Allempoña o' yečhap Romopa' atet otapet Pablo yečhosepa'to' ellonet, tarraña čhocma net solltar ñeñtča' cohuanñpse'.

Allempo Pablopa' serrpare'tatosanet allempo čhap anetso Romo

17 Poma'pamtañoñapa' añña ñeñt amiča'tarettetsa judioneshacop allpa' Pabloñapa' agotatanet allohuenet. Allempoña o' e'ñe apča'huetpa' Pabloñapa' atet otanet:

—Masheñeshacha', ama't napa' ama erroť nepeñeña judionesha' ñaña ama čho nehuapore'tateno ñeñt atet yeče't yatañneshañpa' te'ña judionesha'pa' o' atta rroma'net all Jerusaléño, o' pomnet allo'tsen romanonesha'.

18 Ñetpa' a'p̄to'tare'tnet, tarraña amaña entoneto atfo alloch muetsatnet, ñeñto'mar ñetpa' mueneñetañ o'ch a'rroyerrnetañ.

19 Tarraña judionesha'pa' ama pocteye' eñcheto o'ch a'rroyerrnet. Ñeñto'marña napa' nesecha o'ch entatenneta' am̄cha'tareñ arr Romo. Tarraña napa' ama cho notteñe'cheñe namo'tsna'tar.

20 Ñeñto'marña te'pa' o' nagotatuas allochñapa' o'ch neserrpare'tatuas ñeñt̄ atet̄ pennet. Ñaña napa' nameñena atfo ñerra'm yerromapa' Yomporpa' o'ch tantaterrey esempohuañen. Ñeñto'marña te'pa' o' sentuan napa' ehuncareten, tarraña ama't allohuen judionesha'pa' attecma ame'ñenetañ.

21 Ñetñapa' atet̄ ochet Pablo:

—Tarraña yapa' ama yaguëna' carta Judeot̄ ñeñt̄ atet̄ otenet̄ p̄ocop. Ñaña ñeñt̄ ame'ñetsa ama't huapyenet̄ arrpa' ama esesha' erroñ otetso p̄ocop ñeñt̄ ama cohuenayaye.

22 Yapa' aña yeñoten po'ñoçh çhocma e'moñe'teñet̄ erracmañen ñeñt̄ coñene' Jesús poctap̄ña. Ñeñto'marña yapa'cho'ña yemneñ te'pa' o'ch ye'mñotañ yaña erroñente' p̄octape'chen p̄a.

23 Allempoñapa' a'p̄octachet allempoch huaçha'tet̄ allo'tsen Pablo allempo'ch serrpare'tatanet. Allempoña o' çhap allempoch huaçha'tetpa' allempopa' shonte' achen huaçha'tatsa Pableshe. Allempoña Pablopa' e'ñe ellapen serrpare'tatahuet; a'potanet̄ atet̄ pena Yompor po'cohuenña ñeñt̄ atfo ayochreshañt̄ena ña. Ñaña lleyatyesanet̄ Moisés po'ñoñ all

oten atetcha' pa ñeñtcha' Cristotats. Ñaña lleyatyesanet po'ñoñ ñeñt a'mtaye't ahuat Yompor po'ñoñ all oten ñaña atetcha' pa ñeñtcha' Cristotats. Ñapa' nanac mueneñ o'ch ame'ñatanet atto Jesús pa' po'ñoñ ñeñt Cristotats.

²⁴ E'ñe allempopa' ame'ña'yesyet puesheña'tets, tarraña po'potantaña' ama es ame'ñatso.

²⁵ Atteña pa' ñañeñeta achm'are'tanna'tyeset. Allempo ahuanerrmochetpa' allempoña Pablo pa' otanet:

—E'ñe po'ñoñ atet ote't Isaiás ahuat allempo Parets Puecamquëño'tpa' otan satañneshañ:

²⁶ O'ch soteña' judionesha' añ ñoñets: Ama'tcha' chocma e'mñotenetpa' ama't ahuatapa' amach chapaneto pueyo'chreto. Ñaña ama'tcha' cho es entuetpa' amach chapaneto pueyo'chreto.

²⁷ Allo'tpa' o'ch sotenaneta', te'pa' pueyo'chretopa' nanac echarrenet attoch amach es chapahueto pueyo'chreto. Te'pa' amach mueneto o'ch es e'mñotet taye'to' chapanet pueyo'chreto. Te'pa' amach mueneto o'ch es entet taye'to' chapanet pueyo'chreto. Attetach amach es cotape'cherreto nocop ama't mamesha attoch na'queshp'aterranet. Aña' allohua atet ote't Isaiás ñeñt a'mtaye't Yompor po'ñoñ ahuat.

²⁸ Allempopa' alla oterraneterr Pablo:

—Te'pa' o'ch neñotatas añ, tayoteñ Yompor po'ñoña' o'ch yeserrpare'tach po'poñ acheñ ñeñt ama judioneshayaye. Tarro'mar ñetpa' ñerra'm

e'moñet Yompor po'ñoñpa' o'ch ame'ñet. E'ñe pame'ñeñoťetpa' qeshperretcha'.

²⁹ Ñeñta otuanet Pablopa' añña judionesha'pa' e'ñe pachm̄are'tanna'teñoťetpa' o' ahuanerret.

³⁰ E'ñe epa char all yecha Pablo Romo. Allpon pallta'yese'tpa' e'ñe tsa'tuauye't. Ñaña e'ñe cohuen agapyesane't ñeñt̄ huapyestse't.

³¹ Ñaña e'ñe cohuen serrpare'tatanete't atet pena Yompor po'cohuenña atto ayochreshattena ña, ñaña yechatanete't atet pena Yepartseshar Jesucristo. Tarro'mar allpa' ama esesha' epatare'taye'te. Allohua.

**Yompor Po'ñoñ ñeñ attó Yepartseshar
Jesuscristo e'ñe etserra a'poctaterrnay
Yomporesho
New Testament in Yanasha' (PE:ame:Yanasha')**

copyright © 2008 Wycliffe Bible Translators, Inc.

Language: Yanasha'

Translation by: Wycliffe Bible Translators, Inc.

Yanasha'[ame], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yanasha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 28 Dec 2024 from source files dated 29 Jan 2022

fa985bb4-fad0-5968-9ee4-626b89cba24f